

श्री हर्षपुष्पामृत जैन ग्रन्थमाला-ग्रन्थाङ्कः ७३

श्री महावीर जिनेन्द्राय नमः ।

॥ तपोमूर्ति पूज्याचार्यदेवश्रीविजयकर्पूरसूरिगुरुभ्यो नमः । हालारदेशोद्धारक-पूज्याचार्यदेवश्रीविजयामृतसूरिगुरुभ्यो नमः ॥

श्री-आगमसुधासिन्धुः (एकादशमो विभागः)

चतुर्दशपूर्वधर-श्रुतकेवली-श्रीमद्भद्रबाहुस्वामी-विरचितं श्री पर्युषणाकल्पाख्यं

॥ श्री कल्पसूत्रम् (वारसा-सूत्रम्) ॥

संपादकः संशोधकश्च-तपोमूर्ति-पूज्याचार्यदेवश्रीमद्विजयकर्पूरसूरीश्वर-पट्टालङ्कार-हालारदेशोद्धारक-
कविरत्न-पूज्याचार्यदेवश्रीमद्विजयामृतसूरीश्वर-विनेयः

पण्यास-श्री-जिनेन्द्रविजय-गणी

प्रकाशिका-श्री हर्षपुष्पामृत जैन ग्रन्थमाला, लाखाबावल-शांतिपुरी (सौराष्ट्र)

प्रकाशिका—
श्री हर्षपुष्पामृत जैन ग्रन्थमाला
लाखाबावल-शांतिपुरी (सौराष्ट्र) गुजरात

वीर सं० २५०२]

विक्रम सं० २०३२

[सन् १९७६

* आ आगमना अधिकारी योगवाही गुरुकुलवासी *
* सुविहित मुनिवरो छे *

Rs 1500 = 500

मूल्य रु १५०-००

Rs 150 = 50

मुद्रक
साईनाथ टायपोग्राफी (प्रिन्टींग प्रेस)

४ कुंती कॉटेज, ६ ठा रास्ता,
सांताकूझ (पूर्व) बम्बई-१५.

सादर समर्पण—

महान तपोनिधि दादा पू. पंन्यास श्री मणिविजयजी गणिवरना शिष्यरत्न पूज्यपाद शासनशिरोमणि पंन्यास श्री बुद्धिविजयजी (बुटेरायजी) गणिवरना शिष्यरत्न विद्वान् चारित्ररत्न पंन्यास श्री आणंदविजयजी गणिवरना शिष्यरत्न-बालब्रह्मचारी निस्पृहीशिरोरत्न मुनिमंडलाग्रेसर पूज्य मुनिराजश्री हर्षविजयजी महाराजाना शिष्यरत्न महानतपोनिधि पूज्य आचार्यदेव श्री विजय कर्पूरसूरीश्वरजी महाराजाना पट्टधर पूज्यपाद प्रशान्तमूर्ति प्रकृष्टवक्ता प्रवचनप्रभावक हालारदेशोद्धारक कविरत्न पू. आचार्यदेव श्री विजयामृतसूरीश्वरजी महाराज

जेओश्रीए श्री महावीर परमात्माना कल्याणकारी शासननो भव्यजोवोना हितने माटे प्रचार करतां अनेक पुन्यात्माओने अरिहंतशासनना रागी बनावी मुक्तिमार्गना पथिक बनाव्या छे. ते साथे मने पण अज्ञान अने मिथ्यात्वना घेरा चमळमाथी खेंची, संसार पारावार पार पमाडवा भव्य यानरात्र सम संयमधर्ममां स्थापन कर्यो अने मारी संयमसाधनाना सफलता माटे अने सम्यग्ज्ञानादिना विकास माटे सतत हितर्चिता सेवी तेओश्रीना ए महान उपकारोनी स्मतिमां यत्किंचित् कृतज्ञता रूपे तेओश्रीने

श्री आगम सुधा सिन्धु अग्यारमा विभाग स्वरूप

श्री कल्पसूत्र

सादर वंदना साथे समर्पण करी कृतकृत्यता अनुभवुं छुं.

गुरुवरणचञ्चरिक
जिनेन्द्रविजय

संपादकीय निवेदन

निष्कारणबंधु विश्ववत्सल चरमशासनपति श्रमणभगवान महावीरदेवे भव्यजीवोना हितने माटे स्थापेल शासन आजे विद्यमान छे अने विषम-कालमां पण भव्य जीवोने माटे सर्वज्ञ परमात्मानुं ए शासन परम आलंबन रूप छे. तीर्थकरदेवोनी अविद्यमानतामां तेओश्रीनी वाणी शासननां प्राण स्वरूप होय छे. श्री तीर्थकरदेवोअे अर्थथी प्ररूपेल अने गणधरदेवोअे सूत्रथी गूंथेल जिनवाणी हितकांक्षी पुन्यात्माओ माटे अमृत तुल्य छे.

विद्यमान आगम श्रुतज्ञानमां मुख्यतया ४५ आगम गणाय छे. ते उपरांत पण ८४ आगमनी गणतरीने हिसाबे बीजु पण केटलूंक आगम रूपी श्रुतज्ञान विद्यमान छे. आगम सूत्रो उपर निर्युक्तिओ, भाष्यो, चूर्णिओ अने टीकाओ रचायेल छे. अने अथी सूत्र सहित आगमनी अे पंचांगी जैन शासनमां मान्य छे. तेना आधारे वर्तमान ज्ञानाचार, दर्शनाचार, चारित्राचार, तपाचार अने वीर्याचार रूप व्यवहार प्रवर्ते छे. सम्यग्दर्शन सम्यग्ज्ञान अने सम्यग्चारित्र रूप मुक्ति-मार्ग प्रवर्तमान छे.

पंचांगीनो वाचना, पृच्छना, परावर्तना, अनुप्रेक्षा अने धर्मकथा रूप पंचलक्षण स्वाध्याय जेटलो जोरदार तेटली श्री संघमां सम्यग्ज्ञाननी शुद्धि जोरदार, तेनाथी ज्ञानाचार उज्वलं, उज्वल ज्ञानाचारथी दर्शनाचार उज्वल, उज्वल दर्शनाचारथी चारित्राचार उज्वल, उज्वल चारित्राचारथी तपाचार उज्वल अने अे चारे उज्वल आचारथी वीर्याचार उज्वल, वीर्याचारनी उज्वलताथी जैनशासन उज्वल, ए उज्वल जैन शासन सदा जयदंत वर्ते छे.

आम शासननो आधार कहो के पायो कहो, मूल कहो के प्राण कहो, अे श्री जिनवाणी छे अने ते जिनवाणी ४५ मूल आगम सहित पंचांगी स्वरूप छे. पंचांगीने अनुसरता प्रकरण ग्रन्थो यावत् स्तवन सज्जाय के नाना निबंध के वाक्य स्वरूप छे. उपशम विवेक संवर अे त्रिपदी स्वरूप जिनवाणीथी घोर पापी चिंतातीव्र पतनना मार्गथी नीकली प्रगतिमार्गना मुसाफिर बनी गया हता.

૪૫ મૂલ આગમના અધિકારી યોગવાહી ગુરુકુલવાસી સુવિહિત મુનિવરો છે, સાધ્વીજી મહારાજો શ્રીઆવશ્યક સૂત્ર આદિ મૂલ સૂત્રોના તમજ શ્રીઆચારાંગ સૂત્રના યોગવહન કરવા પૂર્વક અધિકારી છે. શ્રાવક શ્રાવિકાઓ ઉપધાન વહન કરવા પૂર્વક શ્રી આવશ્યક સૂત્ર ઉપરાંત દશવૈકાલિકસૂત્રના ષટ્-જીવ-નિકાય-નામના ચોથા અધ્યયન પર્યંતના શ્રુતના અધિકારી છે. આમ આગમશ્રુતના અધિકારી મુનિવરો યોગવહન કરવા પૂર્વક યોગ્યતા મુજબ અધ્યયન આદિ કરીને પોતાના જ્ઞાન દર્શન ચારિત્રને નિર્મલ બનાવે છે અને યોગ્યતા મુજબ વાચના, ધર્મકથા દ્વારા જિણવાળીનું પાન કરાવી સાધુ-સાધ્વી-શ્રાવકશ્રાવિકા રૂપ ચારે પ્રકારના સંચને તેમજ માર્ગાભિમુખ જીવોને મુક્તિમાર્ગ પ્રદાન કરે છે.

૪૫ આગમસૂત્રો ૬ વિભાગોમાં વહેંચાયેલ છે. (૧) અંગસૂત્રો ૧૧ (૨) ઉપાંગસૂત્રો ૧૨ (૩) પચન્નાસૂત્રો-૧૦ (૪) છેદસૂત્રો-૬ (૫) મૂલ સૂત્રો-૪ (૬) ચૂલિકાસૂત્રો-૨. આ સૂત્રોનું સ્વાધ્યાય આદિ અધ્યયન વધે તે માટે ઉપયોગી બન તે રીતે ૪૫ મૂલ સૂત્રો શ્વેતામ્બર મૂર્તિપૂજક શ્રીસંઘમાં સ્વયં મુદ્રિત નથી અને જેથી આગમ સૂત્રોના સ્વાધ્યાય દિની અનુકૂલતા થાય તે માટે શક્ય પ્રયત્ન સંશોધન કરીને પ્રગટ કરવાની યોજના વિચારવામાં આવી છે, તે યોજના મુજબ ૪૫ આગમસૂત્રો ૧૪ વિભાગમાં સંપાદન થશે.

પહેલો, બીજો, ચોથો, આઠમો, બારમો, તેરમો ચૌદમો એમ સાત વિભાગ પ્રગટ થયા પછી આ અગ્યારમો વિભાગ સંપાદિત થયેલ છે. આ વિભાગમાં શ્રી કલ્પસૂત્ર આપવામાં આવ્યું છે. પર્યુષણમાં દર વર્ષે વાંચી શકાય તે માટે પ્રતાકારે તથા સારા આર્ટ પેપરમાં ૩૬ પોઇન્ટ ટાઇપમાં પ્રગટ કરાય છે. શ્રી કલ્પસૂત્રના કર્તા ચૌદપૂર્વવર શ્રુતકેવલી શ્રી ભદ્રવાહુસ્વામીજી છે.

આ સૂત્રના સંપાદનમાં શ્રી. લીંબડી જૈન મંડાર, શ્રી સ્વંભાત શાંતિનાથજી તમ્હપત્રીય જ્ઞાનમંડારની હસ્ત પ્રતો તેમજ જૈન આત્માનંદ સભા, શ્રી. દેવચંદ લાલભાઈ પુસ્તકોદ્ધારક પં.ડ, પં. મફતલાલ જ્ઞવેરચંદ, શ્રાવક ભીમસિંહ માળેક પ્રકાશિત સૂત્રો તથા ટીકાઓનો ઉપયોગી કર્યો છે. ટીકાઓમાં પૂ. શ્રી. વિનય વિજયજી ગણિવર કૃત સુશોધિકા પૂ. ડ શ્રી ધર્મસાગરજી મ. કૃત કિરણાવલી, ડ શ્રી. લક્ષ્મીવલ્લભ ગણિકૃત કલ્પદુમકલિકા પં. શ્રી. સંઘવિજયજી ગણિકૃત પ્રદિપિકા, પં. શ્રી. જયસોમગણિકૃત દીપિકા આદિ નો ઉપયોગ કર્યો છે.

टीकाओ आदिमां रहेला पाठांतरो मेल्लवीने मूलपाठ जोडे कौशमां आपेला छे.

श्री श्रमण संघमां आगमो कंठरथ करवामां, खाध्याय करवामां, विस्तृत टीकाओना वांचन पडी मूलसूत्रोनुं पुनरावर्तन करवामां, मूल सूत्रोना आ संयुक्त संपादन थी घणी अनूकूलता रहेशे. अने अथी होंशे होंशे उत्साही मुनि भगवंतो सूत्रो कंठरथ करीने आगम श्रुतने धारण करवा माटे पण समर्थ बनी शकशे. २, ५, के १०, २० सूत्र कंठरथ करनारा अने पुरतो प्रयत्न थाय तो लगभग अेक लाख श्लोक प्रमाण मूल सूत्रो कंठस्थ करी धारी राखनारा अनेक गणो मुनिवरोमां थइ शकशे. 'ज्ञानधनाः साधवः' 'शास्त्रचक्षुषः साधवः' अे विधान मुजव श्रमण संघना प्राण समान आ आगम सूत्रोनुं' श्री श्रमण भगवंतो द्वारा विशेष परिशीलन थतां श्रीसंघने माटे श्री शासनने माट घणी उज्वलता फेल्लशे अने अे आशयथी स्वपरना श्रेयकारी आगम सूत्रोनां संशोधन संपादनमां अविरत उत्साह प्रवर्तमान छे.

प्रकाशननां मुद्रण माटे श्री साईनाथ टाइपोप्रॉफी प्रिंटींग प्रेस सांताक्रुझ ना व्यवस्थापक श्री तिवारी भाई अे जे खंत अने उत्साह बताव्या छे तेने कारणे आ प्रकाशन सुंदर रीते प्रकाशित थयेल छे.

चरम तीर्थपति श्रमण भगवान महावीर देवे प्रकाशेल जिनवाणीनो प्रभाव पांचमा आराना छेडा सुधी रहेशे. अे ज्वलंत जिनवाणीनो प्रकाश आपणा आत्माने योग्यता अने अधिकार मुजव अजवालनारो बने, जिनवाणीनी उपासनाभक्तिमां भावना पूर्वक रस लइ रह्यो छुं ते भावोल्लास टकी रहे अने सौ श्रुत आराधनामां: उजमाल बनीअे एज मारा अंतरनी शुभ अभिलाषा छे.

वीर सं० २५०२ वि० सं० २०३२

श्रावण सुद ५ शनिवार ता ३१-१-७६

जैन उपाश्रय नवी चाल, भोंवंडी (थाणा) महाराष्ट्र

हालारदेशोद्धारक कविरत्न

पूज्य आचार्यदेव श्रीमदाविजयभमृतसूरीश्वरजी महाराजानो चरणसेवक-

पं० जिनेन्द्रविजय गणी

प्रकाशकीय निवेदन

आमारी ग्रन्थमाला तरफथी आ श्रीमदागमसुधासिन्धु अग्यारमो विभाग मूल प्रगट करतां आनंद अनुभविए छीए. हालमां ४५ आगम मूल अने केटलाक आगम टीका सहित प्रगट करवानुं काम शुरू करतां आ ग्रन्थ सारा आर्ट पेपरमां नागरी लिपी अने ३६ पोइन्ट मोटा टाइपमां प्रगट करेल छे. आ प्रकाशन पूर्वे श्री आगम सुधा सिन्धुना पहिले, बीजो, चौथो, आठमो, बारमो, तेरमो, चौदमो, एम सात विभाग प्रगट थई गया छे. हाल त्रिजा अने छट्टा विभागनुं मुद्रण चाली रह्यु छे. आ ग्रन्थनुं संशोधन संपादन हालारदेशोद्वारक कविरत्न स्व. पू० आचार्यदेव श्रीमद्विजयअमृतसूरीश्वरजी महाराजना शिष्यरत्न पू० पंन्यासश्री जिनेन्द्रविजयजी गगिवरे घणी खंत थी करेल छे. भारे आर्ट कागल, ३६ पोइन्ट टाइपमां छपाइ आदिना कारणे खर्च धार्या करतां वयु थयुं छे. मोटा टाइपमां मुद्रित करतां पेज पण वधारे थया छे. परंतु टकवानी अने अभ्यासनी दृष्टिए अनुकुलता रहेशे. आगम सूत्रोना अधिकारी योगवाही गुरुकुलवासी सुविहित मुनिओ छे. ए शास्त्रविधि मुजब पूज्य श्रमणसंघमां आगम वाचनादिमां अनुकुलता थाय ते रूप आ श्रुतभक्ति करतां अमे आनंद अनुभविए छीए. आ अग्यारमा विभागमा श्री कल्पसूत्र प्रगट थाय छे. ४५ मूल आगम १४ विभागमां प्रगट थशे. सटीक आगमोमा श्रीमदन्तकृदशा, श्रीमदनुत्तरोपपातिकदशा अने श्रीमदुपासकदशा सूत्र तैयार थइ गया छे. मुद्रण माटे श्री साईनाय टाईपोग्राफीना व्यवस्थापके सारी खंत राखी छे ते माटे तेमनो आभार मानीअे छीअे.

वीर संवत् २५०२ वि० स० २०३२

श्रावण सुद ६ रविवार ता. १-८-७६

लि:-

महेता मगनलाल चत्रभुज, शाह कानजी हीरजी

अनुक्रमणिका

॥ १ ॥ प्रथमं वाच्यम् ॥

१	श्रीमहावीरजिनेन्द्रचरित्रम्	१
२	श्रीपार्श्वनाथजिनेन्द्रचरित्रम्	७०
३	श्रीनेमिनाथजिनेन्द्रचरित्रम्	७७
४	अन्तराणि	८२

श्रीऋषभदेवजिनेन्द्रचरित्रम्

८६

॥ २ ॥ द्वितीयं वाच्यम् ॥

स्थविरावली

९३

॥ ३ ॥ तृतीयं वाच्यम् ॥

सामाचारी

१०९

॥ शुद्धिपत्रकम् ॥

पृष्ठं	पंक्तिः	अशुद्धं	शुद्धम्
११२	५	अणगा-रअं	अणगारिअं
२११	२	आसढसुद्धस्स	आसाढसुद्धस्स
१६११	७	जोईसाणं	जोईसाणं
१७११	१	माहकुंडगामे	माहणकुंडगामे
२११२	७	ल-	लड-
३४१२	४	खचियन्व	खचियन्वे
४११२	३	इसे	इमे
४११२	६	खत्तियागि	खत्तियाणिण
४८११	५	ववणी-दोहला	ववणीय-दोहला
४८११	७	रहणं	सुहेणं
५४११	१	कोरस्सामा	करिस्सामो
२७११	४	दवे !	देवे !
६५११	५	रयहि	रयणि

पृष्ठं	पंक्तिः	अशुद्धं	शुद्धम्
६७११	१	पसित्ता	पासित्ता
७२१२	३	उल्लीणे	अल्लीणे
८११२	७	वाससहस्स	वाससहरसरस
८२१२	४	सन्वादुक्खप्पहीणस्स	सन्वदुक्खप्पहीणस्स
८६१२	७	सागरोवमा-	सागरोवम-
८८११	२	सस्स	तस्स
८८११	२	उसभेइ	उसभेइ
८८११	६	वासमणे	वसमाणे
९४१२	४	गायमे	गोयमे
९७१२	१	अज्जपोमिल्लओ	अज्जपोमिल्लओ
९७१२	२	अज्जयंताओ	अज्जजयंताओ
१०४११	१	विज्ज	विज्जा-
१०६११	६	कुच्छसज्जे	कुच्छसगुत्ते

पृष्ठं	पंक्तिः	अशुद्धं	शुद्धम्
१०७११	४	एएसिं	एएसि
१०८१२	५	'हत्थि'	'हत्थि'
११३१२	३	पडिगाहेहि	पडिगाहेह
११५१२	३	ससेइमं	संसेइमं
११८१२	२	निगंथीए	निगंथरस
			निगंथीए
११९११	१	पच्छत्ताइं	पच्छउत्ताइं
१२४११	३	अंडेसुहुमे	अंडसुहुमे
१२५११	४	परि-	पवि-
१२८११	१	इच्छिजा	इच्छिज्जा
१२८११	६	पुच्छित्ता	अणापुच्छित्ता
१२८११	७	जं वा	वा जं वा
१२८१२	६	पासवणं	पासवणं वा
१२९१२	५	अतं	अतं

अहम्

श्रुतकेवलियुगप्रधान-श्रीमद्भद्रबाहुस्वामि-प्रणीतं

॥ श्रीकल्पसूत्रम् ॥



णमो अरिहंताणं, णमो सिद्धाणं, णमो आयरियाणं, णमो
उवज्झायाणं, णमो लोए सब्बसाहूणं, एसो पंचनमुक्कारो, सब्बपाव-
प्पणासणो, मंगलाणं च सब्बेसिं पढमं हवइ मंगलं ॥१॥

ते णं काले णं ते णं समए णं समणे भगवं महावीरे पंच
हत्थुत्तरे होत्था ॥

तं जहा-हत्थुत्तराहिं चुए, चइत्ता गब्भं वक्कंते, हत्थुत्तराहिं
गब्भाओ गब्भं साहरिए, हत्थुत्तराहिं जाए, हत्थुत्तराहिं मुंडे भवित्ता
अगाराओ अणगारिअं पव्वइए, हत्थुत्तराहिं अणंते, अणुत्तरे, निव्वा-
घाए, निरावरणे, कसिणे, पडिपुण्णे, केवलवर-नाणदंसणे समुप्पन्ने,
साइणा परिनिव्वुए भयवं ॥ सूत्रं १ ॥

ते णं काले णं ते णं समए णं समणे भगवं महावीरे जे से गिम्हाणं
चउत्थे मासे अट्टमे पक्खे आसाढसुद्धे तस्स णं आस^१ढसुद्धस्स छट्ठी
पक्खे णं महाविजय-पुप्फुत्तर-पवर-पुण्डरीआओ महाविमाणाओ वीसं
सागरोवम-ट्टिइआओ आउक्खएणं, भवक्खएणं, ठिइक्खएणं, अणंतरं
चयं चइत्ता, इहेव जंबुद्दीवे दीवे भारहे वासे दाहिणइढभरहे इमीसे
ओसप्पिणीए सुसमसुसमाए समाए विइक्कंताए, सुसमाए समाए
विइक्कंताए, सुसमदुस्समाए समाए विइक्कंताए, दुस्समसुसमाए

समाए बहुविडकंताए सागरोवम-कोडाकोडीए बायालीसाए वाससह-
 स्सेहिं ऊणिआए पंचहत्तरीए वासेहिं अद्धनवमेहि अ मासेहिं सेसेहिं
 इक्कवीसाए तित्थयरेहिं इक्खागकुल-समुप्पन्नेहिं कासवगुत्तेहिं, दोहिअ
 हरिवंसकुल-समुप्पन्नेहिं गोयमसगुत्तेहिं, तेवीसाए तित्थयरेहिं विडकं-
 तेहिं समणे भगवं महावीरे चरमतित्थयरे पुव्वतित्थयर-निदिट्ठे माहण-
 कुण्डगामे नयरे उसभदत्तस्स माहणस्स कोडालसगुत्तस्स भारिआए
 देवाणंदाए माहणीए जालंधरसगुत्ताए पुव्वरत्ता-वरत्त-कालसमयंसि

हत्थुत्तराहिं नक्खत्तेणं जोगमुवागएणं आहारवक्कंतीए भववक्कंतीए
सरीरवक्कंतीए कुच्चिंसि गब्भताए वक्कंते ॥ सू. २ ॥

समणे भगवं महावीरे तिन्नाणोवगए आवि होत्था, चइस्सामि
त्ति जाणइ, चयमाणे न जाणइ, चुएमि त्ति जाणइ, जं रयणिं च णं
समणे भगवं महावीरे देवाणंदाए माहणीए जालंधरसगुत्ताए कुच्चिंसि
गब्भत्ताए वक्कंते, तं रयणिं च णं सा देवाणंदा माहणी सयणिज्जंसि
सुत्तजागरा ओहीरमाणी ओहीरमाणी इमे एयारूवे, उराले, कल्लाणे,

सिवे, धन्ने, मंगल्ले सस्सिरीए चउदस महासुमिणे पासित्ता णं
पडिबुद्धा ॥ सू. ३ ॥

तं जहा-गय-वसह-सीह-अभिसेय-दाम-ससि-दिणयरं झयं कुंभं ।
पउमसर-सागर-विमाण-भवन-रयणुच्चय-सिहिं च ॥१॥ सू. ४ ॥

तएणं सा देवाणंदा माहणी इमे एयारूवे उराले जाव चउदस
महासुमिणे पासित्ता णं पडिबुद्धा समाणी हट्टतुट्ट-चित्त-माणंदिआ,
पीडमणा, परम-सोमणसिया, हरिस-वस-विसप्पमाण-हिअया, धारा-

हय-कयंब-पुष्पगं (कलंबगं) पिव समुस्ससिअ-रोमकूवा, सुमिणुग्गहं
करेइ । सुमिणुग्गहं करित्ता सयणिज्जाओ अब्भुट्ठेइ, अब्भुट्ठित्ता
अतुरिअ-मचवल-मसंभंताए अविलंबियाए रायहंस-सरिसीए गर्इए
जेणेव उसभदत्ते माहणे तेणेव उवागच्छइ, उवागच्छित्ता उसभदत्तं
माहणं जएणं विजएणं बद्धावेइ, बद्धावित्ता भद्दा(सुहा)सण-वरगया
आसत्था वीसत्था सुहासण-वरगया करयलपरिग्गहियं दसनहं सिर-
सावत्तं मत्थए अंजलिं कट्टु एवं वयासी ॥ सू. ५ ॥

एवं खलु अहं देवाणुप्पिया ! अज्ज सयणिज्जंसि सुत्तजागरा
ओहीरमाणी ओहीरमाणी इमे एयारूवे उराले जाव सस्सिरीए
चउद्दस महासुमिणे पासित्ता णं पडिबुद्धा । तं जहा-गय जाव सिहिं
च ॥१॥सू. ६॥ एएसिं णं देवाणुप्पिआ ! उरालाणं जाव चउद्दसण्हं
महासुमिणाणं के मण्णे कल्लाणे फलवित्ति-विसेसे भविस्सइ ? तए णं
से उसभदत्ते माहणे देवाणंदाए माहणीए अंतिए एअमट्ठं सुच्चा
निसम्म हट्टतुट्ट जाव हिअए धाराहय-कयंबपुप्फगं पिव समुस्ससिय-

रोमकूवे सुमिणुग्गहं करेइ, करित्ता ईहं अणुपविसइ, इहं अणुपविसित्ता
अप्पणो साहाविएणं मइपुव्वएणं बुद्धिविण्णाणेणं तेसिं सुमिणाणं
अत्थुग्गहं करेइ, अत्थुग्गहं करित्ता देवाणंदं माहणिं एवं वयासी
॥सू. ७॥ उराला णं तुमे देवाणुप्पिए, सुमिणा दिट्ठा, कल्लाणा णं
सिवा धन्ना मंगल्ला सुस्सिरीआ आरुग्गतुट्ठि-दीहाउ-कल्लाण-मंगल्ल-
कारगा णं तुमे देवाणुप्पिए, सुमिणा दिट्ठा, तं जहा-अत्थलाभो
देवाणुप्पिए, भोगलाभो देवाणुप्पिए, पुत्तलाभो देवाणुप्पिए, सुक्ख-

लाभो देवाणुप्पिए, एवं खलु तुमं देवाणुप्पिए, नवण्हं मासाणं
 बहुपडिपुन्नाणं अद्धट्टमाण-राइंदिआणं विइक्कंताणं सुकुमाल-पाणि-
 पायं अहीण-पडिपुण्ण-पंचिंदिअ-सरीरं लक्खण-वंजण-गुणोववेअं
 माणुम्माण-पमाण-पडिपुन्न-सुजाय-सव्वंग-सुंदरंगं ससि-सोमाकारं कंतं
 पिअदंसणं सुरूवं (देवकुमारोवमं) दारयं पयाहिसि ॥सू.८॥ से वि
 अ णं दारए उम्मंक्क-बालभावे विन्नाय-परिणय-मित्ते जोव्वणग-
 मणुप्पत्ते रिउव्वेअ-जउव्वेय-सामवेअ-अथव्वणवेअ-इतिहासपंचमाणं

निग्घंटुछट्टाणं संगोवंगाणं सरहस्साणं चउण्हं वेआणं सारए वारए
धारए सडंगवी, सट्टितंत-विसारए संखाणे [सिक्खाणे] सिक्खाकप्पे
वागरणे छंदे निरुत्ते जोइसामयणे अन्नेसु अ बहुसु बंभण्णएसु परिव्वा-
यएसु नएसु सुपरिनिट्टिए आवि भविस्सइ ॥सू.९॥ तं उराला णं तुमे
देवाणुप्पिए ! सुमिणा दिट्ठा, जाव आरुग्ग-तुट्टि-दीहाउअ-मंगल्ल-
कारगा णं तुमे देवाणुप्पिए ! सुमिणा दिट्ट ति कट्टु भुज्जो भुज्जो
अणुवुहइ ॥सू. १०॥ तए णं सा देवाणंदा माहणी उसभदत्तस्स

माहणस्स अंतिए एअमट्टं सुच्चा निसम्म हट्टतुट्ट जाव हिअया
 करयल-परिग्गाहिअं दसनहं सिरसावत्तं मत्थए अंजलिं कट्टु
 उसभदत्तं माहणं एवं वयासी ॥सू. ११॥ एवमेअं देवाणुप्पिआ !
 तहमेअ देवाणुप्पिआ ! अवितहमेअं देवाणुप्पिआ ! असंदिद्धमेअं
 देवाणुप्पिआ ! ईच्छिअमेअं देवाणुप्पिया ! पडिच्छिअमेअं देवाणुप्पिया !
 इच्छिअ-पडिच्छिअमेअं देवाणुप्पिया ! सच्चे णं एस अट्टे से जहेयं
 तुब्भे वयह त्ति कट्टु ते सुमिणे सम्मं पडिच्छइ, पडिच्छित्ता

उसभदत्तेणं माहणेणं सद्धिं उरालाइं माणुस्सगाइं भोगभोगाइं
भुंजमाणा विहरइ ॥सू. १२॥ ते णं काले णं ते णं समए णं, सक्के
देविंदे देवराया, वज्जपाणी, पुरंदरे, सयक्कउ, सहस्सक्खे, मघवं,
पागसासणे, दाहिणडुलोगाहिवई, एरावणवाहणे, सुरिंदे, बत्तीस-
विमाण-सयसहस्साहिवई, अरयंबर-वत्थधरे, आलइअ-मालमउडे,
नव-हेम-चारु-चित्त-चंचल-कुण्डल-विलिहिज्जमाण-गल्ले, महिड्डीए,
महज्जुईए, महब्बले महायसे, महाणुभावे, महासुक्खे भासुरबाँदी,

पलंब-वणमालधरे, सोहम्मे कप्पे, सोहम्मवडिंसए विमाणे सुहम्माए
 सभाए, सक्कंसि सीहासणंसि, से णं तत्थ वत्तीसाए विमाणावास-सय-
 साहस्सीणं, चउरासीए सामाणिअ-साहस्सीणं, तायत्तीसाए तायत्ती-
 सगाणं, चउण्हं लोगपालाणं, अट्टण्हं अग्गमहिसीणं सपरिवाराणं,
 तिण्हं परिसाणं, सत्तण्हं अणिआणं सत्तण्हं अणियाहिवर्डणं, चउण्हं
 चउरासीणं आयरक्ख-देवसाहस्सीणं, अन्नेसिं च बहूणं सोहम्मकप्प-
 वासीणं वेमाणिआणं देवाणं देवीण य, आहेवच्चं पोरेवच्चं सामित्तं

भट्टित्तं महत्तरगतं आणा-ईसर-सेणावच्चं कारेमाणे पालेमाणे,
महयाहय-नट्ट-गीअ-वाइअ-तंती-तलताल-तुडिअ-घणमुइंग-पडुपडह-
वाइअ-रवेणं दिव्वाइं भोगभोगाइं भुंजमाणे विहरइ ॥सू.१३॥

इमं च णं केवलकप्पं जंबुदीवं दीवं विउलेणं ओहिणा आभोए-
माणे आभोएमाणे विहरइ । तत्थ णं समणं भगवं महावीरं जंबुदीवे
दीवे, भारहे वासे, दाहिणडुभरहे, माहणकुंडग्गामे नयरे, उसभदत्तस्स
माहणस्स कोडालसगुत्तस्स भारियाए देवाणंदाए माहणीए जालंधर-

सगुत्ताए कुच्छिसिं गब्भत्ताए वक्कंतं पासइ, पासित्ता हट्ट-तुट्ट-
चित्तमाणंदीए, नंदिए, परमाणंदिए, पीइमणे परम-सोमणस्सिए,
हरिसवस-विसप्पमाण-हिअए, धराहयकयंब-सुरहिकुसुम-चंचुमाल-
इअ-ऊससिअ-रोमकूवे, विअसिअ-वर-कमलाणण-नयणे, पयलिअ-वर-
कडग-तुडिअ-केऊर-मउड-कुंडल-हार-विरायंत-वच्छे, पालम्ब-पलं-
बमाण-घोलंत-भूसणधरे, ससंभमं तुरिअं चवलं सुरिंदे सीहासणाओ
अब्भुट्टेइ, अब्भुट्टित्ता पायपीठाओ पच्चोरुहइ, पच्चोरुहित्ता वेरुलिअ-

वरिद्व-रिद्व-अंजण-निउणोवचिअ-मिसिमिसित-मणिरयण-मण्डिआओ
पाउआओ ओमुअइ, ओमुइत्ता एगसाडिअं उत्तरासंगं करेइ, करित्ता
अंजलि-मउलिअग्गहत्थे तित्थयराभिमुहे सत्तद्वपयाइं अणुगच्छइ,
अणुगच्छित्ता वामं जाणुं अंचेइ, अंचित्ता दाहिणं जाणुं धरणितलंसि
साहट्टु तिक्खुत्तो मुद्धाणं धरणितलंसि निवेसेइ, निवेसित्ता ईसिं
पच्चुन्नमइ, पच्चुन्नमित्ता कडग-तुडिअ-थंभिआओ भुआओ साहरइ,
साहरित्ता करयल-परिग्गहिअं दसनहं सिरसावत्तं मत्थए अंजलिं

कट्टु एवं वयासी ॥ नमुत्थु णं अरिहंताणं भगवंताणं, आइगराणं,
 तित्थयराणं, सयं-संबुद्धाणं पुरिसुत्तमाणं, पुरिस-सीहाणं, पुरिसवर-
 पुंडरीआणं, पुरिसवर-गंधहत्थीणं, लोगुत्तमाणं, लोगनाहाणं, लोग-
 हिआणं, लोगपर्इवाणं लोग-पज्जोअगराणं, अभयदयाणं, चक्खुद-
 याणं, मग्गदयाणं, सरणदयाणं, जीवदयाणं, [बोहिदयाणं] धम्मद-
 याणं, धम्मदेसयाणं, धम्मनायगाणं, धम्मसारहीणं, धम्मवर-चाउरंत-
 चक्कवट्ठीणं, दीवो ताणं सरणं गर्इ पइट्ठा, अप्पडिहय-वर-नाण-

दंसण-धराणं, विअट्ट-च्छउम्माणं, जिणाणं, जावयाणं, तिन्नाणं,
तारयाणं, बुद्धाणं, बोहयाणं, मुत्ताणं, मोअगाणं, सब्बन्नूणं,
सब्बदरिसीणं सिव-मयल-मरुअ-मणंत-मक्खय-मव्वाबाह-मपुणरावि-
त्ति-सिद्धिगइ-नामधेयं, ठाणं सम्पत्ताणं, नमो जिणाणं जिअ-भया-
णं । नमुत्थु णं समणस्स भगवओ महावीरस्स आइगरस्स चरम-
तित्थयरस्स पुव्वतित्थयर-निद्धिट्ठस्स जाव सम्पाविउ-कामस्स । वंदामि
णं भगवन्तं तत्थगयं इह गए, पासउ मे भगवं तत्थ गए इह गयं

त्ति कट्टु समणं भगवं महावीरं वन्दइ नमंसइ, वंदित्ता नमंसित्ता
सीहासणवरंसि पुरत्थाभिमुहे सन्निसण्णे, तए णं तस्स सक्कस्स देवि-
न्दस्स देवरन्नो अयमेयारूवे अब्भत्थिए चित्तिए पत्थिए मणोगए
संकप्पे समुप्पज्जित्था ॥सू.१४-१५॥

न खलु एयं भूयं, न एयं भव्वं, न एयं भविस्सं, जन्नं अरिहंता
वा चक्कवट्ठी वा बलदेवा वा वासुदेवा वा अंतकुलेसु वा पंतकुलेसु वा
तुच्छकुलेसु वा दरिद्वकुलेसु वा किवणकुलेसु वा भिक्खायरकुलेसु वा

माहणकुलेसु वा, आयाइंसु वा, आयाइंति वा, आयाइस्संति वा
॥सू.१६॥ एवं खलु अरिहंता वा चक्कवट्ठी वा बलदेवा वा वासुदेवा
वा, उग्गकुलेसु वा, भोगकुलेसु वा, रायन्नकुलेसु वा, इक्खागकुलेसु
वा, खत्तियकुलेसु वा, हरिवंसकुलेसु वा, अन्नयरेसु वा तहप्पगारेसु
वा, विसुद्ध-जाइ-कुल-वंसेसु वा आयाइंसु वा आयाइंति वा आया-
इस्संति वा ॥सू.१७॥ अत्थि पुण एसे वि भावे लोणच्छेरय-भुए
अणंताहिं उस्सप्पिणीहिं ओसप्पिणीहिं विइक्कंताहिं समुप्पज्जइ, (ग्रन्थाग्रं

१००) नामगुत्तस्स वा कम्मस्स अक्खीणस्स, अवेइअस्स, अणि-
 ज्जिण्णस्स उदएणं । जन्नं अरिहंता वा, चक्खवट्ठी वा बलदेवा वा,
 वासुदेवा वा अन्तकुलेसु वा, पन्तकुलेसु वा, तुच्छ-दरिद-किविण-
 भिक्खाग-माहणकुलेसु वा, आयाइंसु वा, आयाइंति वा, आयाइस्संति
 वा, कुच्छिसि गब्भत्ताए वक्कमिंसु वा, वक्कमंति वा, वक्कमिस्संति वा,
 नो चेव णं जोणी-जम्मण-निक्खमणेणं निक्खमिंसु वा, निक्खमंति
 वा, निक्खमिस्संति वा ॥सू.१८॥ अयं च णं समणे भगवं महावीरे

जंबुद्वीवे द्वीवे भारहे वासे माहण-कुण्डगामे नयरे उसभदत्तस्स
माहणस्स कोडालसगुत्तस्स भारियाए देवाणंदाए माहणीए जालंधरस-
गुत्ताए कुच्छिसि गब्भत्ताए वक्कन्ते ॥ तं जीअमेअं तीअ-पच्चुप्पन्न-
मणागयाणं सक्काणं देविंदाणं देवरायाणं, अरिहंते भगवंते तहप्पगारेहितो
अन्तकुलेहितो पन्तकुलेहितो तुच्छकुलेहितो दरिद्वकुलेहितो भिक्खाग-
कुलेहितो किविणकुलेहितो वा, माहणकुलेहितो वा, तहप्पगारेसु
उग्गकुलेसु वा, भोगकुलेसु वा, रायन्नकुलेसु वा, नायकुलेसु वा खत्तिअ-

कुलेसु वा हरिवंसकुलेसु वा, अन्नयरेसु वा तहप्पगारेसु विसुद्ध-
जाइ-कुल-वंसेसु जाव रज्जसिरिं कारेमाणेसु पालेमाणेसु साहरा-
वित्तए । तं सेयं खलु मम वि समणं भगवं महावीरं चरमतित्थयरं
पुव्वतित्थयर-निदिट्ठं, माहणकुण्डग्गामाओ नयराओ उसभदत्तस्स
माहणस्स भारियाए देवाणंदाए माहणीए जालंधरसगुत्ताए कुच्छिओ
खत्तिअकुंडग्गामे नयरे नायाणं खत्तिआणं सिद्धत्थस्स खत्ति-
अस्स कासवगुत्तस्स भारियाए तिसलाए खत्तिआणीए^{६६} वासिट्ठस-

गुत्ताए कुच्छिसि गब्भत्ताए साहरावित्तए, जे वि अ णं से तिसलाए
खत्तिआणीए गब्भे तं वि अ णं देवाणंदाए माहणीए जालंधरस-
गुत्ताए कुच्छिसि गब्भत्ताए साहरावित्तए त्ति कट्टु एवं संपेहेइ,
संपेहित्ता हरिणेगमेसिं पाइत्ताणि (अग्गाणी) आहिवइं देवं सदावेइ
सदावित्ता एवं वयासी ॥सू. १९-२०॥

एवं खलु देवाणुप्पिआ ! न एअं भूअं, न एअं भव्वं, न एअं
भविस्सं । जन्नं अरिहंता वा, चक्कवट्ठी वा, बलदेवा वा, वासुदेवा वा,

अन्तकुलेसु वा, पन्तकुलेसु वा, तुच्छकुलेसु वा, दरिद्रकुलेसु वा,
 किविणकुलेसु वा, भिक्खागकुलेसु वा, माहणकुलेसु वा आयाइंसु वा
 आयाइंति वा आयाइस्संति वा । एवं खलु अरिहंता वा, चक्कवट्ठी
 वा, बलदेवा वा, वासुदेवा वा, उग्गकुलेसु वा, भोगकुलेसु वा,
 राइन्नकुलेसु वा, नायकुलेसु वा, खत्तिअकुलेसु वा, इक्खागकुलेसु
 वा, हरिवंसकुलेसु वा, अन्नयरेसु वा, तहप्पगारेसु विसुद्ध-जाइ-कुल-
 वंसेसु आयाइंसु वा, आयाइंति वा, आयाइस्संति वा ॥सू.२१॥

अत्थि पुण एसे वि भावे लोणच्छेरयभूए अणंताहिं उस्सप्पिणी-
ओसप्पिणीहिं विइकंताहिं समुप्पज्जइ नामगुत्तस्स वा कम्मस्स
अक्खीणस्स अवेइअस्स अणिज्जिण्णस्स उदएणं । जन्नं अरिहंता वा
चक्कवट्ठी वा बलदेवा वा, वासुदेवा वा, अंतकुलसु वा, पंतकुलेसु वा,
तुच्छकुलेसु वा, दरिदकुलेसु वा, भिक्खागकुलेसु वा, किविणकुलेसु
वा, माहणकुलेसु वा, आयाइंसु वा, आयाइंति वा, आयाइस्संति वा ।
कुच्छिसि गब्भत्ताए वक्कमिसु वा, वक्कमंति वा, वक्कमिसंति वा, नो

चेव णं जोणी-जम्मण-निक्खमणेणं निक्खमिंसु वा, निक्खमंति वा,
 निक्खमिस्संति वा ॥सू.२२॥ अयं च णं समणे भगवं महावीरे
 जंबुद्दीवे दीवे भारहे वासे माहणकुंडग्गामे नयरे उसभदत्तस्स माहण-
 स्स कोडालसगुत्तस्स भारिआए देवाणंदाए माहणीए जालंधरस-
 गुत्ताए कुच्छिसि गब्भत्ताए वक्कंते ॥सू.२३॥ तं जीअमेअं तीअ-
 पच्चुप्पण्ण-मणागयाणं सक्काणं देविंदाणं देवरायाणं अरिहंते भगवंते
 तहप्पगारेहंतो अंतकुलेहंतो पंतकुलेहंतो तुच्छकुलेहंतो दरिद-

कुलेहितो किविणकुलेहितो वणीमगकुलेहितो माहणकुलेहितो तहप्प-
गारेसु उग्गकुलेसु वा, भोगकुलेसु वा, रायन्नकुलेसु वा, नायकुलेसु
वा, खत्तिअकुलेसु वा इक्खागकुलेसु वा हरिवंसकुलेसु वा, अन्नयरेसु
वा तहप्पगारेसु विसुद्ध-जाइ-कुल-वंसेसु साहरावित्तए ॥सू.२४॥ तं
गच्छ णं तुमं देवाणुप्पिए ! समणं भगवं महावीरं माहणकुंड-
ग्गामाओ नयराओ उसभदत्तस्स माहणस्स कोडालसगुत्तस्स भारि-
याए देवाणंदाए माहणीए जालंधरसगुत्ताए कुच्छिओ खत्तिअकुंड-

गामे नयरे नायाणं खत्तिआणं सिद्धत्थस्स खत्तिअस्स कासव-
 गुत्तस्स भारियाए तिसलाए खत्तिआणीए वासिट्ठसगुत्ताए कुच्छिसि
 गब्भत्ताए साहराहि । जे वि अ णं से तिलसाए खत्तिआणीए गब्भे
 तं पि अ णं देवाणंदाए माहणीए जालंधरसगुत्ताए कुच्छिसि
 गब्भत्ताए साहराहि, साहरित्ता मम एअमाणत्तिअं खिप्पामेव
 पच्चप्पिणाहि ॥सू. २५॥

तए णं से हरिणेगमेसी पायत्ताणिआहिवई देवे सक्केणं देविं देणं

देवरन्ना एवं वुत्ते समाणे हट्ट जाव हिअए करयल जाव त्ति कट्टु
'एवं जं देवो आणवेइ' त्ति आणाए विणएणं वयणं पडिसुणेइ,
पडिसुणित्ता सक्कस्स देविंदस्स देवरन्नो अंतिआओ पडिनिक्खमइ
पडिनिक्खमित्ताः उत्तरपुरत्थिमं दिसीभागं अवक्कमइ, अवक्कमित्ता
वेउव्विअ-समुग्घाएणं समोहणइ, समोहणित्ता संखिज्जाइं जोअणाइं
दंडं निसिरइ, तं जहा-रयणाणं, वयरणं, वेरुलिआणं, लोहिअक्खाणं,
मसारगह्हाणं, हंसगब्भाणं, पुलयाणं, सोगंधिआणं, जोई^ससाक्कणं,

अंजणाणं, अंजणपुल्याणं, जायरूवाणं, सुभगाणं, अंकाणं, फलि-
हाणं, रिद्धाणं, अहावायरे पुग्गले परिसाडेइ, परिसाडित्ता अहासुहुमे
पुग्गले परिआइए (परिआदियइ) ॥सू.२६॥ परिआइत्ता दुच्चंपि
वेउव्विअ-समुग्घाएणं समोहणइ, समोहणित्ता उत्तर-वेउव्विअं रूवं
विउव्वइ, विउव्वित्ता ताए उक्किट्ठाए, तुरिआए, चवलाए, चंडाए,
जयणाए, उद्धुआए, सिग्घाए, (छेआए) दिव्वाए, देवगईए, वीई-
वयमाणे वीईवयमाणे तिरिअ-मसंखिज्जाणं दीवसमुद्दाणं मज्झं

मज्झेणं जेणेव जंबुद्वीवे भारहे वासे जेणेव माहकुंडगामे नयरे
जेणेव उसभदत्तस्स माहणस्स गिहे जेणेव देवाणंदा माहणी तेणेव
उवागच्छइ, उवागच्छित्ता आलोए समणस्स भगवओ महावीरस्स
पणामं करेइ, पणामं करित्ता देवाणंदाए माहणीए सपरिजणाए
ओसोवणिं दलइ, दलित्ता असुहे पुग्गले अवहरइ, अवहरित्ता सुभे
पुग्गले पक्खिवइ, पक्खिवित्ता 'अणुजाणउ मे भयवं' ति कट्टु
समणं भगवं महावीरं अब्वाबाहं अब्वाबाहेणं दिव्वेणं पहावेणं

करयलसंपुडेणं गिण्हइ, करयलसंपुडेणं गिण्हित्ता जेणेव खत्तिअ-
 कुंडग्गामे नयरे जेणेव सिद्धत्थस्स खत्तिअस्स गिहे जेणेव तिसला
 खत्तिआणी तेणेव उवागच्छइ, उवागच्छित्ता तिसलाए खत्तिआणीए
 सपरिजणाए ओसोवणिं दलइ, दलित्ता असुहे पुग्गले अवहरइ,
 अवहरित्ता सुहे पुग्गले पक्खिवइ, पक्खिवित्ता समणं भगवं
 महावीरं अब्वाबाहं अब्वाबाहेणं दिव्वेणं पहावेणं तिसलाए खत्तिआ-
 णीए कुच्छिसि गब्भत्ताए साहरइ, जे वि अ णं से तिसलाए

खत्तिआणीए गब्भे तं पि अ णं देवाणंदाए माहणीए जालंधरस-
गुत्ताए कुच्चिसि गब्भत्ताए साहरइ, साहरित्ता जामेव दिसिं
पाउब्भूए तामेव दिसिं पडिगए ॥सू. २७॥ ताए उक्किट्टाए, तुरियाए,
चवलाए, चंडाए, जयणाए, उद्धुआए, सिग्घाए, दिब्वाए, देवगइए,
तिरिअ-मसंखिज्जाणं दीवसमुद्दाणं मज्झंमज्झेणं जोअण-सयसाह-
स्सिएहिं विग्गहेहिं उप्पयमाणे जेणामेव सोहम्मे कप्पे सोहम्म-
वडिंसए विमाणे, सक्कंसि सीहासणंसि, सक्के देविंदे देवराया, तेणामेव

उवागच्छइ, उवागच्छित्ता सक्कस्स देविंदस्स देवरन्नो एअमाणत्तिअं
 खिप्पामेव पच्चप्पिणइ ॥सू.२८॥ तेणं कालेणं तेणं समएणं समणे
 भगवं महावीरे जे से वासाणं तच्चे मासे पंचमे पक्खे आसोअबहुले
 तस्स णं आसोअबहुलस्स तेरसीपक्खेणं बासीइ राइंदिएहिं विइक्कं-
 तेहिं तेसीइमस्स राइंदिअस्स अंतरा वट्टमाणे(णस्स) हिआणुकंपएणं
 देवेणं हरिणेगमेसिणा सक्कवयण-संदिट्ठेणं माहणकुंडग्गामाओ नयराओ
 उसभदत्तस्स माहणस्स कोडालसगुत्तस्स भारिआए देवाणंदाए

माहणीए जालंधरसगुत्ताए कुच्छीओ खत्तिअकुंडग्गामे नयरे नायाणं
खत्तिआणं सिद्धत्थस्स खत्तिअस्स कासवगुत्तस्स भारिआए तिसलाए
खत्तिआणीए वासिट्ठसगुत्ताए पुव्वरत्ता-वरत्त-कालसमयंसि हत्थुत्तराहिं
नक्खत्तेणं जोग-मुवागएणं अब्बाबाहं अब्बाबाहेणं दिव्वेणं पहावेणं
कुच्छिसि गब्भत्ताए साहरिए ॥सू.२९॥ ते णं काले णं ते णं समएणं
समणे भगवं महावीरे तिन्नाणोवगए आवि होत्था, साहरिज्जिस्सामि त्ति
जाणइ, साहरिज्जमाणे नो जाणइ, साहरिएमि त्ति जाणइ ॥सू.३०॥

जं रयणिं च णं समणे भगवं महावीरे देवाणंदाए माहणीए
 जालंधरसगुत्ताए कुच्छिओ तिसलाए खत्तिआणीए वासिट्ठसगुत्ताए
 कुच्छिसि गब्भत्ताए साहरिए, तं रयणिं च णं सा देवाणंदा माहणी
 सयणिज्जांसि सुत्तजागरा ओहीरमाणी ओहीरमाणी इमे एआरूवे
 उराले जाव चउद्दसमहासुमिणे तिसलाए खत्तिआणीए हडे पासित्ता
 णं पडिबुद्धा । तं जहा-गय वसह जाव सिहिं च-गाहा ॥सू. ३१॥
 जं रयणिं च णं समणे भगवं महावीरे देवाणंदाए माहणीए

जालंधरसगुत्ताए कुच्छिओ तिसलाए खत्तिआणीए वासिट्ठसगुत्ताए
कुच्छिसि गब्भत्ताए साहरिए, तं रयणिं च णं सा तिसला
खत्तिआणी तंसि तारिसगांसि वासघरंसि अब्भितरओ सचित्त-कम्मे,
बाहिरओ दूमिअ-घट्टे मट्टे, विचित्त-उल्लोअ-चिह्णिए-तले मणि-रयण-
पणासिअंधयारे, बहुसम-सुविभत्त-भूमिभागे, पंचवन्न-सरस-सुरहि-
मुक्क-पुप्फ-पुंजोवयार-कलिए, कालागुरु-पवर-कुंदुरुक्क-तुरुक्क-डज्झंत-
धूव-मघमघंत-गंधुद्धुआभिरामे, सुगंध-वरगंधिए, गंधवट्ठिभूए, तंसि

तारिसगंसि वासघरंसि सयणिज्जंसि सालिंगण-वट्टिए, उभओ विब्बो-
 अणे, उभओ उन्नए, मज्झे णयगंभीरे, गंगा-पुलिण-वालुआ-उद्दाल-
 सालिसए, उवचिअ-खोमिअ-दुगुल्ल-पट्ट-पडिच्छन्ने, सुविरइअ-रयत्ताणे,
 रत्तंसुअ-संवुडे, सुरम्मे, आइण-गरुअ-बूर-नवणीय-तूल-तुल्ल-फासे,
 सुगन्ध-वर-कुसुम-चुन्न-सयणोवयार-कलिए, पुब्बरत्ता-वरत्त-कालसम-
 यंसि सुत्तजागरा ओहीरमाणी ओहीरमाणी इमे एयारूवे उराले
 जाव चउद्दस महासुमिणे पासित्ता णं पडिबुद्धा, तं जहा-गय १

वसह २ सीह ३ अभिसेअ, ४ दाम ५ ससि ६ दिणयरं ७ झयं ८
कुंभं ९ । पउमसर १० सागर ११ विमाण १२ भवण १२
रयणुच्चय १३ सिहिं च १४ ॥सू. ३२॥

तए णं सा तिसला खत्तिआणी तप्पढमयाए, [तओ अ] चउदंत-
उसिअ-गलिअ-विपुल-जलहर-हार-निकर-खीरसागर-ससंककिरण-दग-
रय-रयय-महासेल-पंडुरं समागय-महुअर-सुगंध-दाण-वासिअ-कपोल-
मूलं, देवराय कुंजर(रं व)-वरप्पमाणं, पिच्छइ, सजल-घण-विपुल-जलहर-

गज्जिअ-गंभीर-चारुघोसं, इभं, सुभं, सब्ब-लक्खण-कयंविअं वरोरुं

॥सू. ३३ ॥

तओ पुणो धवल-कमलपत्त-पयराइरेग-रूवप्पभं, पहा-समुद-
ओवहारेहिं सब्बओ चेव दीवयंतं, अइसिरि-भर-पिल्लणा--विसप्पंत-
कंत--सोहंत--चारु-ककुहं, तणु-सुद्ध-सुकुमाल-लोम-निद्धच्छविं,
थिरसुबद्ध-मंसलोवचिअ--लट्ठ-सुविभत्त सुंदरंगं, पिच्छइ, घण-वट्ठ
लट्ठ-उक्किट्ठ-विसिट्ठ-तुप्पग्ग-तिकख-सिंगं, दंतं, सिवं, समाण-

सोहंत-सुद्धदंतं, वसहं, अमिअ-गुण-मंगल-मुहं ॥सू. ३४॥

तओ पुणो हारनिकर-खीरसागर-ससंककिरण-दगरयरथय-महा-
सेल-पंडुरतरं(पंडुरंगं)(ग्रंथाग्रं २००)रमणिज्ज-पिच्छणिज्जं,थिर-लट्ठ-
पउट्टंवट्ट-पीवर-सुसिलिट्ट-विसिट्ट-तिक्ख-दाढा-विडंबिअ-मुहं, परि-
कम्मिअ-जच्च-कमल-कोमल-पमाण-सोभंत -लट्ठउट्टं, रत्तुप्पल-पत्त-
मउअ-सुकुमाल-तालु-निल्लालिअग्गजीहं,मूसागय पवर कणग ताविअ-
आवत्तायंत-वट्ट-तडियविमल-सरिस नयणं, विसाल-पीवर-वरोरुं, पडि-

पुन्न-विमल-खंधं, मिउ-विसय-सुहुम-लक्खणपसत्थ-विच्छिन्न-केसरा-
 डोव-सोहिअं. ऊसिअ-सुनिम्मिअ-सुजाय-अप्फोडिअ-लंगूलं, सोमं,
 सोमाकारं, लीलायंतं, नहयलाओ ओवयमाणं, नियग-वयण-मइवयंतं,
 पिच्छइ, सा गाढ-तिकखग्ग-नहं, सीहं वयण-सिरी-पल्लव-पत्त-
 चारु-जीहं ३ ॥ सू. ३५ ॥

तओ पुणो पुन्नचंद-वयणा उच्चागय-ट्टाण-लट्ट-संठिअं, पसत्थ-
 रूवं, सुपइट्टिअ-कणगमय-कुम्मसरिसोवमाण-चलणं, अच्चुण्णय-

पीण-रइअ-मंसल-उवचिअ तणु-तंब-निद्धनहं, कमल-पलास-सुकुमाल-
करचरणं कोमल-वरंगुलिं, कुरुविंदावत्त-वट्टाणुपुव्व-जंघं, निगूढ-जाणुं,
गय-वरकर-सरिस-पीवरोरुं, चामीकर-रइअ-मेहलाजुत्त-कंत-विच्छन्न-
सोणिचक्कं, जच्चंजण-भमर-जलय-पथर-उज्जुअ-सम-सांहिअ-तणुअ-
आइज्ज-लडह-सुकुमाल-मउअ-रमणिज्ज-रोमराइं, नाभीमंडल-सुंदर-
विसाल-पसत्थ-जघणं, करयल-माइअ-पसत्थ-तिवलिअ-मज्झं नाणा-
मणि-कणग-रयण-विमल-महातवणिज्जा-भरण-भूसण-विराइअ-मंगु-

वंगिं, हार-विरायंत-कुंदमाल-परिणद्ध-जलजलित-थणजुअल-विमल-
 कलसं, आइअ-पत्तिअ-विभूसिएणं सुभग-जालुज्जलेणं मुत्ता-कला-
 वएणं उरत्थ-दीणार-माल-विरइएणं कंठमणि-सुत्तएण य कुंडल-
 जुअलुल्लसंत--अंसोवसत्त--सोभंत--सप्पभेणं सोभागुण--समुदएणं
 आणण-कुटुंबिएणं कमलामल-विसाल-रमणिज्ज-लोअणिं, कमल-
 पज्जलंत-कर-गहिअ-मुक्क-तोयं, लीलावाय--कयपक्खएणं सुविसद-
 कसिण-घण-सण्ह--लंबंत--केसहत्थं, पउमइह-कमल-वासिणिं, सिरिं,

भगवद् पिच्छइ, हिमवंत-सेल-सिहरे दिसा-गइंदोरु-पीवर-कराभि-
सिच्चमाणिं ४ ॥ सू. ३६ ॥

तओ पुणो सरस-कुसुम-मंदार-दाम-रमणिज्ज-भूअं, चंपगासोग-
पुन्नाग-नाग-पिअंगु - सिरिस - मुग्गर-मल्लिआ - जाइ - जूहि-अंकोल्ल-
कोज्जकोरिंट-पत्तदमणय-बउल --नवमालिअ--तिलय--वासंतिअ-पउ-
मुप्पल-पाडल-कुंदाइमुत्त-सहकार-सुरभिगंधि,अणुवम-मणोहरेणं गंधेणं
दसदिसाओ वि वासयंतं, सब्बोउअ-सुरभि-कुसुम-मल्ल-धवल-विलसंत-

कतं-बहुवन्न-भक्तिचित्तं, छप्पय-महुअरि-भमरण-गुमगुमायंत-निलिंत-
गुंजंत-देसभागं, दामं, पिच्छइ, नभंगण-तलाओ ओवयंतं ५ ॥ सू. ३ ७ ॥

ससिं च गोखीर-फेण-दगरय-रयय-कलसपंडुरं, सुहं, हिअय-
नयणकंतं, पडिपुण्णं, तिमिर-निकर-घण-गुहिर-वितिमिर-करं,
पमाण-पक्खंत रायलेहं, कुमुअवण-विबोहगं, निसा-सोहगं, सुपरि-
मट्ट-दप्पण-तलोवमं, हंस-पट्टु-वन्नं, जोइसमुह-मंडगं, तमरिपुं, मयण-
सरापूरं समुह-दग-पूरगं, दुम्मणं जणं दइअ-वज्जिअं पाएहिं सोसयंतं,

पुणो सोम-चारुखं, पिच्छइ । सा गगण-मंडल-विसाल-सोम-
चंकम्ममाण-तिलयं, रोहिणि-मण-हिअय-वल्लहं, देवी पुन्नचंदं
समुल्लसंतं ६ ॥सू. ३८॥

तओ पुणो तमपडल-परिप्फुडं चेव तेअसा पज्जलंत-खं, रत्ता-
सोग-पगास-किंसुअ-सुअमुह-गुंजद्ध-राग-सरिसं, कमल-वणालंकरणं,
अंकणं जोइसस्स, अंबरतल-पईवं, हिमपडल-गल्लगहं, गहगणोरु-
नायगं, रत्ति-विणासं, उदयत्थमणेसु मुहुत्त-सुहदंसणं, दुन्निरिक्ख-

रुवं, रतिमुद्धंत-दुप्पयार-प्पमद्वणं, सीअवेग-महणं, पिच्छइ, मेरुगिरि-
 सयय-परिअद्वयं, विसालं, सूरं, रस्सी-सहस्स-पयलिअ-दित्तसोहं,
 ७ ॥सू. ३९॥

तओ पुणो जच्च-कणग-लट्ठि-पइट्ठिअं, समूह-नील-रत्त-पीअ
 सुक्किल-सुकुमालुल्लसिअ-मोरपिच्छ-कय-मुद्धयं, अहिअ-सस्सिरीअं,
 फालिअ-संखंक-कुंद-दगरय-रयय-कलस-पंडुरेण मत्थयत्थेण सीहेण
 रायमाणेण रायमाणं भित्तुं गगणतल-मंडलं चेव ववसिएणं पिच्छइ,

सिव-मउअ-मारुअ-लयाहय-कंपमाणं, अइप्पमाणं, जण-पिच्छ-
णिज्ज-रूवं ८ ॥सू. ४० ॥

तओ पुणो जच्च-कंचणुज्जलंत-रूवं, निम्मल-जल-पुन्न-मुत्तमं,
दिप्पमाण-सोहं, कमल-कलाव-परिरायमाणं, पडिपुन्न-सव्व-मंगल-
भेअ-समागमं, पवर-रयण-परिरायंत-कमलट्ठिअं, नयण-भूसणकरं,
पभासमाणं सव्वओ चेव दीवयंतं, सोमलच्छी-निभेलणं, सव्वपाव-
परिवज्जिअं, सुभं, भासुरं, सिरिवरं, सव्वोउअ-सुरभि-कुसुम-आसत्त-

मल्लदामं पिच्छड्, सा रयय-पुन्नकलसं ९ ॥ सू. ४१ ॥

तओ पुण रवि-किरण-तरुण-बोहिअ-सहस्सपत्त-सुरभितर-पिंजर-
जलं, जलचर-पहकर-परिहत्थग-मच्छ-परिभुज्जमाण-जल-संचयं,
महंतं जलंतमिव कमल-कुवलय-उप्पल-तामरस-पुंडरीयोरु-सप्पमाण-
सिरि-समुदएणं रमणिज्ज-रूवसोभं, पमुडअंत-भमरगण-मत्त-महुअरि-
गणुक्करोलिज्जमाण-कमलं, (ग्रं. २५०) कायंबग-बलाहय-चक्क-
कलहंस-सारस-गव्विय-सउण-गण-मिहुण-सेविज्जमाण-सलिलं, पउ-

मिणि-पत्तोवल्लग-जलबिंदु-निचयचित्तं, पिच्छइ, सा हिअय-नयण-
कंतं, पउमसरं नाम सरं, सररुहाभिरामं १० ॥ सू. ४२ ॥

तओ पुणो चंदकिरण-रासि-सरिस-सिरिवच्छ-सोहं, चउगमण-
पवद्धमाण-जल-संचयं, चवल-चंचलुच्चायप्पमाण-कल्लोल-लोलंत-तोयं,
पडु-पवणाहय-चलिअ-चवल-पागड-तरंग-रंगंत-भंग-खोखुब्भमाण-
सोभंत-निम्मल-उक्कड-उम्मी-सहसंबंध-धावमाणाव (माणोनि) नियत्त-
भासुरतराभिरामं, महामगरमच्छ-तिमि-तिमिंगिलि-निरुद्धतिलि-

तिलिया-भिघाय-कप्पूर-फेण-पसरं, महानई-तुरिय-वेग-समागय-
 भम-गंगावत्त-गुप्पमाणुच्चलंत-पच्चोनियत्त-भममाण-लोल-सलिलं,
 पिच्छइ, खीरोय-सायरं सारय-रयणिकर-सोमवयणा ११ ॥ सू.४३ ॥

तओ पुणो तरुण-सूर-मंडल-समप्पहं, दिप्पमाण-सोहं उत्तम-
 कंचण-महमणि-समूह-पवर-तेय-अट्टसहस्स-दिप्पंत-नहप्पईवं, कणग-
 पयर-लंबमाण-मुत्तासमुज्जलं, जलंत-दिब्बदामं, ईहामिग-उसभ-
 तुरग-नरमगर-विहग-वालुग-किंनर-रुरु-सरभ-चमर-संसत्त-कुंजर-

वणलय-पउमलय-भत्तिचित्तं, गंधव्वोपवज्जमाण-संपुन्नघोसं, निच्चं,
सजल-घण-विउल-जलहर-गज्जिय-सद्दाणुनाइणा देवदुंदुहि-महारवेणं
सयलमवि जीवलोयं पूरयंतं, कालागुरु-पवरकुंदुरुक्क-तुरुक्क-डज्झंत-
माण-धूव-वासंग-मघमघंत-गंधुद्धुआभिरामं, निच्चालोअं, सेअं
सेअप्पभं, सुरवराभिरामं, पिच्छइ सा साओवभोगं, विमाण-वरपुंड-
रीयं १२ ॥सू.४४॥

तओ पुणो पुलग-वेरिंद-नील-सासग-कक्केयण-लोहियक्ख-मरगय-

मसारगल्ल-पवाल-फलिह-सोगंधिय-हंसगब्भ-अंजण-चंदप्पह-वररय-
 णेहिं महियल-पइट्ठियं गगन-मंडलंतं पभासयंतं, तुंगं, मेरुगिरि-
 सन्निगासं, पिच्छइ, सा रयण-निकर-रासिं १३ ॥ सू. ४५ ॥

सिहिं च सा विउलुज्जल-पिंगल-महुघय-परिसिच्चमाण-निद्धूम-
 धगधगाइय-जलंत-जालुज्जलाभिरामं तरतम-जोगजुत्तेहिं जालपय-
 रेहिं अन्नमिव अणुप्पइन्नं, पिच्छइ, सा जालुज्जलणग-अंबरं व
 कत्थइ पयंतं, अइवेग-चंचलं, सिहिं १४ ॥ सू. ४६ ॥

इमे एयारिसे सुभे सोमे पियदंसणे सुरूवे सुमिणे दटूण,
सयणमज्झे पडिबुद्धा अरविंद-लोयणा हरिस-पुलइअंगी “एए चउदस
सुविणे, सब्वा पासेई तित्थयर-माया । जं रयणिं वक्कमई, कुच्चिसि
महायसो अरहा ॥१॥” ॥सू.४७॥

तए णं सा तिसला खत्तियाणी इमे एआरूवे उराले चउदस
महासुमिणे पासित्ता णं पडिबुद्धा समाणी हट्टतुट्ट जाव हियया
धाराहय-कयंब-पुप्फगंपि व समुस्ससिअ-रोमकूवा सुमिणुग्गहं करेइ

करित्ता सयणिज्जाओ अब्भुट्टेइ, अब्भुट्टित्ता पायपीढाओ पच्चोरुहइ,
 पच्चोरुहित्ता, अतुरिय-मचवल-मसंभंताए, अविलंबियाए, रायहंस-
 सरिसीए गर्इए, जेणेव सयणिज्जे जेणेव सिद्धत्थे खत्तिए तेणेव उवा-
 गच्छइ, उवागच्छित्ता सिद्धत्थं खत्तियं ताहिं इट्ठाहिं, कंताहिं, पियाहिं,
 मणुण्णाहिं, मणामाहिं, उरालाहिं कल्लाणाहिं, सिवाहिं, धन्नाहिं,
 मंगल्लाहिं, सस्सिरीयाहिं, हियय-गमणिज्जाहिं, हिअय-पल्हायणि-
 ज्जाहिं, मिअ-महुर-मंजुलाहिं गिराहिं संलवमाणी पडिबोहेइ

॥सू.४८॥ तए णं सा तिसला खत्तियाणी सिद्धत्थेणं रत्ता अब्भणुण्णाया
समाणी नाणामणि-कणग-रयण-भत्तिचित्तंसि भद्दासणंसि निसीयइ,
निसीइत्ता आसत्था वीसत्था सुहासण-वरगया सिद्धत्थं खत्तियं ताहिं
इट्ठाहिं जाव संलवमाणी संलवमाणी एवं वयासी ॥सू.४९॥ एवं खलु
अहं सामी ! अज्ज तंसि तारिसगंसि सयणिज्जंसि वण्णओ जाव
पडिबुद्धा, तं जहा-‘गयवसह जाव सिहिं च-गाहा, तं एएसिं सामी !
उरालाणं चउदसण्हं महासुमिणाणं के मन्ने कल्लाणे फलवित्तिविसेसे

भविस्सइ ॥सू.५०॥

तए णं से सिद्धत्थे राया तिसलाए खत्तियाणीए अंतिए एय-
मट्टं सुच्चा निसम्म हट्ट तुट्ट जाव हियए धाराहय-नीव-सुरहि-कुसुम-
चुंचु-मालइय-रोमकूवे ते सुमिणे ओगिण्हइ, ते सुमिणे ओगिण्हित्ता,
ईहं अणुपविसइ, अणुपविसित्ता अप्पणो साहाविएणं मइपुव्वएणं
बुद्धिधविन्नाणेणं तेसिं सुमिणाणं अत्थुग्गहं करेइ, करित्ता तिसलं
खत्तियाणिं ताहिं इट्ठाहिं जाव मंगल्लाहिं मिय-महुर-सस्सिरीयाहिं

वग्गूहिं संलवमाणे संलवमाणे एवं वयासी ॥सू.५१॥ उराला णं तुमे
देवाणुप्पिए ! सुमिणा दिट्ठा, कल्लाणा णं तुमे देवाणुप्पिए ! सुमिणा
दिट्ठा, एवं सिवा धन्ना मंगल्ला सस्सिरीया आरुग्ग-तुट्ठि-दीहाउ-
कल्लाण-(ग्रं. ३००)-मंगल्ल-कारगाणं तुमे देवाणुप्पिए ! सुमिणा दिट्ठा,
अत्थलाभो देवाणुप्पिए ! भोगलाभो देवाणुप्पिए ! पुत्तलाभो देवाणुप्पिए !
सुखलाभो देवाणुप्पिए ! रज्जलाभो देवाणुप्पिए ! एवं खलु तुमे देवाणु-
प्पिए ! नवण्हं मासाणं बहुपडिपुन्नाणं अद्धट्ठमाण-राइंदियाणं

विइक्कंताणं, अम्हं कुलकेउं, (अम्हं कुलहेउं,) अम्हं कुलदीवं, कुल-
 पव्वयं, कुल-वडिंसयं, कुल-तिलयं, कुल-कित्तिकरं, कुल-वित्तिकरं
 कुल-दिणयरं, कुल-आधारं, कुल-नंदिकरं, कुल-जसकरं, कुल-पायवं,
 कुल-विवद्धणकरं, सुकुमाल-पाणिपायं, अहीण-पडिपुण्ण-(संपुन्न)-
 पंचिंदिय-सरीरं, लक्खण-वंजण-गुणोववेयं, माणुम्माण-प्पमाण-पडि-
 पुन्न-सुजाय-सव्वंग-सुंदरंगं, ससि-सोमाकारं, कंतं, पियदंसणं, सुरूवं
 दारयं पयाहिसि ॥सू.५२॥ से वि य णं दारए उम्मुक्क-बालभावे विन्नाय-

परिणयमित्ते जुव्वणग-मणुप्पत्ते सूरे वीरे विक्कंते वित्थिण्ण-विउल-
बलवाहणे रज्जवई राया भविस्सइ ॥ सू. ५३ ॥ तं उराला णं तुमे जाव
सुमिणा दिट्ठा, दुच्चंपि तच्चंपि अणुवूहइ, तए णं सा तिसला
खत्तियाणी सिद्धत्थस्स रन्नो अंतिए एयमट्ठं सुच्चा णिसम्म हट्ठ-तुट्ठ
जाव हियया करयल-परिग्गहियं दसनहं सिरसावत्तं मत्थए अंजलिं
कट्ठु एवं बयासी ॥ सू. ५४ ॥ एयमेयं सामी ! तहमेयं सामी ! अवि-
तहमेयं सामी ! असंदिद्धमेयं सामी ! इच्छियमेयं सामी ! पडिच्छिय-

मेयं सामी ! इच्छिय-पडिच्छियमेयं सामी ! सच्चे णं एसमट्टे से
 जहेयं तुब्भे वयह त्ति कट्टु ते सुमिणे सम्मं पडिच्छइ, पडिच्छित्ता
 सिद्धत्थेणं रत्ता अब्भणुत्ताया समाणी नाणा-मणि-कणग-
 रयण-भत्तिचित्ताओ भद्दासणाओ अब्भुट्टेइ, अब्भुट्टित्ता अतुरिय-
 मचवल-मसंभंताए अविलंबियाए रायहंस-सरिसीए गईए जेणेव सए
 सयणिज्जे तेणेव उवागच्छइ, उवागच्छित्ता एवं वयासी ॥ सू. ५५ ॥

मा मे ते उत्तमा पहाणा मंगह्हा सुमिणा दिट्ठा, अन्नेहिं

पावसुमिणेहिं पडिहम्मिस्संति त्ति कट्टु देव-गुरुजण-संबद्धाहिं
पसत्थाहिं मंगल्लाहिं धम्मियाहिं (लट्ठाहिं) कहाहिं सुमिण-जागरियं
जागरमाणी पडिजागरमाणी विहरइ ॥सू. ५६॥ तए णं सिद्धत्थे
खत्तिए पच्चूस-काल-समयंसि कोडुंबिय-पुरिसे सदावेइ, सदावित्ता एवं
वयासी ॥सू. ५७॥ खिप्पामेव भो! देवाणुप्पिया! अज्ज सविसेसं बाहिरियं
उवट्ठाण-सालं गंधोदग-सित्तं सुइ-संमज्जिओवलित्तं सुगंध-वर-
पंचवन्न-पुप्फोवयार-कलियं कालागुरु-पवरकुंदुरुक्क-तुरुक्क-डज्झंत-धूव-

मघमघंत-गंधुद्भुयाभिरामं सुगंधवर-गंधियं गंधवट्टि-भूयं करेह,
 कारवेह, करित्ता य कारवित्ता य सिंहासणं रयावेह, रयावित्ता मम
 एयमाणत्तियं खिप्पामेव पच्चप्पिणह ॥ सू. ५८ ॥

तए णं ते कोडुंबिय-पुरिसा सिद्धत्थेणं रण्णा एवं वुत्ता समाणा
 हट्ट-तुट्ट जाव हियया करयल जाव कट्टु एवं सामि त्ति आणाए
 विणएणं वयणं पडिसुणंति, पडिसुणित्ता सिद्धत्थस्स खत्तियस्स
 अंतिआओ पडिनिक्खमंति, पडिनिक्खमित्ता जेणेव बाहिरिया

उवट्टाणसाला तेणेव उवागच्छंति, उवागच्छित्ता खिप्पामेव सविसेसं
बाहिरियं उवट्टाणसालं गंधोदय-सित्तसुइं जाव सीहासणं रयाविंति,
रयावित्ता जेणेव सिद्धत्थे खत्तिए तेणेव उवागच्छंति, उवागच्छित्ता
करयल-परिग्गहियं दसनहं सिरसावत्तं मत्थए अंजलिं कट्टु
सिद्धत्थस्स खत्तियस्स तमाणत्तियं पच्चप्पिणांति ॥ सू. ५९ ॥
तए णं सिद्धत्थे खत्तिए कल्लं पाउप्पभाए रयणीए फुल्लुप्पल-
कमल-कोमलुम्मीलियंमि अहापंडुरे पभाए रत्तासोगप्पगास-किंसुय-

सुयमुह-गुंजद्धराग-बंधुजीवग-पारावय-चलणनयण-परहुअ-सुरत्त-
लोअण-जासुअण-कुसुमरासि-हिंगुलय-निअराइरेग-रेहंत-सरिसे
कमलायर-संडविबोहए उट्टियंमि सूरे सहस्सरस्सिमि दिणयरे तेयसा
जलंते तस्स य करपहरापरद्धंमि अंधयारे बालायव-कुंकुमेणं खचियव्वे
जीवलोए सयणिज्जाओ अब्भुट्टेइ ॥ सू. ६० ॥

सयणिज्जाओ अब्भुट्टित्ता पायपीढाओ पच्चोरुहइ, पच्चोरु-
हित्ता जेणेव अट्टणसाला तेणेव उवागच्छइ, उवागच्छित्ता अट्टणसालं

अणुपविसइ, अणुपविसित्ता अणेग-वायाम-जोग्ग-वग्गण-वामहण-
मल्लजुद्ध-करणेहिं संते परिस्संते, सयपाग-सहस्सपागेहिं सुगंधवर-
तिल्ल-माइएहिं पीणणिज्जेहिं दीवणिज्जेहिं मयणिज्जेहिं बिंहणि-
ज्जेहिं दप्पणिज्जेहिं सविंदिय-गाय-पल्हायणिज्जेहिं अब्भंगिए
समाणे, तिल्लचम्मंसि निउणेहिं पडिपुन्न-पाणिपाय-सुकुमाल-कोमल-
तलेहिं अब्भंगण-परिमहणुव्वलण-करणगुण-निम्माएहिं छेएहिं
दक्खेहिं पट्टेहिं कुसलेहिं मेहावीहिं जिय-परिस्समेहिं पुरिसेहिं अट्टि-

सुहाए मंससुहाए तयासुहाए रोमसुहाए चउव्विहाए सुह-परिक्कम-
णाए संवाहणाए संवाहिए समाणे, अवगय (खेय) परिस्समे अट्टण-
सालाओ पडिनिक्खमइ ॥ सू. ६१ ॥

अट्टणसालाओ पडिनिक्खमित्ता जेणेव मज्जणघरे तेणेव उवा-
गच्छइ, उवागच्छित्ता मज्जणघरं अणुपविसइ, अणुपविसित्ता
समुत्तजालाकुलाभिरामे विचित्त-मणिरयण-कुट्टिमतले रमणिज्जे
न्हाणमंडवंसि, नाणा-मणिरयण-भत्तिचित्तंसि ण्हाणपीढंसि सुहनि-

सण्णे, पुष्पोदएहि अ, गंधोदएहि अ, उण्होदएहि अ, सुहोदएहि अ,
सुद्धोदएहि अ, कल्लाण-करण-पवर-मज्जणविहीए मज्जिए । तत्थ
कोउअसएहिं बहुविहेहिं कल्लाणग-पवर-मज्जणावसाणे, पम्हलसुकु-
माल-गंधकासाइअ-लूहिअंगे, अहय-सुमहग्घ-दूसरयण-सुं(सुसं)वुडे,
सरस-सुरभि-गोसीस-चंदणाणुलित्त-गत्ते, सुइ-मालावण्णग-विलेवणे,
आविद्ध-मणिसुवन्ने कप्पिय-हारद्धहार-तिसरय-पालंब-पलंबमाण-
कडिसुत्त सुकयसोहे, पिणद्ध-गेविज्जे, अंगुलिज्जग-ललिय-कयाभरणे,

वरकडग-तुडिय-थंभियभूए, अहियरूव-सस्सिरीए, कुंडल-उज्जोइ-
 आणणे, मउड-दित्तसिरए हारुत्थय-सुकय-रइय-वच्छे, मुदिया-पिंगलं-
 गुलिए, पालंब-पलंबमाण-सुकय-पडउत्तरिज्जे, नाणा-मणि-कणग-
 रयण-विमल-महरिह-निउणोवचिय-मिसिमिसिंत-विरइय-सुसिलिट्ठ-
 विसिट्ठ-लट्ठ-आविद्ध-वीरवलए, किं बहुणा ? कप्परुक्खएविव अलं-
 किय-विभूसिए नरिंदे, सकोरिंटि-मल्लदामेणं छत्तेणं धरिज्जमाणेणं
 सेयवर-चामराहिं उद्धुव्वमाणीहिं मंगल-जयसह-कयालोए अणेग-

गणनायग-दंडनायग-राईसर-तलवर-माडंबिय-कोडुंबिय-मंति-
महामंति-गणग-दोवारिय-अमच्च-चेड-पीढमद्-नगर-निगम-सिद्धि-
सेणावड-सत्थवाह-दूय-संधिवाल-सद्धिं संपरिवुडे, धवल-महामेह-
निग्गए इव गहगण-दिप्पंत-रिक्ख-तारागणाण मज्झे ससिब्ब पिय-
दंसणे, नरवई नरिंदे नरवसहे नरसीहे अब्भहिय-रायतेय-लच्छीए
दिप्पमाणे मज्जण-घराओ पडिनिक्खमइ ॥सू. ६२॥ मज्जणघराओ
पडिनिक्खमित्ता जेणेव बाहिरिया उवट्टाणसाला तेणेव उवागच्छइ,

उवागच्छित्ता सीहासणंसि पुरत्थाभिमुहे निसीअइ ॥ सू. ६३ ॥

सीहासणंसि पुरत्थाभिमुहे निसीइत्ता अप्पणो उत्तर-पुरत्थि-
 (च्छि)मे दिसीभाए अट्ट भद्दासणाइं सेयवत्थ-पच्चुत्थयाइं सिद्ध-
 त्थय-कय-मंगलोवयाराइं रयावेइ, रयावित्ता अप्पणो अदूरसामंते
 नाणा-मणिरयण-मंडियं, अहिअ-पिच्छणिज्जं, महग्घ-वर-पट्टणुग्गयं,
 सण्ह-पट्ट-भत्ति-सय-चित्तताणं, ईहामिय-उसभ-तुरग-नर-मगर-विहग-
 वालग-किंनर-रुरु-सरभ-चमर-कुंजर-वणलय-पउमलय-भत्तिचित्तं

अब्भितरिअं जवणिअं अंछावेइ, अंछावित्ता नाणा-मणिरयण-भत्तिचित्तं
अत्थरय-मिउ-मसूर-गोत्थयं सेयवत्थ-पच्चुत्थयं सुमउयं अंगसुह-फरि-
सगं विसिद्धं तिसलाए खत्तियाणीए भद्दासणं रयावेइ, रयावित्ता
कोडुंबिय-पुरिसे सद्दावेइ, सद्दावित्ता एवं वयासी ॥ सू. ६४ ॥ खिप्पामेव
भो देवाणुप्पिया ! अट्ठंग-महानिमित्त-सुत्तत्थ-धारए विविह-सत्थ-
कुसले सुविण-लक्खण-पाढए सद्दावेह, तए णं ते कोडुंबियपुरिसा
सिद्धत्थेण रन्ना एवं वुत्ता समाणा हट्ठतुट्ठ जाव हियया करयल जाव

पडिसुणंति ॥ सू. ६५ ॥

॥३८॥

पडिसुणित्ता सिद्धत्थस्स खत्तियस्स अंतिआओ पडिनिक्खमंति,
 पडिनिक्खमित्ता कुंडग्गामं (कुंडपुरं) नगरं मज्झं मज्झेणं जेणेव
 सुविण-लक्खण-पाढगाणं गेहाइं तेणेव उवागच्छंति, उवागच्छित्ता
 सुविण-लक्खण-पाढए सदावेति ॥ सू. ६६ ॥ तएणं ते सुविणलक्खण-
 पाढगा सिद्धत्थस्स खत्तिअस्स कोडुंबिअ-पुरिसेहिं सदाविया समाणा
 हट्टतुट्ट जाव हियया, ण्हाया, कयवलिकम्मा, कयकोउय-मंगल-

पायच्छित्ता, सुद्धपावेसाइं मंगल्लाइं वत्थाइं पवराइं परिहिआ, अप्प-
महग्घाभरणालंकिय-सरीरा, सिद्धत्थय-हरिआलिया-कयमंगल-मुद्धाणा,
सएहिं सएहिं गेहेहिंतो निग्गच्छंति, निग्गच्छित्ता खत्तियकुंडग्गामं
नगरं मज्झं मज्झेणं जेणेव सिद्धत्थस्स रन्नो भवण-वरवडिंसग-
पडिदुवारे तेणेव उवागच्छंति, उवागच्छित्ता भवण-वरवडिंसग-पडि-
दुवारे एगओ मिलंति, एगओ मिलित्ता जेणेव बाहिरिया उवट्टाणसाला
जेणेव सिद्धत्थे खत्तिए तेणेव उवागच्छंति, उवागच्छित्ता करयल

जाव अंजलिं कट्टु सिद्धत्थं खत्तियं जएणं विजएणं वद्धाविति
 ॥सू. ६७॥ तएणं ते सुविणलक्खण-पाढगा सिद्धत्थेणं रन्ना वंदिअ-
 पूइअ-सक्कारिअ-सम्माणिआ समाणा पत्तेअं पत्तेअं पुव्वन्नत्थेसु
 भद्दासणेसु निसीयंति ॥सू. ६८॥ तएणं सिद्धत्थे खत्तिए तिसलं
 खत्तियाणिं जवणिअंतरियं ठावेइ, ठावित्ता पुप्फ-फल-पडिपुण्ण-हत्थे
 परेण विणएणं ते सुविणलक्खणपाढए एवं वयासी ॥सू. ६९॥ एवं
 खलु देवाणुप्पिआ ! अज्ज तिसला खत्तिआणी तंसि तारिसगंसि जाव

सुत्तजागरा ओहीरमाणी ओहीरमाणी इमे एयारूवे उराले चउदस
महासुमिणे पासित्ता णं पडिबुद्धा ॥ सू. ७० ॥

तं जहा-गयवसह जाव सिहिं च गाहा । तं एएसिं चउदसण्हं
महासुमिणाणं देवाणुप्पिया ! उरालाणं के मन्ने कल्लाणे फलवित्ति-
विसेसे भविस्सइ ? ॥ सू. ७१ ॥ तए णं ते सुमिणलक्खण-पाढगा
सिद्धत्थस्स खत्तियस्स अंतिए एयमट्ठं सोच्चा निसम्म हट्टतुट्ट जाव
हियया ते सुमिणे सम्मं ओगिण्हंति, ओगिण्हित्ता ईहं अणुपविसंति,

अणुपविसित्ता अन्नमन्नेण सद्धिं संचालेंति (संलवेंति), संचालित्ता तेसिं
 सुमिणाणं लद्धट्ठा गहियट्ठा पुच्छियट्ठा विणिच्छियट्ठा, अहिगयट्ठा
 सिद्धत्थस्स रण्णो पुरओ सुमिणसत्थाइं उच्चारेमाणा उच्चारेमाणा
 सिद्धत्थं खत्तियं एवं वयासी ॥सू. ७२॥ एवं खलु देवाणुप्पिया ! अम्हं
 सुमिणसत्थे बायालीसं सुमिणा तीसं महासुमिणा, बावत्तरिं सब्ब-
 सुमिणा दिट्ठा । तत्थ णं देवाणुप्पिया ! अरहंतमायरो वा, चक्कवट्ठि-
 मायरो वा, अरहंतंसि वा, चक्कहरंसि वा, गब्भं (ग्र. ४००) वक्क-

माणंसि एएसिं तीसाए महासुमिणाणं इमे चउदस महासुमिणे
पासित्ता णं पडिबुज्झंति ॥ सू. ७३ ॥ तं जहा—‘गयवसह’ गाहा
॥ सू. ७४ ॥ वासुदेवमायरो वा वासुदेवंसि गब्भं वक्कमाणंसि एएसिं
चउदसण्हं महासुमिणाणं अन्नयरे सत्त महासुमिणे पासित्ता णं पडि-
बुज्झंति ॥ सू. ७५ ॥

बलदेवमायरो वा बलदेवंसि गब्भं वक्कमाणंसि एएसिं चउदसण्हं
महासुमिणाणं अन्नयरे चत्तारि महासुमिणे पासित्ता णं पडिबुज्झंति

॥सू. ७६॥ मंडलियमायरो वा मंडलियंसि गब्भं वक्कमाणंसि एएसिं
 चउदसण्हं महासुमिणाणं अन्नयरं एगं महासुमिणं पासित्ता णं
 पडिबुज्झंति ॥सू. ७७॥ इस्से य णं देवाणुप्पिया ! तिसलाए खत्ति-
 आणीए चउदस महासुमिणा दिट्ठा, तं उराला णं देवाणुप्पिया !
 तिसलाए खत्तियाणीए सुमिणा दिट्ठा जाव मंगल्लकारगा णं देवाणु-
 प्पिया ! तिसलाए खत्तियाणिइ सुमिणा दिट्ठा, तं जहा-अत्थलाभो
 देवाणुप्पिया ! भोगलाभो देवाणुप्पिया ! पुत्तलाभो देवाणुप्पिया !

सुखलाभो देवाणुप्पिया ! रज्जलाभो देवाणुप्पिया ! एवं खलु देवा-
णुप्पिया ! तिसला खत्तिआणी नवण्हं मासाणं बहुपडिपुन्नाणं अद्धट्ट-
माणं राइंदियाणं विइक्कंताणं तुम्हं कुलकेउं, (कुलहेउं) कुलदीवं,
कुलपव्वयं, कुलवडिंसयं, कुलतिलयं, कुलकित्तिकरं, कुलवित्तिकरं,
कुलदिणयरं, कुलाधारं, कुलनंदिकरं, कुलजसकरं, कुलपायवं, कुल-
तंतु-संताण-विवद्धणकरं, सुकुमाल-पाणिपायं, अहीण-पडिपुन्न-पंचिं-
दिय-सरीरं, लक्खण-वंजण-गुणोव्वेयं, माणुम्माणप्पमाण-पडिपुन्न-

सुजाय-सवंग-सुंदरंगं, ससिसोमाकारं, कंतं, पियदंसणं, सुरूवं, दारयं
 पयाहिसि ॥सू. ७८॥ से वि य णं दारए उम्मुक्क-बालभावे विण्णाय-
 परिणयमित्ते जोव्वणग-मणुप्पत्ते सूरे वीरे विक्कंते विच्छिन्न-विपुल-
 बलवाहणे चाउरंत-चक्कवट्ठी रज्जवई राया भविस्सइ, जिणे वा
 तेलुक्क-(तिलोग)-नायगे धम्मवर-चाउरंत-चक्कवट्ठी ॥सू. ७९॥ तं
 उराला णं देवाणुप्पिया ! तिसलाए खत्तियाणीए सुमिणा दिट्ठा,
 जाव आरुग्ग-तुट्ठि-दीहाउ-कल्लाण-मंगल्ल-कारगाणं देवाणुप्पिया !

तिसलाए खत्तियाणीए सुमिणा दिट्ठा ॥सू. ८०॥

तए णं सिद्धत्थे राया तेसिं सुविणलक्खण-पाढगाणं अंतिए
एयमट्ठं सोच्चा निसम्म हट्ठतुट्ठ जाव हियए करयल जाव ते सुविण-
लक्खणपाढए एवं वयासी ॥सू. ८१॥ एवमेयं देवाणुप्पिया ! तहमेयं
देवाणुप्पिया ! अवितहमेयं देवाणुप्पिया ! इच्छियमेयं देवाणुप्पिया !
पडिच्छियमेयं देवाणुप्पिया ! इच्छिय-पडिच्छियमेयं देवाणुप्पिया !
सच्चे णं एसमट्ठे से जहेयं तुब्भे वयह त्ति कट्ठु ते सुमिणे सम्मं

पडिच्छइ, पडिच्छित्ता ते सुविणलक्खणपाढए विउलेणं असणेणं
 पुप्फ-वत्थ-गंध-मल्लालंकारेणं सक्कारेइ, सम्माणेइ, सक्कारित्ता
 सम्माणित्ता विउलं जीवियारिहं पीइदाणं दलइ, दलइत्ता पडिवि-
 सज्जेइ ॥सू. ८२॥ तए णं से सिद्धत्थे खत्तिए सीहासणाओ अब्भु-
 ड्ढेइ, अब्भुड्ढित्ता जेणेव तिसल्ला खत्तियाणी जवणियंतरिया तेणेव
 उवागच्छइ, उवागच्छित्ता तिसलं खत्तियाणिं एवं वयासी ॥सू. ८३॥
 एवं खलु देवाणुप्पिए ! सुविणसत्थंसि बायालीसं सुमिणा तीसं महा-

सुमिणा जाव एगं महासुमिणं पासित्ता णं पडिबुज्झंति ॥सू. ८४॥
इमे अ णं तुमे देवाणुप्पिए ! चउदस महासुमिणा दिट्ठा, तं उरा-
लाणं तुमे देवाणुप्पिए ! सुमिणा दिट्ठा, जाव जिणे वां तेलुक्कनायगे
धम्मवर-चाउरंत-चक्कवट्ठी ॥ सू. ८५ ॥

तए णं सा तिसला एयमट्ठं सोच्चा निसम्म हट्ठतुट्ठ जाव हय-
हियया करयल जाव ते सुमिणे सम्मं पडिच्छइ ॥ सू. ८६ ॥ पडि-
च्छित्ता सिद्धत्थेणं रन्ना अब्भणुन्नाया समाणी नाणा-मणिरयण-

भत्तिचित्ताओ भद्दासणाओ अब्भुट्टेइ, अब्भुट्टित्ता अतुरिय-मचवल-
मसंभंताए अविलंबियाए रायहंस-सरिसीए गर्इए जेणेव सए भवणे
तेणेव उवागच्छइ, उवागच्छित्ता सयं भवणं अणुप्पविट्ठा ॥सू. ८७॥
जप्पभिइं च णं समणे भगवं महावीरे तंसि राय (नाय) कुलंसि
साहरिए, तप्पभिइं च णं बहवे वेसमण-कुंडधारिणो तिरियजंभगा
देवा सक्कवयणेणं से जाइं इमाइं पुरा पोराणाइं महानिहाणाइं भवंति,
तं जहा-पहीण-सामियाइं, पहीण-सेउयाइं, पहीण-गोत्तागाराइं उच्छिन्न-

सामियाइं उच्छिन्न-सेउयाइं, उच्छिन्न-गुत्तागाराइं, गामागर-
नगर-खेड-कब्बड-मडंब-दोणमुह-पट्टणासम-संबाहसन्निवेसेसु, सिंघा-
डएसु वा, तिएसु वा, चउक्केसु वा, चच्चरेसु वा, चउम्मुहेसु वा,
महापहेसु वा, गामट्टाणेसु वा, नगरट्टाणेसु वा, गामनिद्धमणेसु वा,
नगरनिद्धमणेसु वा, आवणेसु वा, देवकुलेसु वा, सभासु वा, पवासु
वा, आरामेसु वा, उज्जाणेसु वा, बणेसु वा, वणसंडेसु वा, सुसाण-
सुन्नागार-गिरिकंदर-संति-सेलो-वट्टाण-भवण-गिहेसु, वा संनिक्खि-

ताइं चिद्वंति ताइं सिद्धत्थ-रायभवणंसि साहरंति ॥सू. ८८॥ जं रयणिं
 च णं समणे भगवं महावीरे नायकुलंसि साहरिए तं रयणिं च णं
 नायकुलं हिरण्णेणं वड्डित्था, सुवण्णेणं वड्डित्था, धणेणं धन्नेणं रज्जेणं
 रट्ठेणं बलेणं वाहणेणं कोसेणं कोट्टागारेणं पुरेणं अंतेउरेणं जणवएणं
 जसवाएणं वड्डित्था, विपुलधण-कणग-रयण-मणि-मोत्तिय-संख-
 सिलप्पवाल-रत्तरयण-माईएणं संतसार-सावइज्जेणं पीइसक्कार-समु-
 दएणं, अईव अईव अभिवड्डित्था, तएणं समणस्स भगवओ महा-

वीरस्स अम्मापिऊणं अयमेयारूवे अब्भत्थिए जाव संकप्पे समुप्प-
ज्जित्था ॥सू. ८९॥ जप्पभिइं च णं अम्हं एस दारए कुच्चिंसि गब्भ-
ताए वक्कंते, तप्पभिइं च णं अम्हे हिरण्णेणं वड्डामो, सुवण्णेणं
वड्डामो, धणेणं धन्नेणं जाव संतसार-सावइज्जेणं पीइसक्कारेणं अइव
अइव अभिवड्डामो, तं जया णं अम्हं एस दारए जाए भविस्सइ
तया णं अम्हे एयस्स दारगस्स एयाणुरूवं गुण्णं गुणनिप्फन्नं नाम-
धिज्जं करिस्सामो वद्धमाणु त्ति ॥सू. ९० ॥

तएणं समणे भगवं महावीरे माउय-अणुकंपणट्टाए निच्चले
 निप्फंदे निरेयणे अल्लीण-पल्लीणगुत्ते यावि होत्था ॥ सू. ९१ ॥ तएणं
 तीसे तिसलाए खत्तियाणीए अयमेयारूवे जाव संकप्पे समुप्प-
 ज्जित्था । हडे मे से गब्भे ? मडे मे से गब्भे ? चुए मे से गब्भे ?
 गल्लिए मे से गब्भे ? एस मे गब्भे पुब्बिं एयइ, इयाणिं नो एयइ
 त्ति कट्टु, ओहय-मणसंकप्पा चिंतासोग-सागरं पविट्ठा, करयल-
 पल्हत्थ-मुही अट्टज्झाणोवगया भूमिगय-दिट्ठिया झियायइ, तं

पि य सिद्धत्थ-रायवर-भवणं उवरयमुइंग-तंती-तलताल-नाडइज्ज-
जणमणुज्जं (मणुन्नं) दीणविमणं विहरइ ॥सू. ९२॥ तएणं
से समणे भगवं महावीरे माऊए अयमेयारूवं अब्भत्थियं पत्थियं
मणोगयं संकप्पं समुप्पन्नं वियाणित्ता एगदेसेणं एयइ, तएणं सा
तिसला खत्तियाणी हट्टतुट्ट जाव हिअया एवं वयासी ॥सू. ९३॥ नो
खलु मे गब्भे हडे, जाव नो गलिए, एस मे गब्भे पुब्बिं नो एयइ,
इयाणिं एयइ त्ति कट्टु, हट्टतुट्ट जाव हियया एवं विहरइ, तएणं

समणे भगवं महावीरे गब्भत्थे चेव इमेयारूवं अभिग्गहं अभि-
 गिण्हइ, “नो खलु मे कप्पइ अम्मापिऊहिं जीवन्तेहिं मुंडे भवित्ता
 अगाराओ अणगारियं पव्वइत्तए” ॥सू. ९४॥ तएणं सा तिसला खत्ति-
 याणी ण्हाया कय-बलिकम्मा कय-कोउय-मंगल-पायच्छित्ता जाव
 सव्वालंकार-विभूसिया तं गब्भं नाइसीएहिं, नाइउण्हेहिं, नाइतित्तेहिं,
 नाइकडुएहिं, नाइकसाएहिं, नाइअंबिलेहिं, नाइमहुरेहिं, नाइनिद्धेहिं,
 नाइलुक्खेहिं, नाइउल्लेहिं, नाइसुक्केहिं, सव्वत्तुग-भयमाणसुहेहिं,

भोयणाच्छायण-गंधमल्लेहिं, ववगय-रोग-सोग-मोह-भय-परिस्समा
सा जं तस्स गब्भस्स हिअं मियं पत्थं गब्भपोसणं तं देसे य काले
य आहारमाहारेमाणी, विवित्त-मउएहिं सयणासणेहिं पइरिक्कसुहाए
मणाणु कूलाए विहारभूमीए, पसत्थ-दोहला, संपुण्ण-दोहला, सम्मा-
णिय-दोहला, अविमाणिय-दोहला, वुच्छिन्न-दोहला, ववणी^य-दोहला
सुहं सुहेणं आसइ, सयइ, चिट्ठइ, निसीयइ, तुयट्ठइ, विहरइ, सुहं
सुहेणं तं गब्भं परिवहइ ॥ सू. ९५ ॥

तेणं कालेणं तेणं समएणं समणे भगवं महावीरे, जे से गिम्हाणं
 पढमे मासे दुच्चे पक्खे चित्तसुद्धे तस्स णं चित्तसुद्धस्स तेरसीदिवसेणं
 नवण्हं मासाणं बहुपडिपुन्नाणं अद्धट्टमाणं राइंदियाणं विइक्कंताणं
 उच्चट्टाणगएसु गहेसु, पढमे चंदजोगे, सोमासु दिसासु वितिमिरासु
 विसुद्धासु, जइएसु सव्वसउणेसु, पयाहिणाणुकूलंसि भूमिसप्पंसि
 मारुयांसि पवायांसि, निप्फण्णमेइणीयांसि कालंसि, पमुइअ-पक्कीलिएसु
 जणवएसु, पुव्वरत्ता-वरत्त-काल-समयांसि हत्थुत्तराहिं नक्खत्तेणं चंदेणं

जोगमुवागएणं आरो(रु)ग्गारो(रु)ग्गं दारयं पयाया ॥ सू. ९६ ॥
जं रयणिं च णं समणे भगवं महावीरे जाए सा णं रयणी बहूहिं
देवेहिं देवीहि य ओवयंतेहिं उप्पयंतेहिं य (देवुज्जोए एगालोए
देवसन्निवाए) उप्पिंजलमाण-भूया कहकहग-भूया आवि हुत्था
(क्वचित्-उज्जोविआवि हुत्था) ॥ सू. ९७ ॥ जं रयणिं च णं समणे
भगवं महावीरे जाए तं रयणिं च णं बहवे वेसमण-कुंडधारी-तिरिय-
जंभगा देवा सिद्धत्थराय-भवणंसि हिरण्णवासं च, सुवण्णवासं च,

वयरवासं च, वत्थवासं च, आभरणवासं च, पत्तवासं च, पुष्पवासं
 च, फलवासं च, बीयवासं च, मल्लुवासं च, गंधवासं च, चुण्णवासं च,
 वण्णवासं च, वसुहारवासं च (धण्णवासं च) वासिसु ॥सू. ९८॥ तए णं से
 सिद्धत्थे खत्तिए भवणवइ-वाणमंतर-जोइस-वेमाणिएहिं देवेहिं तित्थर-
 जम्मणाभिसेय-महिमाए कयाए समाणीए पच्चूसकाल-समयंसि
 नगरगुत्तिए सद्दावेइ सद्दावित्ता एवं वयासी ॥ सू. ९९ ॥ खिप्पामेव भो
 देवाणुप्पिया ! खत्तिय-कुंडग्गामे (कुंडपुरे) नगरे चारगसोहणं करेह,

करित्ता माणुम्माण-वद्धणं करेह, करित्ता कुंडपुरं नगरं सब्भितर-
बाहिरियं आसिअ-संमज्जिओवलित्तं सिंघाडग-तिय-चउक्क-चच्चर-
चउम्मुह-महापहपहेसु सित्त-सुइ-सम्मट्ट-रत्थंतरावण-वीहियं, मंचाइ-
मंच-कलियं, नाणाविह-रागभूसिय-ज्झय-पडाग-मंडियं, लाउल्लोइय-
महियं, गोसीस-सरस-रत्तचंदण-दहर-दिन्न-पंचंगुलि-तलं उवचिय-
चंदण-कलसं, चंदण-घड-सुकय-तोरण-पडिदुवार-देसभागं आसत्तो-
सत्त-विपुल-वट्ट-वग्घारिय-मल्लदाम-कलावं, पंचवण्ण-सरस-सुरहि-

मुक्क-पुप्फ-पुंजोवयार-कलियं, कालागुरु-पवरकुंदुरुक्क-तुरुक्क-डज्झंत-
 धूव-मघमघंत-गंधुद्धुयाभिरामं सुगन्धवर-गंधियं गंधवट्टि-भूयं नड-
 नट्टग-जल्ल-मल्ल-मुट्टिय-वेलंबग-पवग-कहग-पाढग-लासग-आर-
 कखग-लंख-मंख-तूणइल्ल-तुंबवीणिय-अणेग-तालायराणुचरियं करेह,
 कारवेह, करित्ता कारवित्ता य जूयसहस्सं मुसलसहस्सं च
 उस्सवेह, उस्सवित्ता मम एयमाणत्तियं पच्चप्पिणह ॥ सू. १०० ॥

तए णं ते कोडुंबियपुरिसा सिद्धत्थेणं रण्णा एवं वुत्ता समाणा

हृदुतुदु जाव हियया करयल जाव पडिसुणित्ता खिप्पामेव कुंडपुरे
नगरे चारगसोहणं जाव उस्सवित्ता जेणेव सिद्धत्थे खत्तिए तेणेव
उवागच्छंति उवागच्छित्ता करयल जाव कट्टु सिद्धत्थस्स खत्तियस्स
रण्णो तमाणत्तियं पच्चप्पिणंति ॥सू. १०१॥ तए णं से सिद्धत्थे
राया जेणेव अट्टणसाला तेणेव उवागच्छइ, उवागच्छित्ता जाव
सव्वोरोहेणं सव्वपुप्फ-गन्ध-वत्थ-मल्लालंकार-विभूसाए, सव्व-तुडिय
सह-निनाएणं, महया इड्डीए, महया जुइए, महया बलेणं, महया

वाहणेणं, महया समुदएणं, महया वरतुडिय-जमग-समग-प्पवाइएणं,
 संख-पणव-पडह-भेरि-झल्लरि-खरमुहि-हुडुक्क-मुरज-मुइंग-दुंदुहि-नि-
 गघोस-नाइयरवेणं उस्सुक्कं, उक्करं, उक्किट्टं, अदिज्जं, अमिज्जं अभड-
 प्पवेसं, अदंढ-कुदण्डिमं, अधरिमं, गणिया(अगणिअ)वर-नाडइज्ज-
 कलियं अणेग-तालायराणुचरियं, अणुद्धुय-मुइंगं, (ग्रन्थाग्रं ५००) अमि-
 लाय-मल्लदामं, पमुइय-पक्कीलिय-सपुर-जण(जणाभिरामं)जाणवयं
 दसदिवसं ठिइवडियं करेति ॥ सू. १०२ ॥ तए णं सिद्धत्थे राया दसाहि-

याए ठिइवडियाए वट्टमाणीए, सइए अ साहस्सिए अ, सयसाहस्सिए
य, जाए य, दाए अ, भाए अ, दल्लमाणे अ, द्वावेमाणे अ, सइए
अ, साहस्सिए अ, सयसाहस्सिए अ, लंभे पडिच्छमाणे अ पडि-
च्छावेमाणे अ एवं वा विहरइ ॥ सू. १०३ ॥ तए णं समणस्स भगवओ
महावीरस्स अम्मापियरो पढमे दिवसे ठिइवडियं करेति, तइए दिवसे
चन्दसूर-दंसणीयं करेति, छट्ठे दिवसे धम्मजागरियं जागरेन्ति (करेति)
इक्कारसमे दिवसे वइक्कंते, निव्वत्तिए असुइ-जम्मकम्म-करणे,

संपत्ते बारसाहे दिवसे, विउलं असणं पाणं खाइमं साइमं उवक्खडावेति,
 उवक्खडावित्ता मित्त-नाइ-नियग-सयण-संबंधि-परिजणं नायए
 खत्तिए य आमंतेति, आमन्तित्ता तओ पच्छा णहाया कयबलिकम्मा
 कयकोउय-मंगल-पायच्छित्ता सुद्धप्पावेसाइं मंगल्लाइं, पवराइं वत्थाइं
 परिहिया अप्पमहग्घा-भरणाळंकिय-सरीरा भोयणवेलाए भोयण-
 मण्डवंसि सुहासण-वरगया तेणं मित्तनाइ-नियग-सयण-संबंधि-परि-
 जणेणं नायएहिं खत्तिएहिं सद्धिं तं विउलं असणं पाणं खाइमं साइमं

आसाएमाणा विसाएमाणा परिभुंजेमाणा परिभाएमाणा एवं वा
विहरन्ति ॥ सू. १०४ ॥ जिमिय भुत्तुत्तरागया वि य णं समाणा
आयंता चोक्खा परमसुइभुया तं मित्त-नाइ-नियग-सयण-संबंधि-
परिजणं नायए खत्तिए य विउलेणं पुप्प-वत्थ-गंध-मल्लालंकारेणं
सक्कारेति सम्माणेति सक्कारित्ता सम्माणित्ता तस्सेव मित्त-नाइ-नियग-
सयण-संबन्धि-परिजणस्स नायाण य खत्तियाण य पुरओ एवं वयासी

॥ सू. १०५ ॥

पुर्विं पि णं देवाणुप्पिया ! अम्हं एयंसि दारगंसि गब्भं वक्कंतंसि
समाणंसि इमे एयारूवे अब्भत्थिए जाव समुप्पज्जित्था—जप्पभिइं
च णं अम्हं एस दारए कुच्चिंसि गब्भत्ताए वक्कंते तप्पभिइं च णं
अम्हे हिरण्णेणं वड्डामो, सुवण्णेणं धणेणं धन्नेणं रज्जेणं जाव सावइ-
ज्जेणं पीइसक्कारेणं अईव अईव अभिवड्डामो, सामन्तरायाणो वस-
मागया य ॥सू. १०६॥ तं जया णं अम्हं एस दारए जाए भविस्सइ
तया णं अम्हे एयस्स दारगस्स इमं एयाणुरूवं गुण्णं गुणनिप्फन्नं

नामधिज्जं कैरिस्सामो वद्धमाणु त्ति । ता अम्हं अज्ज मणोरहसंपत्ती
जाया, तं होउ णं अम्हे कुमारे वद्धमाणे नामेणं ॥ सू. १०७ ॥
समणे भगवं महावीरे कासवगुत्ते णं तस्स णं तओ नामधिज्जा
एवमाहिज्जंति, तं जहा-अम्मापिउसंतिए वद्धमाणे १, सहसमुइयाए
समणे २, अयले भयभेरवाणं, परीसहोवसग्गाणं, खंतिखमे, पडिमाणं
पालए, धीमं अरतिरतिसहे, दविए, वीरियसंपन्ने देवेहिं से णामं कयं
समणे भगवं महावीरे ३ ॥ सू. १०८ ॥ समणस्स भगवओ महा-

वीरस्स पिया कासवगुत्ते णं तस्स णं तओ नामधिज्जा एवमाहिज्जंति,
 तं जहा-सिद्धत्थे इ वा, सिज्जंसे इ वा, जसंसे इ वा । समणस्स
 भगवओ महावीरस्स माया वासिट्ठसगुत्ते णं तीसे तओ नामधिज्जा
 एवमाहिज्जन्ति, तं जहा-तिसल्ल इ वा, विदेहदिन्ना इ वा, पीइका-
 रिणी इ वा । समणस्स भगवओ महावीरस्स पित्तिज्जे सुपासे,
 जिट्ठे भाया नंदिवद्धणे, भगिणी सुदंसणा, भारिया जसोया कोडि-
 न्नागुत्ते णं । समणस्स भगवओ महावीरस्स धूआ कासवगुत्ते णं तीसे

दो नामधिज्जा एवमाहिज्जंति, तं जहा-अणोज्जा इ वा, पियदंसणा
इ वा । समणस्स भगवओ महावीरस्स नत्तुई कासवगुत्तेणं तीसे णं
दो नामधिज्जा एवमाहिज्जंति, तं जहा-सेसवई इ वा, जसवई इ
वा ॥सू. १०९॥ समणे भगवं महावीरे दक्खे दक्खपइन्ने पडिरूवे
आलीणे भइए विणीए नाए नायपुत्ते नायकुलचन्दे विदेहे विदेहदिन्ने
विदेहजच्चे विदेहसूमाले तीसं वासाइं विदेहांसि कट्टु अम्मापिऊहिं
देवत्तगएहिं गुरुमहत्तरएहिं अब्भणुण्णाए सम्मत्तपइन्ने पुणरवि

लोयंतिएहिं जीयकप्पिएहिं देवेहिं ताहिं इट्ठाहिं जाव वग्गूहिं अण-
वरयं अभिनन्दमाणा य अभिथुव्वमाणा य एवं वयासी ॥ सू. ११० ॥

जय जय नन्दा ! जय जय भद्दा ! भद्दं ते जय जय खत्तिय-
वरवसहा ! बुज्झाहि भगवं ! लोणणाहा ! सयल-जगज्जीवहियं
पवत्तेहि धम्मतित्थं हिअ-सुह-निस्सेयसकरं सब्वलोए सब्वजीवाणं
भविस्सइ त्ति कट्टु जयजयसद्दं पउंजंति ॥ सू. १११ ॥ पुविं पि णं
समणस्स भगवओ महावीरस्स माणुस्सगाओ गिहत्थधम्माओ

अणुत्तरे आहोइए अप्पडिवाई नाणदंसणे हुत्था । तए णं समणे
भगवं महावीरे तेणं अणुत्तरेणं आहोइएणं नाणदंसणेणं अप्पणो
निक्खमणकालं आभोएइ, आभोइत्ता चिच्चा हिरण्णं, चिच्चा सुवण्णं,
चिच्चा धणं, चिच्चा रज्जं, चिच्चा रट्ठं, एवं बलं वाहणं कोसं
कोट्टागारं, चिच्चा पुरं, चिच्चा अंतेउरं, चिच्चा जणवयं, चिच्चा
विपुलधण-कणग-रयण-मणि-मोत्तिय-संख-सिल-प्पवाल-रत्तरयणमा-
इअं संतसार-सावइज्जं, विच्छड्डइत्ता विगोवइत्ता दाणं दायारेहिं

परिभाइत्ता दाणं दाइयाणं परिभाइत्ता ॥सू. ११२॥ तेणं काले णं
 तेणं समए णं समणे भगवं महावीरे जे से हेमंताणं पढमे मासे
 पढमे पक्खे मग्गसिर-बहुले तस्स णं मग्गसिरबहुलस्स दसमी पक्खे
 णं पाईण-गामिणाए छायाए पोरिसीए अभिनिव्विट्ठाए पमाणपत्ताए
 सुव्वए णं दिवसे णं विजए णं मुहुत्ते णं चंदप्पभाए सिबियाए
 सदेवमणुयासुराए परिसाए समणुगम्ममाणमग्गे संखिय-चक्किय-
 लंगलिय-मुहमंगलिय-बद्धमाण-पूसमाण-घंटियगणेहिं ताहिं इट्ठाहिं

जाव वग्गूहिं अभिनंदमाणा अभिथुव्वमाणा य एवं वयासी ॥सू. ११३॥

जय जय नंदा ! जय जय भद्दा ! भद्दं ते अभग्गेहिं नाण-दंसण-
चरित्तेहिं अजियाइं जिणाहि इंदियाइं, जियं च पालेहि समणधम्मं,
जियविग्घो वि य वसाहि तं दवे ! सिद्धिमज्झे ,निहणाहि रागदोस-
मल्ले, तवेणं धिइ-धणिय-बद्धकच्छे, मद्दाहि अट्ट-कम्मसत्तू झाणेणं
उत्तमेणं सुक्केणं, अप्पमत्तो हराहि आराहणपडागं च वीर ! तेलुक्क-
रंगमज्झे, पावय वितिमिर-मणुत्तरं केवलवरनाणं, गच्छ य मुक्खं परं

पयं जिणवरोवइट्टेणं मग्गेणं अकुडिलेणं हंता परीसहचमुं, जय जय
 खत्तिय-वरवसहा ! बहूइं दिवसाइं, बहूइं पक्खाइं, बहूइं मासाइं, बहूइं
 उऊइं, बहूइं अयणाइं, बहूइं संवच्छराइं, अभीए परीसहोवसग्गाणं,
 खंतिखमे भयभेरवाणं (अभिभविअ-गामकंटए) धम्ममे ते अविग्घं
 भवउ त्ति कट्टु जयजयसहं पउंजंति ॥सू. ११४॥ तए णं समणे
 भगवं महावीरे नयणमाला-सहस्सेहिं पिच्छिज्जमाणे पिच्छिज्जमाणे,
 वयणमालासहस्सेहिं अभिथुव्वमाणे अभिथुव्वमाणे, हिययमाला-सह-

स्सेहिं उन्नंदिज्जमाणे उन्नंदिज्जमाणे, मणोरहमाला-सहस्सेहिं विच्छि-
प्पमाणे विच्छिप्पमाणे, कंतिरूवगुणेहिं पत्थिज्जमाणे पत्थिज्जमाणे,
अंगुलिमाला-सहस्सेहिं दाइज्जमाणे दाइज्जमाणे, दाहिणहत्थेणं बहूणं
नरनारि-सहस्साणं अंजलिमाला-सहस्साइं पडिच्छमाणे पडिच्छमाणे,
भवणपंति-सहस्साइं समइक्कमाणे समइक्कमाणे, तंती-तल-ताल-
तुडिय-गीय-वाइय-रवेणं महुरेण य मणहरेणं जयजय-सदघोस-
मीसिएणं मंजुमंजुणा घोसेण य पडिबुज्झमाणे पडिबुज्झमाणे,

सव्विड्डीए, सव्वजुईए, सव्वबलेणं, सव्ववाहणेणं, सव्वसमुदएणं,
 सव्वायरेणं, सव्वविभूइए, सव्वविभूसाए, सव्वसंभमेणं, सव्वसंगमेणं,
 सव्वपगईएहिं, सव्वनाडएहिं, सव्वतालायरेहिं, सव्वावरोहेणं (सव्वो-
 रोहेणं) सव्वपुप्फ-गंध-वत्थ-मल्लालंकार-विभूसाए सव्व-तुडिय-सद-
 सन्निनाएणं, महया इड्डीए, महया जुईए, महया बलेणं, महया
 वाहणेणं, महया समुदएणं, महया वरतुडिय-जमगसमग-प्पवाइएणं,
 संख-पणव-पडह-भेरि-झल्लरि-खरमुहि-हुडुक्क-दुंदुहि-णिग्घोस-नाइय-

रवेणं, कुंडपुरं नगरं मज्झं मज्झेणं निग्गच्छइ, निग्गच्छित्ता जेणेव
नायखंडवणे उज्जाणे जेणेव असोग-वरपायवे तेणेव उवागच्छइ,
उवागच्छित्ता असोग-वरपायवस्स अहे सीयं ठावेइ, ठावित्ता सीयाओ
पच्चोरुहइ, पच्चोरुहित्ता सयमेव आभरण-मल्लालंकारं ओमुयइ,
आमुइत्ता सयमेव पंचमुट्टियं लोयं करेइ, करित्ता छट्टेणं भत्तेणं
अपाणएणं हत्थुत्तराहिं नक्खत्तेणं जोगमुवागएणं एगं देवदूसमादाय,
एगे अबीए मुण्डे भवित्ता अगाराओ अणगारियं पव्वइए ॥ सू. ११५ ॥

१५५ समणे भगवं महावीरे संवच्छरं साहियं मासं जाव चीवरधारी
 होत्था । तेण परं अचेलए पाणिपडिग्गहिए, समणे भगवं महावीरे
 साइरैगाइं दुवालसवासाइं निच्चं वोसट्टकाए चियत्तदेहे जे केइ
 उवसग्गा उप्पज्जंति, तं जहा-दिब्वा वा, माणुसा वा, तिरिक्खजोणिया
 वा । अणुलोमा वा, पडिलोमा वा, ते उप्पन्ने सम्मं सहइ, खमइ,
 सिक्खिक्खइ, अहियासइ ॥ सू. ११६ ॥ तए णं समणे भगवं महावीरे
 अणुगारे जाए, इरियासमिए, भासासमिए, एसणासमिए, आयाण-

अंडमत्त-निकखेवणासमिए, उच्चार-पासवण-खेल-सिंघाण-जल्ल-पारि-
इत्तुणियासमिए, मणसमिए, वयसमिए, कायसमिए, मणगुत्ते,
वयगुत्ते, कायगुत्ते, गुत्ते, गुत्तिंदिए, गुत्तबंभयारी, अकोहे, अमाणे,
अयाए, अलोहे, संते, पसंते, उवसंते, परिनिव्वुडे, अणासवे, अममे,
अकिंचिणे, छिन्नगंथे निरुवलेवे, कंसपाई इव मुक्कतोये, संखो इव
सिंजणे, जीवे इव अप्पडिहयगई, गगणमिव निरालंबणे, वाउव्व
अडिबद्धे, सारयसलिलं व सुद्धहियए, पुक्खरपत्तं व निरुवलेवे, कुम्मो

इव गुत्तिंदिए, खग्गिविसाणं व एगजाए, विहग इव विप्पमुक्के, भारंड-
 पक्खीव अप्पमत्ते, कुंजरो इव सोंडीरे, वसहो इव जायथामे, सीहो
 इव दुद्धरिसे, मंदरो इव अप्पकंपे (निक्कंपे, अकंपे), सागरो इव गंभीरे,
 चंदो इव सोमलेसे, सुरो इव दित्तेए, जच्चकणगंभव्व जायरूवे, वसुंधरा
 इव सब्बफासविसहे, सुहुयहुयासणो इव तेयसा जलंते, इमेसिं पयाणं
 दुन्नि-संगाहिणी-गाहाओ-कंसे संखे जीवे, गगणे वाऊ अ सरयसल्लिले
 अ । पुक्खरपत्ते कुम्मे, विहगे खग्गे अ भारंडे ॥१॥ कुंजरवसहे सीहे,

नगराया चैव सागरमखोभे । चंदे सूरु कणगे, वसुंधरा चैव हुअवहे ॥२॥
णत्थि णं तस्स भगवंतस्स कत्थइ पडिबंधे भवइ । से य पडिबंधे
चउव्विहे पन्नते, तं जहा-दव्वओ, खित्तओ, कालओ, भावओ । दव्वओ
णं सच्चित्ताचित्त-मीसएसु दव्वेसु खित्तओ णं गामे वा, नगरे वा,
अरण्णे वा, खित्ते वा, खले वा, घरे वा, अंगणे वा, नहे वा, कालओ
णं समए वा, आवलियाए वा, आणपाणुए वा, थोवे वा, खणे वा,
लवे वा, मुहुत्ते वा, अहोरत्ते वा, पक्खे वा, मासे वा, उऊ (उउए)

वा, अयणे वा, संवच्छरे वा, अन्नयरे वा दीहकालसंजोए, भावओ णं
कोहे वा, माणे वा, मायाए वा, लोभे वा, भए वा, हासे वा, पिज्जे
वा, दोसे वा, कलहे वा, अब्भक्खाणे वा, पेसुन्ने वा, परपरिवाए वा,
अरइरई वा, मायामोसे वा जाव मिच्छादंसणसल्ले वा, (ग्र० ६००)
तस्स णं भगवंतस्स नो एवं भवइ ॥सू. ११७॥ से णं भगवं वासा-
वासवज्जं अट्ट गिम्हहेमंतिए मासे गामे एगराइए नगरे पंचराइए ।
वासीचंदण-समाणकप्पे समतिण-मणि-लेट्ठु-कंचणे, समसुहदुक्खे

(समदुःखसुहे) इहलोग - परलोग - अप्पडिबद्धे, जीवियमरणे
निरवकंखे, संसारपारगामी, कम्मसत्तु-निग्घायणट्ठाए अब्भुट्ठिए
एवं च णं विहरइ ॥ सू. ११८ ॥ तस्स णं भगवंतस्स अणुत्तरेणं
नाणेणं, अणुत्तरेणं दंसणेणं, अणुत्तरेणं चरित्तेणं अणुत्तरेणं
आलएणं, अणुत्तरेणं विहारेणं, अणुत्तरेणं वीरिएणं, अणुत्तरेणं
अज्जवेणं, अणुत्तरेणं महवेणं, अणुत्तरेणं लाघवेणं, अणुत्तराए खंतीए,
अणुत्तराए मुत्तीए, अणुत्तराए गुत्तीए, अणुत्तराए तुट्ठीए, अणु-

त्तरेणं सच्चसंजम-तव-सुचरिय-सोवचिय-फल-निव्वाणमग्गेणं, अप्पाणं
 भावेमाणस्स दुवालस संवच्छराइं विइक्कंताइं, तेरसमस्स संवच्छरस्स
 अंतरा वट्टमाणस्स जे से गिम्हाणं दुच्चे मासे, चउत्थे पक्खे,
 वइसाहसुद्धे तस्स णं वइसाहसुद्धस्स दसमीपक्खेणं पाईणगामिणीए
 छायाए पोरीसीए अभिनिविट्टाए पमाणपत्ताए सुव्वएणं दिवसेणं,
 विजयेणं मुहुत्तेणं जंभियगामस्स नगरस्स बहिया उज्जुवालियाए
 नईए तीरे वेयावत्तस्स चेइयस्स अदूरसामंते सामागस्स गाहावइस्स

कट्टकरणांसि सालपायवस्स अहे गोदोहियाए उक्कुडिअ-निसिज्जाए
आयावणाए आयावेमाणस्स छट्टेणं भत्तेणं अप्पाणएणं हत्थुत्तराहिं
नक्खत्तेणं जोगमुवागएणं झाणंतरियाए वट्टमाणस्स अणंते अणुत्तरे
निव्वाघाए निरावरणे कसिणे पडिपुण्णे केवलवर-नाणदंसणे समुप्पन्ने
॥ सू. ११९ ॥ तए णं समणे भगवं महावीरे अरहा जाए, जिणे,
केवली सब्बन्नू सब्बदरिसी, सदेव-मणुआसुरस्स लोगस्स परियायं
जाणइ पासइ सब्बलोए सब्बजीवाणं आगइं, गइं, ठिइं, चवणं, उववायं,

तक्कं मणो माणसियं, भुत्तं, कडं, पडिसेवियं, आवीकम्मं, रहोकम्मं ।
 अरहा अरहस्स भागी तं तं कालं मण-वयण-कायजोगे वट्टमाणाणं
 सब्वलोए सब्वजीवाणं सब्वभावे जाणमाणे पासमाणे विहरइ
 ॥ सू. १२० ॥

तेणं कालेणं तेणं समाएणं समणे भगवं महावीरे अट्टियगामं
 नीसाए पढमं अंतरावासं वासावासं उवागए, चंपं च पिट्टचंपं च
 नीसाए तओ अंतरावासे वासावासं उवागए, वेसालिं नगरिं वाणि-

अगामं च नीसाए दुवालस अंतरावासे वासावासं उवागए, रायगिहं
नगरं नालंदं च बाहिरियं नीसाए चउदस अंतरावासे वासावासं उवा-
गए, छ मिहिलाए, दो भदियाए, एगं आलंभियाए, एगं सावर्तीए,
एगं पणियभूमीए एगं पावाए मज्झिमाए हत्थिपालस्स रत्तो रज्जु-
गसभाए अपच्छिमं अंतरावासं वासावासं उवागए ॥ सू. १२१ ॥
तत्थ णं जे से पावाए मज्झिमाए हत्थिपालस्स रत्तो रज्जुगसभाए
अपच्छिमं अंतरावासं वासावासं उवागए ॥ सू. १२२ ॥ तस्स णं

अंतरावासस्स जे से वासाणं चउत्थे मासे सत्तमे पक्खे कत्तियबहुले,
 तस्स णं कत्तियबहुलस्स पण्णरसीपक्खे णं जा सा चरमा रयणी, तं
 रयणिं च णं समणे भगवं महावीरे काल्गाए, विइक्कंते, समुज्जाए,
 छिन्न-जाइ-जरा-मरण-बंधणे, सिद्धे, बुद्धे, मुत्ते, अंतगडे परिनिव्वुडे,
 सव्वदुक्खप्पहीणे, चंदे नामं से दोच्चे संवच्छरे, पीइवद्धणे मासे,
 नंदिवद्धणे पक्खे, अंगिवेसे नामं से दिवसे उवसमेत्ति पवुच्चई,
 देवानंदा नामं सा रयणी निरत्ति पवुच्चई, अच्चे लवे, मुहुत्ते पाणू,

थोवे सिद्धे, नागे करणे, सब्बदुसिद्धे मुहुत्ते, साइणा नक्खत्तेणं
जोगमुवागएणं कालगए, जाव सब्बदुक्खप्पहीणे ॥ सू. १२३ ॥
जं रयणिं च णं समणे भगवं महावीरे कालगए जाव सब्बदुक्खप्पहीणे
सा णं रयणी बहूहिं देवेहिं देवीहि य ओवयमाणेहि य उप्पयमाणेहि
य उज्जोविया यावि होत्था ॥ सू. १२४ ॥ जं रय^{णिं}हि च णं समणे भगवं
महावीरे कालगए जाव सब्ब-दुक्खप्पहीणे सा णं रयणी बहूहिं
देवेहिं देवीहि य ओवयमाणेहि उप्पयमाणेहि य उप्पिंजलग-माणभूया

कहकहगभूया यावि हुत्था ॥ सू. १२५ ॥

जं रयणिं च णं समणे भगवं महावीरे कालगए जाव सब्ब-
दुक्खप्पहीणे, तं रयणिं च णं जिट्ठस्स गोयमस्स इंदभूइस्स अण-
गारस्स अंतेवासिस्स नायए पिज्जबंधणे वोच्छिन्ने अणंते अणुत्तरे
जाव केवलवर-नाणदंसणे समुप्पन्ने ॥ सू. १२६ ॥ जं रयणिं च णं
समणे भगवं महावीरे कालगए जाव सब्बदुक्खप्पहीणे तं रयणिं च
णं नव मल्लई, नव लेच्छइ कासीकोसलगा अट्टारसवि गणरायाणो

अमावासाए पाराभोयं (बाराभोयं) पोसहोववासं पट्टविंसु, गए से भावु-
ज्जोए दव्वुज्जोयं करिस्सामो ॥ सू. १२७ ॥ जं रयणिं च णं समणे
भगवं महावीरे जाव सव्वदुक्खप्पहीणे तं रयणिं च णं खुद्दाए भासरासी
नाम महग्गहे दो वास-सहस्सट्ठिईए समणस्स भगवओ महावीरस्स
जम्मनक्खत्तं संकंते ॥ सू. १२८ ॥ जप्पभिइं च णं से खुद्दाए भास-
रासी महग्गहे दो वाससहस्सट्ठिई समणस्स भगवओ महावीरस्स
जम्मनक्खत्तं संकंते, तप्पभिइं च णं समणाणं निग्गंथाणं निग्गंथीण

य नो उदिए उदिए पूयासक्कारे पवर्त्तइ ॥सू. १२९॥ जया णं से
खुद्दाए जाव जम्मनक्खत्ताओ विडक्कंते भविस्सइ, तथा णं समणाणं
निग्गंथाणं निग्गंथीण य उदिए उदिए पूयासक्कारे भविस्सइ ॥सू. १३०॥

जं रयणिं च णं समणे भगवं महावीरे जाव सव्वदुक्खप्पहीणे
तं रयणिं च णं कुंथू अणुद्धरी नामं समुप्पन्ना, जा ठिया अचलमाणा
छउमत्थाणं निग्गंथाणं निग्गंथीण य नो चक्खुफासं हव्वमागच्छइ, जा
अट्टिआ चलमाणा छउमत्थाणं निग्गंथाण य निग्गंथीण य चक्खुफासं

हव्वमागच्छइ ॥१३१॥ जं प^Tसित्ता बहूहिं निग्गंथेहिं निग्गंथीहि य
भत्ताइं पच्चक्खायाइं, से किमाहु भंते ! अज्जप्पभिइं संजमे दूराराहए
(दुराराहे) भविस्सइ ॥ सू. १३२ ॥ तेणं कालेणं तेणं समएणं समणस्स
भगवओ महावीरस्स इंदभूइ-पामुक्खाओ चउद्दस समणसाहस्सीओ
उक्कोसिया समणसंपया हुत्था ॥ सू. १३३ ॥ समणस्स भगवओ
महावीरस्स अज्जचंदणा-पामोक्खाओ छत्तीसं अज्जिया-साहस्सीओ
उक्कोसिया अज्जियासंपया हुत्था ॥ सू. १३४ ॥ समणस्स णं भगवओ

महावीरस्स संख-सयग-पामोक्खाणं समणोवासगाणं एगा सयसाहस्सी
 अउणट्ठिं च सहस्सा उक्कोसिया समणोवासगाणं संपया हुत्था
 ॥ सू. १३५ ॥

समणस्स भगवओ महावीरस्स सुलसा-रेवई-पामोक्खाणं समणो-
 वासियाणं तिन्नि सयसाहस्सीओ अट्टारस-सहस्सा उक्कोसिया
 समणोवासियाणं संपया हुत्था ॥ सू. १३६ ॥ समणस्स भगवओ
 महावीरस्स तिन्नि सया चउदसपुव्वीणं अजिणाणं जिणसंकासाणं

सव्वक्खर-सन्निवाइणं जिणो विव अवितहं वागरमाणणं उक्कोसिया
चउद्दस-पुव्विसंपया हुत्था ॥ सू. १३७ ॥ समणस्स भगवओ महावीरस्स
तेरस सया ओहिनाणीणं अइसेस-पत्ताणं उक्कोसिया ओहिनाणीणं
संपया हुत्था ॥ सू. १३८ ॥ समणस्स भगवओ महावीरस्स सत्त सया
केवलनाणीणं संभिन्न-वर-नाण-दंसणधराणं उक्कोसिया केवलनाणीणं
संपया हुत्था ॥ सू. १३९ ॥ समणस्स भगवओ महावीरस्स सत्त सया
वेउव्वीणं अदेवाणं देविद्धिपत्ताणं उक्कोसिया वेउव्वियसंपया हुत्था

॥ सू. १४० ॥

समणस्स णं भगवओ महावीरस्स पंच सया विउलमईणं अड्डा-
इज्जेसु दीवेसु दोसु अ समुद्देसु सन्नीणं पंचिंदियाणं पज्जत्तगाणं
मणोगए भावे जाणमाणाणं उक्कोसिआ विउलमईणं संपया हुत्था

॥ सू. १४१ ॥ समणस्स णं भगवओ महावीरस्स चत्तारि सया वाईणं
सदेव-मणुआसुराए परिसाए वाए अपराजियाणं उक्कोसिया वाइसंपया
हुत्था ॥ सू. १४२ ॥ समणस्स णं भगवओ महावीरस्स सत्त अंते-

वासिसयाइं सिद्धाइं जाव सव्वदुक्खप्पहीणाइं, चउदस अज्जिया-
सयाइं सिद्धाइं ॥ सू. १४३ ॥ समणस्स णं भगवओ महावीरस्स अट्ठ
सया अणुत्तरोववाइयाणं गइकल्लाणाणं ठिइकल्लाणाणं आगमेसि-
भद्दाणं उक्कोसिआ अणुत्तरोववाइयाणं संपया हुत्था ॥ सू. १४४ ॥
समणस्स णं भगवओ महावीरस्स दुविहा अंतगडभूमी हुत्था,
तंजहा-जुगंत-गड-भूमी य, परियायंत-गडभूमी य, जाव तच्चाओ
पुरिसजुगाओ जुगंत-गडभूमी, चउवास-परियाए अंतमकासी

॥ सू. १४५ ॥

तेणं कालेणं तेणं समएणं समणे भगवं महावीरे तीसं वासाइं
 अगारवासमज्झे वसित्ता, साइरेगाइं दुवालस वासाइं छउमत्थ-
 परियागं पाउणित्ता, देसूणाइं तीसं वासाइं केवलिपरियागं पाउणित्ता,
 बायालीसं वासाइं सामण्ण-परियागं पाउणित्ता, बावत्तरिं
 वासाइं सव्वाउयं पालइत्ता खीणे वेयणिज्जाउय-नाम-गुत्ते
 इमीसे ओसप्पिणीए दुसम-सुसमाए समाए बहुविइक्कंताए तिहिं

वासेहिं अद्धनवमेहि य मासेहिं सेसेहिं पावाए मज्झिमाए हत्थि-
वालस्स रण्णो रज्जुगसभाए एगे अबीए छट्ठेणं भत्तेणं अपाणएणं
साइणा नक्खत्तेणं जोगमुवागएणं पच्चूस-कालसमयंसि संपलिअंक-
निसण्णे पणपन्नं अज्झयणाइं कल्लाण-फल-विवागाइं, पणपन्नं अज्झ-
यणाइं पाव-फल-विवागाइं, छत्तीसं च अपुट्ट-वागरणाइं वागरित्ता
पहाणं नाम अज्झयणं विभावेमाणे विभावेमाणे कालगए, विइक्कंते
समुज्जाए, छिन्नजाइ-जरा-मरणबंधणे, सिद्धे, बुद्धे, मुत्ते, अंतगडे, परि-

निव्वुडे, सव्वदुक्खप्पहीणे ॥सू. १४६॥ समणस्स भगवओ महावीरस्स
जाव सव्व-दुक्ख-प्पहीणस्स नव वाससयाइं विइक्कंताइं, दसमस्स य
वाससयस्स अयं असीइमे संवच्छरे काले गच्छइ, वायणंतरे पुण अयं
तेणउए संवच्छरे काले गच्छइ, इति दीसइ ॥सू. १४७॥ २४॥

॥ इति श्री महावीरजिनेन्द्रचरित्रम् ॥

तेणं कालेणं तेणं समएणं पासे णं अरहा पुरिसादाणीए पंच
विसाहे होत्था, तंजहा-विसाहाहिं चुए चइत्ता गब्भं वक्कंते, विसाहाहिं

जाए, विसाहाहिं मुंडे भवित्ता अगाराओ अणगारिअं पव्वइए,
विसाहाहिं अणंते अणुत्तरे निव्वाघाए निरावरणे कसिणे पडिपुण्णे
केवलवर-नाणदंसणे समुप्पन्ने, विसाहाहिं परिनिव्वुडे ॥ सू. १४८ ॥
ते णं काले णं ते णं समए णं पासे अरहा पुरिसादाणीए जे से गिम्हाणं
पढमे मासे पढमे पक्खे चित्तबहुले, तस्स णं चित्तबहुलस्स
चउत्थीपक्खे णं पाणयाओ कप्पाओ वीसं सागरोवम-ठिइयाओ अणंतरं
चयं, चइत्ता इहेव जंबुद्दीवे दीवे भारहे वासे वाणारसीए नयरीए आस-

सेणस्स रण्णो वामाए देवीए पुव्वरत्तावरत्त-कालसमयंसि विसाहाहिं
 नक्खत्तेणं जोगमुवागएणं आहारवक्कंतीए (ग्रंथाग्रं ७००) भववक्कं-
 तीए सरीरवक्कंतीए कुच्छिसि गब्भताए वक्कंते ॥ सू. १४९ ॥ पासे णं
 अरहा पुरिसादाणीए तिन्नाणोवगए आवि हुत्था, तंजहा-चइस्सामि
 त्ति जाणइ, चयमाणे न जाणइ, चुएमि त्ति जाणइ, तेणं चेव
 अभिलावेणं सुविण-दंसण-विहाणेणं सव्वं जाव निअगं गिहं अणु-
 पविट्ठा, जाव सुहंसुहेणं तं गब्भं परिवहइ ॥ सू. १५० ॥

तेणं कालेणं तेणं समएणं पासे अरहा पुरिसादाणीए जे से
हेमंताणं दुच्चे मासे तच्चे पक्खे पोसबहुले, तस्स णं पोसबहुलस्स
दसमीपक्खे णं नवण्हं मासाणं बहुपडिपुण्णाणं अद्धट्टमाणं राइंदिआणं
विइक्कंताणं पुव्वरत्तावरत्त-कालसमयंसि विसाहाहिं नक्खत्तेणं जोग-
मुवागएणं आरोग्गा आरोग्गं दारयं पयाया ॥ सू. १५१ ॥ जं रयणिं च
णं पासे अरहा पुरिसादाणीए जाए, सा रयणी (तं रयणिं च णं) बहूहिं
देवेहिं देवीहि य जाव उप्पिंजलग-भूया कहकहग-भूया आवि हुत्था

॥सू. १५२॥ सेसं तहेव, नवरं पासाभिलावेणं भाणिअव्वं, जाव तं
 होउ णं कुमारे पासे नामेणं ॥सू. १५३॥ पासे णं अरहा पुरिसादा-
 णीए दक्खे, दक्खपइन्ने, पडिरूवे, ^अउल्लीणे, भइए, विणीए, तीसं
 वासाइं अगारवासमज्झे वसित्ता पुणरवि लोयंतिएहिं जिअकप्पेहिं
 देवेहिं ताहिं इट्ठाहिं जाव एवं वयासी ॥सू. १५४॥ जय जय नंदा,
 जय जय भद्दा, जाव जय-जय-सहं पउंजंति ॥सू. १५५॥

पुव्विपि णं पासस्स अरहओ पुरिसादाणीयस्य माणुस्सगाओ

गिहत्थधम्माओ अणुत्तरे आहोइए, तं चेव सब्बं जाव दाणं दाइयाणं
परिभाइत्ता, जे से हेमंताणं दुच्चे मासे तच्चे पक्खे पोसबहुले,
तस्स णं पोसबहुलस्स इक्कारसी-दिवसे णं पुव्वण्ह-काल-समयंसि
विसालाए सिबियाए सदेव-मणुआसुराए परिसाए, तं चेव सब्बं, नवरं
वाणारसिं नगरिं मज्झंमज्झेणं निग्गच्छइ, निग्गच्छित्ता जेणेव
आसमपए उज्जाणे, जेणेव असोगवरपायवे तेणेव उवागच्छइ, उवा-
गच्छित्ता असोग-वरपायवस्स अहे सीयं ठावेइ, ठावित्ता सीयाओ

पच्चोरुहइ, पच्चोरुहिता सयमेव आभरण-मह्णालंकारं ओमुअइ,
 ओमुइत्ता सयमेव पंचमुट्टियं लोअं करेइ, करित्ता अट्टमेणं भत्तेणं
 अपाणएणं विसाहाहिं नक्खत्तेणं जोगमुवागएणं एगं देवदूसमादाय
 तिहिं पुरिस-सएहिं सद्धिं मुंडे भवित्ता अगाराओ अणगारियं पव्वइए
 ॥सू. १५६॥ पासे णं अरहा पुरिसादाणीए तेसीइं राइंदियाइं निच्चं
 वोसट्टकाए चियत्तदेहे जे केइ उवसग्गा उप्पज्जंति, तंजहा-दिव्वा वा
 माणुस्सा वा, तिरिक्खजोणिआ वा, अणुलोमा वा पडिलोमा वा, ते

उप्पन्ने सम्मं सहइ खमइ तितिक्खइ अहियासेइ ॥ सू. १५७ ॥ तएणं
से पासे भगवं अणगारे जाए, इरियासमिए जाव अप्पाणं भावेमाण-
स्स तेसीइं राइंदियाइं विइक्कंताइं, चउरासीइमस्स(इमे) राइंदिय-
स्स(दिए) अंतरा-वट्टमाणस्स(माणे) जे से गिम्हाणं पढमे मासे
पढमे पक्खे चित्तबहुले, तस्स णं चित्तबहुलस्स चउत्थी पक्खे णं
पुव्वण्हकाल-समयांसि धायइ-पायवस्स अहे छट्ठेणं भत्तेणं अपाणएणं
विसाहाहिं नक्खत्तेणं जोगमुवागएणं झाणंतरिआए वट्टमाणस्स

अणंते अणुत्तरे जाव केवल-वर-नाणदंसणे समुप्पन्ने जाव जाणमाणे
 पासमाणे विहरइ ॥ सू. १५८ ॥ पासस्स णं अरहओ पुरिसादाणीयस्स
 अट्ट गणा, अट्ट गणहरा हुत्था, तंजहा-सुभे य १ अज्जघोसे य २,
 वसिट्ठे ३ बंभयारि य ४ । सोमे ५ सिरिहरे ६ चेव, वीरभद्दे ७
 जसेवि य ८ ॥ सू. १५९ ॥ पासस्स णं अरहओ पुरिसादाणीयस्स
 अज्जदिण्ण-पामुक्खाओ सोलस समण-साहस्सीओ उक्कोसिआ
 समण-संपया हुत्था ॥ सू. १६० ॥

पासस्स णं अरहओ पुरिसादाणीयस्स पुप्फचूला-पामुक्खाओ
अट्टत्तीसं अज्जिया-साहस्सीओ उक्कोसिआ अज्जिया-संपया हुत्था
॥ सू. १६१ ॥ पासस्स णं अरहओ पुरिसादाणीयस्स सुव्वय-पामु-
क्खाणं समणोवासगाणं एगा सयसाहस्सीओ चउसट्ठिं च सहस्सा
उक्कोसिआ समणोवासगाणं संपया हुत्था ॥ सू. १६२ ॥ पासस्स णं
अरहओ पुरिसादाणीयस्स सुनंदा-पामुक्खाणं समणोवासियाणं तिण्णि
सयसाहस्सिओ सत्तावीसं च सहस्सा उक्कोसिआ समणोवासियाणं

संपया हुत्था ॥ सू. १६३ ॥ पासस्स णं अरहओ पुरिसादाणीयस्स
 अद्धुट्ट-सया चउदसपुव्वीणं अजिणाणं जिण-संकासाणं सब्बक्खर-
 सन्निवाइणं जाव चउदसपुव्वीणं संपया हुत्था ॥ सू. १६४ ॥ पासस्स
 णं अरहओ पुरिसादाणीयस्स चउदस सया ओहिनाणीणं, दस सया
 केवलनाणीणं, इक्कारस सया वेउव्वियाणं, छस्सया रिउमईणं, दस
 समणसया सिद्धा, वीसं अज्जिया-सयाइं सिद्धाइं, अद्धुट्टमसया विउल-
 मईणं, छस्सया वाइणं, बारस सया अणुत्तरोववाइयाणं ॥ सू. १६५ ॥

पासस्स णं अरहओ पुरिसादाणीयस्स दुविहा अंतगड-भूमी
हुत्था, तंजहा-जुगंत-गड-भूमी, परियायंत-गड-भूमी य, जाव
चउत्थाओ पुरिसजुगाओ जुगंत-गड-भूमी, तिवासपरिआए अंतम-
कासी ॥ सू. १६६ ॥ तेणं कालेणं तेणं समएणं पासे अरहा पुरिसा-
दाणीए तीसं वासाइं अगारवासमज्झे वसित्ता, तेसीइं राइंदिआइं
छउमत्थ-परिआयं पाउणित्ता, देसूणाइं सत्तरि वासाइं केवलि-परि-
आयं पाउणित्ता, पडिपुण्णाइं सत्तरि वासाइं सामण्ण-परिआयं पाउ-

णित्ता एककं वाससयं सव्वाउयं पालइत्ता खीणे वेयणिज्जाउय-
 नाम-गुत्ते इमीसे ओसप्पिणीए दूसम-सुसमाए समाए बहुविइक्कं-
 ताए जे से वासाणं पढमे मासे दुच्चे पक्खे सावणसुद्धे, तस्स णं सावण-
 सुद्धस्स अट्टमीपक्खे णं उप्पिं संमेअ-सेल-सिहरंसि अप्पचउत्तीसइमे
 मासिएणं भत्तेणं अपाणएणं विसाहाहिं नक्खत्तेणं जोगमुवागएणं
 पुव्वण्ह(पुव्वरत्तावरत्त)कालसमयंसि वग्घारियपाणी कालगए विइ-
 कंते जाव सव्वदुक्खप्पहीणे ॥सू. १६७॥ पासस्स णं अरहओ

पुरिसादाणीयस्स जाव सब्बदुक्खप्पहीणस्स दुवालस वाससयाइं
विइक्कंताइं, तेरसमस्स य वाससयस्स अयं तीसइमे संवच्छरे काले
गच्छइ ॥ सू. १६८ ॥ २३ ॥ इति श्रीपार्श्वनाथचरित्रम् ॥

तेणं कालेणं तेणं समएणं अरहा अरिट्ठनेमी पंच चित्ते हुत्था,
तंजहा-चित्ताहिं चुए चइत्ता गब्भं वक्कंते, तहेव उक्खेवो, जाव
चित्ताहिं परिनिव्वुए ॥ सू. १६९ ॥ तेणं कालेणं तेणं समएणं अरहा
अरिट्ठनेमी जे से वासाणं चउत्थे मासे सत्तमे पक्खे कत्तिअबहुले,

तस्स णं कत्तियबहुलस्स बारसीपक्खे णं अपराजिआओ महाविमा-
 णाओ बत्तीसं सागरोवम-ट्टिइयाओ अणंतरं चयं चइत्ता इहेव जवु-
 द्वीवे दीवे भारहे वासे सोरियपुरे नयरे समुद्विजयस्स रण्णो भारि
 आए सिवाए देवीए पुव्वरत्तावरत्त-कालसमयंसि जाव चित्ताहिं
 जाव गब्भताए वक्कंते, सव्वं तहे(मे)व सुमिणदंसण-दविण-संहरणाइअं
 इत्थ भाणियव्वं ॥ सू. १७० ॥

तेणं कालेणं तेणं समएणं अरहा अरिट्टनेमी जे से वासाणं

पढमे मासे दुच्चे पक्खे सावणसुद्धे, तस्स णं सावणसुद्धस्स पंचमी-
पक्खे णं नवण्हं मासाणं बहुपडिपुण्णाणं जाव चित्ताहिं नक्खत्तेणं
जोगमुवागएणं आरोग्गा आरोग्गं दारयं पयाया ॥ जम्मणं समुद्द-
विजयाभिलावेणं नेयव्वं जाव तं होउ णं कुमारे अरिट्टनेमी नामेणं
॥ सू. १७१ ॥ अरहा अरिट्टनेमी दक्खे जाव तिण्णि वाससयाइं
कुमारे अगारवासमज्झे वसित्ता णं पुणरवि लोगंतिएहिं जिअकप्पि-
एहिं देवेहिं तं चेव सव्वं भाणियव्वं जाव दाणं दाइयाणं परिभाइत्ता

॥सू. १७२॥ जे से वासाणं पढमे मासे दुच्चे पक्खे सावणसुद्धे, तस्स
 णं सावणसुद्धस्स छट्ठीपक्खे णं पुव्वण्ह-कालसमयंसि उत्तरकुराए
 सीयाए सदेवमणुआसुराए परिसाए अणुगम्ममाण-मग्गे जाव बार-
 वईए नयरीए मज्झंमज्झेणं निग्गच्छइ निग्गच्छित्ता जेणेव रेवयाए
 उज्जाणे, तेणेव उवागच्छइ, उवागच्छित्ता असोग-वरपायवस्स अहे
 सीयं ठावेइ, ठावित्ता सीयाओ पच्चोरुहइ पच्चोरुहित्ता सयमेव
 आभरण-मल्लालंकारं ओमुयइ, ओमुइत्ता सयमेव पंचमुट्ठियं लोयं

करेइ करित्ता छट्टेणं भत्तेणं अपाणएणं चित्तानक्खत्तेणं जोगमुवागएणं
एगं देवदूसमादाय एगेणं पुरिस-सहस्सेणं सद्धिं मुंडे भवित्ता अगा-
राओ अणगारियं पव्वइए ॥ सू. १७३ ॥ अरहा णं अरिट्टनेमी
चउपन्नं राइंदियाइं निच्चं वोसट्टकाए, चियत्तदेहे, तं चेव सव्वं
जाव पणपन्नगस्स राइंदियस्स अंतरा वट्टमाणस्स जे से वासाणं
तच्चे मासे पंचमे पक्खे आसोयबहुले, तस्स णं आसोयबहुलस्स
पन्नरसीपक्खे णं दिवसस्स पच्छिमे भागे उज्जित-सेलसिहरे वेडस-

पायवस्स अहे अट्टमेणं (छट्टेणं) भत्तेणं अपाणएणं चित्ताहिं नक्ख-
त्तेणं जोगमुवागएणं ज्ञाणंतरियाए वट्टमाणस्स अणंते जाव जाणमाणे
पासमाणे विहरइ ॥ सू. १७४ ॥

अरहओ णं अरिट्टनेमिस्स अट्टारस गणा अट्टारस गणहरा
हुत्था ॥ सू. १७५ ॥ अरहओ णं अरिट्टनेमिस्स वरदत्त-पामुक्खाओ
अट्टारस समण-साहस्सीओ उक्कोसिया समण-संपया हुत्था
॥ सू. १७६ ॥ अरहओ णं अरिट्टनेमिस्स अज्जजक्खणि-पामुक्खाओ

चत्तालीसं अज्जिया-साहस्सीओ उक्कोसिया अज्जिया-संपया हुत्था
॥ सू. १७७ ॥ अरहओ णं अरिट्ठनेमिस्स नंदपामुक्खाणं समणो-
वासगाणं एगा सयसाहस्सी अउणत्तरिं च सहस्सा उक्कोसिया
समणोवासगाणं संपया हुत्था ॥ सू. १७८ ॥ अरहओ
णं अरिट्ठनेमिस्स महासुव्वया-पामुक्खाणं समणोवासिआणं
तिण्णि सयसाहस्सीओ छत्तीसं च सहस्सा उक्कोसिआ समणोवासि-
आणं संपया हुत्था ॥ सू. १७९ ॥ अरहओ णं अरिट्ठनेमिस्स चत्तारि

सया चउदसपुव्वीणं अजिणाणं जिणसंकासाणं सब्बक्खर-सन्नि-
 वाईणं जाव संपया हुत्था, पन्नरस सया ओहिनाणीणं, पन्नरस सया
 केवलनाणीणं, पन्नरस सया वेउव्विआणं, दससया विउलमईणं, अट्ट-
 सया वाईणं, सोलस सया अणुत्तरोववाइआणं, पन्नरस समणसया
 सिद्धा, तीसं अज्जियासयाइं सिद्धाइं ॥ सू. १८० ॥ अरहओ णं
 अरिट्ठनेमिस्स दुविहां अंतगड-भूमि हुत्था, तंजहा-जुगंतगड-भूमी य
 परियायंतगड-भूमी य-जाव अट्टमाओ पुरिस-जुगाओ जुगंतगड-

भूमी, दु (दुवालस) वास परिआए अंतमकासी ॥ सू. १८१ ॥ तेणं
कालेणं तेणं समएणं अरहा अरिद्विनेमी तिणिण वाससयाइं कुमार-
वासमज्झे वसित्ता, चउपन्नं राइंदियाइं छउमत्थ-परिआयं पाउ-
णित्ता, देसूणाइं सत्त वाससयाइं केवलिपरिआयं पाउणित्ता, परि-
पुण्णाइं सत्त वाससयाइं सामण्ण-परिआयं पाउणित्ता, एगं वासस-
हस्सं सव्वाउअं पालइत्ता, खीणे वेयणिज्जाउय-नाम-गुत्ते इमीसे
ओसप्पिणीए दूसम-सुसमाए समाए बहुविइक्कंताए जे से गिम्हाणं

चउत्थे मासे अट्टमे पक्खे आसाढसुद्धे, तस्स णं आसाढसुद्धस्स
 अट्टमीपक्खे णं उप्पिं उज्जित-सेलसिहरंसि पंचहिं छत्तीसेहिं अण-
 गारसएहिं सद्धिं मासिएणं भत्तेणं अपाणएणं चित्ताहिं (चित्ता-)
 नक्खत्तेणं जोगमुवागएणं पुव्वरत्तावरत्त-कालसमयंसि नेसज्जिए
 कालगए (ग्रंथाग्रं ८००) जाव सब्ब-दुक्ख-प्पहीणे ॥ सू. १८२ ॥
 अरहओ णं अरिट्ठनेमिस्स कालगयस्स जाव सब्बदुक्खप्पहीणस्स
 चउरासीइं वाससहस्स^{स्स} विइक्कंताइं, पंचासीइमस्स वाससहस्स नव

वाससयाइं विइकंताइं, दसमस्स य वाससयस्स अयं असीइमे
संवच्छरे काले गच्छइ ॥ सू. १८३ ॥

॥ २२ ॥ इति श्रीनेमिनाथ-चरित्रम् ॥

नमिस्स णं अरहओ कालगयस्स जाव सब्बदुक्खप्पहीणस्स पंच
वाससयसहस्साइं, चउरासीइं च वाससहस्साइं नव य वाससयाइं
विइकंताइं, दसमस्स य वाससयस्स अयं असीइमे संवच्छरे काले
गच्छइ ॥ २१ ॥ सू. १८४ ॥ मुणिसुब्बयस्स णं अरहओ जाव सब्ब-

दुक्खप्पहीणस्स इक्कारस वास-सय-सहस्साइं चउरासीइं च वास-
सहस्साइं नव वाससयाइं विइक्कंताइं, दसमस्स य वाससयस्स अयं
असीइमे संवच्छरे काले गच्छइ ॥ २० ॥ सू. १८५ ॥

मल्लिस्स णं अरहओ जाव सव्वदुक्खप्पहीणस्स पन्नट्ठिं वास-
सयसहस्साइं चउरासीइं च वाससहस्साइं नव वाससयाइं विइक्कंताइं,
दसमस्स य वाससयस्स अयं असीइमे संवच्छरे काले गच्छइ ॥ १९ ॥
॥ सू. १८६ ॥ अरस्स णं अरहओ जाव सव्वदुक्खप्पहीणस्स एगे

वास-कोडिसहस्से विड्कंते, सेसं जहा मल्लिस्स, तं च एयं-पंचसट्ठि-
लक्खा चउरासीइं च वाससहस्सा विड्कंता, तंमि समए महावीरो
निव्वुओ, तओ परं नव वाससया विड्कंता, दसमस्स य वाससयस्स
अयं असीइमे संवच्छरे काले गच्छइ । एवं अग्गओ जाव सेयंसो
ताव दट्ठव्वं १८ ॥ सू. १८७ ॥ कुंथुस्स णं अरहओ जाव सव्वदुक्ख-
प्पहीणस्स एगे चउभाग-पलिओवमे विड्कंते, पंचसट्ठिं च वाससय-
सहस्सा, सेसं जहा मल्लिस्स १७ ॥ सू. १८८ ॥ संतिस्स णं अरहओ

जाव सब्बदुक्खप्पहीणस्स एगे चउभागूणे पलिओवमे विइक्कंते
 पन्नट्ठिं च, सेसं जहा मल्लिस्स ॥ १६ ॥ सू. १८९ ॥ धम्मस्स णं
 अरहओ जाव सब्बदुक्खप्पहीणस्स तिण्णि सागरोवमाइं विइक्कंताइं,
 पन्नट्ठिं च, सेसं जहा मल्लिस्स ॥ १५ ॥ १९० ॥

अणंतस्स णं अरहओ जाव सब्बदुक्खप्पहीणस्स सत्त सागरो-
 वमाइं विइक्कंताइं, पन्नट्ठिं च, सेसं जहा मल्लिस्स १४ ॥ सू. १९१ ॥
 विमलस्स णं अरहओ जाव सब्बदुक्खप्पहीणस्स सोलस सागरो-

वमाइं विइकंताइं, पन्नट्टिं च, सेसं जहा मल्लिस्स १३ ॥ सू. १९२ ॥

वासुपुज्जस्स णं अरहओ जाव सब्बदुक्खप्पहीणस्स छायालीसं साग-

रोवमाइं विइकंताइं पन्नट्टिं च, सेसं जहा मल्लिस्स १२ ॥ सू. १९३ ॥

सिज्जंसस्स णं अरहओ जाव सब्बदुक्खप्पहीणस्स एगे सागरोवम-

सए विइकंते पन्नट्टिं च, सेसं जहा मल्लिस्स ११ ॥ सू. १९४ ॥

सीअलस्स णं अरहओ जाव सब्बदुक्खप्पहीणस्स एगा सागरोवम-

कोडी तिवास-अद्धनवम-मासाहिअ-बायालीस-वाससहस्सेहिं ऊणिआ

विड्कंता, एयंमि समए महावीरो निव्वुओ, तओऽविय णं परं नव
 वाससयाइं विड्कंताइं, दसमस्स य वाससयस्स अयं असीइमे संव-
 च्छरे काले गच्छइ १० ॥ सू. १९५ ॥

सुविहिस्स णं अरहओ जाव सब्बदुक्खप्पहीणस्स दस सागरोव-
 म-कोडिओ विड्कंताओ सेसं जहा सीअलस्स, तं च इमं-तिवास-
 अद्धनवम-मासाहिय-बायालीस-वाससहस्सेहिं ऊणिआ(इं) विड्कंता-
 (इं) इच्चाइ(अं) ९ ॥ सू. १९६ ॥ चंदप्पहस्स णं अरहओ जाव

सव्वदुक्खप्पहीणस्स एगं सागरोवम-कोडिसयं विड्कंतं, सेसं जहा
सीअलस्स, तं च इमं-तिवास-अद्धनवम-मासाहिय-बायालीस-
वाससहस्सेहिं ऊणगमिच्चाइ ८ ॥ सू. १९७ ॥ सुपासस्स णं अरहओ
जाव सव्वदुक्खप्पहीणस्स एगे सागरोवम-कोडिसहस्से विड्कंते, सेसं
जहा सीअलस्स, तं च इमं-तिवास-अद्धनवम-मासाहिअ-बायालीस-
वाससहस्सेहिं ऊणिआ इच्चाइ ७ ॥ सू. १९८ ॥ पउमप्पहस्स णं
अरहओ जाव सव्वदुक्खप्पहीणस्स दस सागरोवम-कोडिसहस्सा विड्-

कंता, सेसं जहा सीअलस्स, तं च इमं-तिवास-अद्धनवम-मासाहिय-
 बायालीस-वाससहस्सेहिं उणगमिच्चाइ ६ ॥ सू. १९९ ॥ सुमइस्स णं
 अरहओ जाव सव्वदुक्खप्पहीणस्स एगे सागरोवम-कोडिसय-सहस्से
 विइकंते, सेसं जहा सीयलस्स, तं च इमं-तिवास-अद्धनवम-मासाहिय-
 बायालीस वाससहस्सेहिं उणगमिच्चाइ ५ ॥ सू. २०० ॥

अभिनदंणस्स णं अरहओ जाव सव्वदुक्खप्पहीणस्स दस
 सागरोवम-कोडिसयसहस्सा विइकंता, सेसं जहा सीअलस्स, तं च

इमं-तिवास अद्धनवम-मासाहिय-बायालीस-वाससहस्सेहिं उणगमि-
च्चाइ ४ ॥ सू. २०१ ॥ संभवस्स णं अरहओ जाव सब्बदुक्खप्पही-
णस्स वीसं सागरोवम-कोडिसयसहस्सा विइक्कंता, सेसं जहा सीअ-
लस्स, तं च इमं-तिवास-अद्धनवम-मासाहिय-बायालीस-वाससहस्सेहिं
उणगमिच्चाइ ३ ॥ सू. २०२ ॥ अजियस्स णं अरहओ जाव सब्ब-
दुक्खप्पहीणस्स पन्नासं सागरोवम-कोडिसयसहस्सा विइक्कंता, सेसं
जहा सीअलस्स, तं च इमं-तिवास-अद्धनवम-मासाहिय-बायालीस-

वाससहस्सेहिं उणगमिच्चाइ २ ॥ सू. २०३ ॥ इति अन्तराणि ॥

तेणं कालेणं तेणं समएणं उसभे णं अरहा कोसलिए चउउत्त-
 रासाढे अभीइपंचमे होत्था, तंजहा-उत्तरासाढाहिं चुए-चइत्ता गब्भं
 वक्कंते जाव अभीइणा परिनिव्वुए ॥ सू. २०४ ॥ तेणं कालेणं तेणं
 समएणं उसभे णं अरहा कोसलिए जे से गिम्हाणं चउत्थे मासे
 सत्तमे पक्खे-आसाढबहुले, तस्स णं आसाढबहुलस्स चउत्थीपक्खे
 णं सब्बट्ठसिद्धाओ महाविमाणाओ तितीसं सागरोवमं-ट्टिइआओ अणं-

तरं चयं, चइत्ता इहेव जंबुद्वीवे दीवे भारहे वासे इक्खागभूमीए
नाभिस्स कुलगरस्स मरुदेवा(वी)ए भारियाए पुव्वरत्तावरत्त-काल-
समयंसि आहारवक्कंतिए जाव गब्भत्ताए वक्कंते ॥ सू. २०५ ॥

उसभे णं अरहा कोसलिए तिन्नाणोवगए आवि होत्था, तंजहा-
चइस्सामि त्ति जाणइ जाव सुविणे पासइ, तंजहा-गयवसह जाव
सिहिं च ॥ गाहा । सव्वं तहेव, नवरं पढमं उसभं मुहेणं अइंतं
पासइ सेसाओ गयं, नाभिकुलगरस्स साहेइ, सुविणपाढगा नत्थि,

नाभिकुलगरो सयमेव वागरेइ ॥सू. २०६॥ तेणं कालेणं तेणं समएणं
 उसभे णं अरहा कोसलिए जे से गिम्हाणं पढमे मासे, पढमे पक्खे
 चित्तबहुले, तस्स णं चित्तबहुलस्स अट्टमीपक्खे णं नवण्हं मासाणं
 बहुपडिपुण्णाणं अद्धट्टमाणं राइंदियाणं जाव आसाढाहिं नक्खत्तेणं
 जोगमुवागएणं आरोग्गा आरोग्गं दारयं पयाया ॥सू. २०७॥ तं चेव
 सव्वं जाव देवा देवीओ य वसुहारवासं वासिसु, सेसं तहेव चारग-
 सोहणं, माणुम्माणवद्धणं, उस्सुक-माइय-ट्टिइवडिअ-जूयवज्जं सव्वं

भाणिअव्वं ॥ सू. २०८ ॥ उसभेणं अरहा कोसलिए कासवगुत्ते णं,
सस्स णं पंच नामधिज्जा एवमाहिज्जंति, तंजहा-उसभेइ वा, पढम-
राया इ वा, पढम-भिकखायरे इ वा, पढमजिणे इ वा पढमतित्थयरे
इ वा ॥ सू. २०९ ॥ उसभेणं अरहा कोसलिए दक्खे दक्खपइण्णे
पडिरूवे अल्लीणे भइए विणीए वीसं पुव्व-सयसहस्साइं कुमारवास-
मज्झे वसित्ता तेवाट्ठिं च पुव्व-सयसहस्साइं रज्जवासमज्झे वीसम^Tण्णे
लेहाइआओ गणियप्पहाणाओ सउण-रुय-पज्जवसाणाओ बावत्तरिं

कलाओ, चउसट्टिं महिलागुणे, सिप्पसयं च कम्माणं, तिन्निवि
 पयाहिआए उवदिसइ, उवदिसइत्ता पुत्तसयं रज्जसए अभिसिंचइ,
 अभिसिंचित्ता पुणरवि लोअंतिएहिं जिअकप्पिएहिं देवेहिं ताहिं
 इट्ठाहिं जाव वग्गूहिं, सेसं तं चेव सब्बं भाणिअब्बं, जाव दाणं दाइ-
 आणं परिभाइत्ता, जे से गिम्हाणं पढमे मासे पढमे पक्खे चित्त-
 बहुले, तस्स णं चित्तबहुलस्स अट्टमीपक्खे णं दिवसस्स पच्छिमे
 भागे सुदंसणाए सिबियाए सदेव-मणुआसुराए परिसाए समणुगम्म-

माण-मग्गे जाव विणीयं रायहाणिं मज्झंमज्झेणं णिगच्छइ, णिग्ग-
च्छित्ता जेणेव सिद्धत्थवणे उज्जाणे जेणेव असोग-वरपायवे तेणेव
उवाच्छइ, उवागच्छित्ता असोग-वरपायवस्स अहे जाव सयमेव
चउमुट्ठिअं लोअं करेइ, करित्ता छट्ठेणं भत्तेणं अपाणएणं आसा-
ढाहिं नक्खत्तेणं जोगमुवागए णं उग्गाणं भोगाणं राइन्नाणं खत्ति-
याणं च चउहिं पुरिससहस्सेहिं सद्धिं एगं देवदूसमादाय मुंडे भवित्ता
अगाराओ अणगारियं पव्वइए ॥ सू. २१० ॥

उसभे णं अरहा कोसलिए एगं वाससहस्सं निच्चं वोसट्टकाए
 चियत्तदेहे, जाव अप्पाणं भावेमाणस्स एगं वाससहस्सं विइक्कंतं,
 तओ णं जे से हेमंताणं चउत्थे मासे सत्तमे पक्खे, फग्गुणबहुले
 तस्स णं फग्गुणबहुलस्स इक्कारसीपक्खे णं पुव्वण्ह-कालसमयंसि,
 पुरिमतालस्स नयरस्स बहिआ, सगडमुहंसि उज्जाणंसि, नग्गोह-वर-पाय-
 वस्स अहे, अट्टमेणं भत्तेणं अपाणएणं, आसाढाहिं नक्खत्तेणं जोग
 मुवागएणं, झाणंतरिआए वट्टमाणस्स अणंते जाव जाणमाणे पासमाणे

विहरइ ॥ सू. २११ ॥ उसभस्स णं अरहओ कोसलिअस्स चउरासीइ
गणा, चउरासीइ गणहरा हुत्था ॥ सू. २१२ ॥ उसभस्स णं अरहओ कोस-
लिअस्स उसभसेण-पामुक्खाणं चउरासीओ समणसाहस्सीओ उक्को-
सिया समणसंपया हुत्था ॥ सू. २१३ ॥ उसभस्स णं अरहओ कोसलिअस्स
बंभि-सुंदरि-पामुक्खाणं अज्जियाणं तिण्णि सयसाहस्सीओ उक्को-
सिया अज्जियासंपया हुत्था ॥ सू. २१४ ॥ उसभस्स णं अरहओ
कोसलिअस्स सिज्जंस-पामुक्खाणं समणोवासगाणं तिण्णि सयसाह-

स्सीओ पंचसहस्सा उक्कोसिया समणोवासगाणं संपया हुत्था
 ॥ सू. २१५ ॥ उसभस्स णं अरहओ कोसलिअस्स सुभद्दा-पामुक्खाणं
 समणोवासियाणं पंचसयसाहस्सीओ चउपण्णं च सहस्सा उक्कोसिया
 समणोवासियाणं संपया हुत्था ॥ सू. २१६ ॥ उसभस्स णं अरहओ
 कोसलिअस्स चत्तारि सहस्सा सत्तसया पण्णासा चउद्दसपुव्वीणं
 अजिणाणं जिणसंकासाणं जाव उक्कोसिया चउद्दसपुव्विणं संपया हुत्था
 ॥ सू. २१७ ॥ उसभस्स णं अरहओ कोसलिअस्स नव सहस्सा

ओहिनाणीणं उक्कोसिया ओहिनाणीसंपया हुत्था ॥सू. २१८॥
उसभस्स णं अरहओ कोसलिअस्स वीस सहस्सा केवलनाणीणं
उक्कोसिया केवलनाणि-संपया हुत्था ॥सू. २१९॥ उसभस्स णं अर-
हओ कोसलिअस्स वीस सहस्सा छच्च सया वेउव्वियाणं उक्कोसिया
वेउव्विसंपया हुत्था ॥सू. २२०॥ उसभस्स णं अरहओ कोसलि-
अस्स बारस सहस्सा छच्च सया पण्णासा विउलमईणं अड्डाइज्जेसु
दीवेसु दोसु य समुद्देसु (दीवसमुद्देसु) सन्नीणं पंचिंदियाणं पज्जत्त-

गाणं मणोगणु भावे जाणमाणणं पासमाणणं उक्कोसिआ विउल-
मइ-संपया हुत्था ॥ सू. २२१ ॥ उसभस्स णं अरहओ कोसलियस्स
वारस सहस्सा छच्च सया पण्णासा वाईणं उक्कोसिया वाइसंपया
हुत्था ॥ सू. २२२ ॥ उसभस्स णं अरहओ कोसलिअस्स वीसं अंतेवासि-
सहस्सा सिद्धा, उसभस्स णं अरहओ कोसलिअस्स चत्तालीसं
अज्जिया-साहस्सीओ-(सहस्साओ) सिद्धाओ ॥ सू. २२३ ॥ उसभस्स
णं अरहओ कोसलिअस्स बावीस सहस्सा नव सया अणुत्तरोववाइ-

याणं गडकल्लाणाणं जाव भद्दाणं उक्कोसिया संपया हुत्था ॥ सू. २२४ ॥
उसभस्स णं अरहओ कोसल्लिअस्स दुविहा अंतगडभूमी हुत्था, तंजहा-
जुगंतगडभूमी परियायंतगडभूमी य, जाव असंखिज्जाओ पुरिस-
जुगाओ जुगंतगडभूमी, अंतोमुहुत्त-परियाए अंतमकासी ॥ सू. २२५ ॥

तेणं कालेणं तेणं समएणं उसभे णं अरहा कोसल्लिए वीसं
पुव्वसयसहस्साइं कुमारवासमज्झे वसित्ता, तेवट्ठिं पुव्वसयसहस्साइं
रज्जवासमज्झे वसित्ता, तेसीइं पुव्वसयसहस्साइं अगारवासमज्झे

वसित्ता, एगं वाससहस्सं छुउमत्थ-परिआयं पाउणित्ता, एगं पुव्वसय-
 सहस्सं वाससहस्सूणं केवलि-परिआयं पाउणित्ता पडिपुण्णं (संपुण्णं)
 पुव्व-सयसहस्सं सामण्ण-परियागं पाउणित्ता चउरासीइं पुव्वसयसह-
 स्साइं सव्वाउयं पालइत्ता, खीणे वेयणिज्जाउय-नाम-गुत्ते इमीसे
 ओसप्पिणीए सुसमदुस्समाए समाए बहुविइक्कंताए तिहिं वासेहिं
 अद्धनवमेहि य मासेहिं सेसेहिं, जे से हेमंताणं तच्चे मासे पंचमे
 पक्खे, माहबहुले तस्स णं माहबहुलस्स (ग्रंथाग्रं ९००) तेरसीपक्खे णं

उपिं अट्टावयसेलसिहरंसि दसहिं अणगारसहस्सेहिं सद्धिं चोदसमेणं
भत्तेणं अपाणएणं अभीइणा नक्खत्तेणं जोगमुवागएणं पुव्वण्ह-
कालसमयंसि संपलियंक-निसण्णे कालगए जाव सव्वदुक्खप्पहीणे
॥ सू. २२६ ॥ उसभस्स णं अरहओ कोसलियस्स जाव सव्वदुक्ख-
प्पहीणस्स तिणिण वासा अद्धनवमा य मासा विइक्कंता, तओवि परं
एगा सागरोवम-कोडाकोडी तिवास-अद्धनवम-मासाहिय-बायालीस-
वाससहस्सेहिं ऊणिया विइक्कंता, एयंमि समए समणे भगवं महावीरे

पडिनिव्वुडे, तओवि परं नववाससया विइक्कंता, दसमस्स य वाससयस्स
अयं असीइमे संवच्छरे काले गच्छइ ॥सू. २२७॥

॥ इति श्रीऋषभदेव-चरित्रं प्रथमं च जिनेन्द्र-चरित्राख्यं वाच्यम् ॥१॥



अथ स्थविरावली

तेणं कालेणं तेणं समएणं समणस्स भगवओ महावीरस्स नव

गणा, इक्कारस गणहरा होत्था ॥सू. १ ॥

से केणट्टेणं भंते ! एवं वुच्चइ ? समणस्स भगवओ महावीरस्स नव गणा, इक्कारस गणहरा होत्था ? ॥सू. २॥ समणस्स भगवओ महावीरस्स जिट्ठे इंदभूर्इ अणगारे गोयमे गुत्तेणं पंच समणसयाइं वाएइ, मज्झिमए अग्गिभूर्इ अणगारे गोयमे गुत्तेणं (गोयमगुत्ते. गोयमसगोत्ते णं) पंच समणसयाइं वाएइ, कणीयसे अणगारे वाउभूर्इ गोयमे गुत्तेणं पंच समणसयाइं वाएइ, थेरे अज्ज-

वियत्ते भारद्वाए गुत्तेणं पंच समणसयाइं वाएइ, थेरे अज्जसुहम्मे
 अग्गिवेसायणगुत्तेणं पंच समणसयाइं वाएइ, थेरे मंडियपुत्ते वासिट्ठ-
 गुत्तेणं अद्दुट्ठाइं समणसयाइं वाएइ, थेरे मोरियपुत्ते कासवगुत्तेणं
 अद्दुट्ठाइं समणसयाइं वाएइ, थेरे अकंपिए गोयमे गुत्तेणं, थेरे अयल-
 भाया हारियायणे गुत्तेणं, ते दुण्णिवि थेरा तिण्णि तिण्णि समणसयाइं
 वाइंति, थेरे मेयज्जे, थेरे पभासे, एए दुण्णिवि थेरा कोडिन्ना गुत्तेणं
 तिण्णि तिण्णि समणसयाइं वाइंति, से तेणट्ठेणं अज्जो ! एवं वुच्चइ-

समणस्स भगवओ महावीरस्स नव गणा, इक्कारस गणहरा होत्था
॥ सू. २३० ॥ सव्वे एते समणस्स भगवओ महावीरस्स एक्कारसवि
गणहरा दुवालसंगिणो चउदसपुव्विणो सम्मत्त-गणिपिडग-धारगा
रायगिहे नगरे मासिएणं भत्तेणं अपाणएणं कालगया जाव सव्व-
दुक्खप्पहीणा, थेरे इंदभूर्इ, थेरे अज्जसुहम्मे य सिद्धिं गए महावीरे
पच्छा दुण्णिवि थेरा परिनिव्वुया । जे इमे अज्जत्ताए समणा निग्गंथा
विहरंति, एए णं सव्वे अज्जसुहम्मस्स अणगारस्स आवच्चिज्जा,

अवसेसा गणहरा निरवच्चा वुच्छिन्ना ॥ सू. ४ ॥ समणे भगवं महावीरे
 कासवगुत्ते णं । समणस्स णं भगवओ महावीरस्स कासवगुत्तस्स
 अज्जसुहम्मे थेरे अंतेवासी अग्गिवेसायणगुत्ते १ । थेरस्स णं अज्ज-
 सुहम्मस्स अग्गिवेसायणगुत्तस्स अज्जजंबूनामे थेरे अंतेवासी कासवगुत्ते
 णं २ । थेरस्स णं अज्जजंबूणामस्स कासवगुत्तस्स अज्जप्पभवे थेरे
 अंतेवासी कच्चायणसगुत्ते ३ । थेरस्स णं अज्जप्पभवस्स कच्चायणस-
 गुत्तस्स अज्जसिज्जंभवे थेरे अंतेवासी मणगपिया वच्छसगोत्ते ४ । थेरस्स

णं अज्जसिज्जंभवस्स मणगपिउणो वच्छसगोत्तस्स अज्जजसभद्दे
थेरे अंतेवासी तुंगियायणसगोत्ते ५ ॥ सू. ५ ॥

संखित्तवायणाए अज्जजसभद्दाओ अग्गओ एवं थेरावली
भणिया, तं जहा-थेरस्स णं अज्जजसभद्दस्स तुंगियायणसगुत्तस्स
अंतेवासी दुवे थेरा-थेरे अज्जसंभूइविजए माढरसगुत्ते, थेरे अज्ज-
भद्दबाहू पाईणसगुत्ते ६ । थेरस्स णं अज्जसंभूइविजयस्स माढरस-
गुत्तस्स अंतेवासी थंरे अज्जथूलभद्दे गोयमसगुत्ते ७ । थेरस्स णं अज्ज-

थूलभद्रस्स गोयमसगुत्तस्स अंतेवासी दुवे थेरा-थेरे अज्जमहागिरी
 एलावच्चसगुत्ते, थेरे अज्जसुहत्थी वासिट्ठसगुत्ते ८ । थेरस्स णं अज्जसु-
 हत्थिस्स वासिट्ठसगुत्तस्स अंतेवासी दुवे थेरा सुट्ठिय-सुप्पडिबुद्धा
 कोडिय-काकंदगा वग्घावच्चस-गुत्ता ९ । थेराणं सुट्ठिय-सुप्पडिबुद्धाणं
 कोडिय-काकंदगाणं वग्घावच्चस-गुत्ताणं अंतेवासी थेरे अज्जइंददिन्ने
 कोसियगुत्ते १० । थेरस्स णं अज्जइंददिन्नस्स कोसियगुत्तस्य अंतेवासी
 थेरे अज्जदिन्ने गोयमसगुत्ते ११ । थेरस्स णं अज्जदिन्नस्स गोयम-

सगुत्तस्स अंतेवासी थेरे अज्जसीहगिरी जाइसरे कोसियसगुत्ते १२ ।
थेरस्स णं अज्जसीहगिरिस्स जाइस्सरस्स कोसियसगुत्तस्स अंतेवासी
थेरे अज्जवइरे गोयमसगुत्ते १३ । थेरस्स णं अज्जवइरस्स गोयम-
सगुत्तस्स अंतेवासी थेरे अज्जवइरसेणे उक्कोसियगुत्ते १४ । थेरस्स णं
अज्जवइरसेणस्स उक्कोसिअगुत्तस्स अंतेवासी चत्तारि थेरा-थेरे अज्ज-
नाइले १, थेरे अज्जपोमिले २, थेरे अज्जजयंते ३, थेरे अज्जतावसे
४, १५ । थेराओ अज्जनाइलाओ अज्जनाइला साहा निग्गया १,

थेराओ अ^उप्रपोमिलाओ अज्जपोमिला साहा निग्गया २, थेराओ
 अज्ज^अयंताओ अज्जजयंती साहा निग्गया ३, थेराओ अज्जतावसाओ
 अज्जतावसी साहा निग्गया ४ इति ॥ सू. ६ ॥

वित्थरवायणाए पुण अज्जजसभद्दाओ पुरओ थेरावली एवं
 प(वि)लोइज्जइ, तं जहा-थेरस्स णं अज्जजसभद्दस्स तुंगियायणस-
 गुत्तस्स इमे दो थेरा अंतेवासी अहावच्चा अभिण्णाया हुत्था, तं
 जहा-थेरे अज्जभद्दबाहू पाईणसगुत्ते, थेरे अज्जसंभूइ(अ)विजए

माढरुगुत्ते ६ ॥ सू. ७ ॥ थेरस्स णं अज्जभद्दबाहुस्स पाईणसगुत्तस्स
इमे चत्तारि थेरा अंतेवासी अहावच्चा अभिण्णाया हुत्था, तंजहा-
थेरे गोदासे १ थेरे अग्गिदत्ते २ थेरे जण्णदत्ते ३ थेरे सोमदत्ते ४
कासवगुत्ते णं १ । थेरेहिंतो गोदासेहिंतो कासवगुत्तेहिंतो इत्थ णं
गोदास-गणं नामं गणे निग्गए, तस्स णं इमाओ चत्तारि साहाओ
एवमाहिज्जंति, तं जहा-तामलित्थिया १ कोडिवरिसिया २ पौंड(पंडु)
वद्धणिया (पौंडवद्धया) ३ दासीखब्बडिया ४, २ । थेरस्स णं अज्ज-

संभूइविजयस्स माढरसगुत्तस्स इमे दुवालस थेरा अंतेवासी अहावच्चा
 अभिण्णाया हुत्था, तं जहा-नंदणभद्दु १ वनंदण-भद्दे २ तह तीस-
 भद्द ३ जसभद्दे ४ । थेरे य सुम(मि)णभद्दे ५ म(ग)णिभद्दे ६ पुण्णभद्दे
 ७ य ॥१॥ थेरे अ थूलभद्दे ८ उज्जुमई ९ जंबुनामधिज्जे १० य ।
 थेरे अ दीहभद्दे ११ थेरे तह पंडुभद्दे १२ य ॥२॥ ३ । थेरस्स णं
 अज्जसंभूइविजयस्स माढरसगुत्तस्स इमाओ सत्त अंतेवासिणीओ
 अहावच्चाओ अभिण्णायाओ हुत्था, तं जहा-जक्खा १ य जक्ख-

दिण्णा २ भूया ३ तह चेव भूयदिण्णा य ४ । सेणा ५ वेणा ६
रेणा ७ भइणीओ थूलभइस्स ॥ १ ॥ ४, ७ ॥ सू. ८ ॥ थेरस्स णं अज्ज-
थूलभइस्स गोयमसगुत्तस्स इमे दो थेरा अंतेवासी अहावच्चा अभि-
ण्णाया हुत्था, तंजहा-थेरे अज्जमहागिरी एलावच्चसगुत्ते १ थेरे
अज्जसुहत्थी वासिट्ठसगुत्ते २, १ । थेरस्स णं अज्जमहागिरिस्स
एलावच्चसगुत्तस्स इमे अट्ठ थेरा अंतेवासी अहावच्चा अभिण्णाया
हुत्था, तं जहा-थेरे उत्तरे १, थेरे बलिस्सहे २, थेरे घण्डे ३, थेरे

सिरिभद्रे ४, थेरे कोडिन्ने ५, थेरे नागे ६, थेरे नागमित्ते ७, थेरे
छडुलूए (छलूए) रोहगुत्ते कोसियगुत्ते णं ८, २। थेरेहिंतो णं छडुलू-
(छलू) एहिंतो रोहगुत्तेहिंतो कोसियगुत्तेहिंतो तत्थ णं तेरासीया
निग्गया ३। थेरेहिंतो णं उत्तरबलिस्सहेहिंतो तत्थ णं उत्तरबलिस्सहे
नामं गणे निग्गए, तस्स णं इमाओ चत्तारि साहाओ एवमाहि-
ज्जंति, तं जहा-कोसंबिया १, सुत्तिवत्तिया (सोइत्तिया) २, कोडं-
बाणी ३, चंदनागरी ४, ४॥८॥सू. ९॥ थेरस्स णं अज्जसुहत्थिस्स

वासिष्ठसगुत्तस्स इमे दुवालस थेरा अंतेवासी अहावच्चा अभिण्णाया
हुत्था, तं जहा-थेरे अ अज्जरोहणे १ भद्दजसे (जसभद्दे) २ मेह-
गणी य कामिड्डी ४ । सुट्टिय ५ सुप्पडिबुद्धे ६ रक्खिय ७ तह रोह-
गुत्ते ९ अ ॥१॥ इसिगुत्ते ९ सिरिगुत्ते १०, गणी य बंभे ११ गणी
य तह सोमे १२ । दस दो अ गणहरा खलु, एए सीसा सुहत्थिस्स
॥२॥ १ । थेरेहिंतो णं अज्जरोहणेहिंतो णं कासवगुत्तेहिंतो
णं तत्थ णं उद्देहगणे नामं गणे निग्गए, तस्सिमाओ

चत्वारि साहाओ निग्गयाओ छच्च कुलाइं एवमाहिज्जंति २ । से
किं तं साहाओ ? साहाओ एवमाहिज्जंति, तं जहा-उदुंबरिज्जिया
२, मासपूरिआ १, मइपत्तिया ३, पु(प)ण्णपत्तिया ४, से तं साहाओ
३ । से किं तं कुलाइं ? कुलाइं एवमाहिज्जंति, तं जहा-पढमं च
नागभूयं १, विअं पुण सोमभूइयं २ होइ । अह उल्लगच्छ तइअं ३,
चउत्थयं हत्थलिज्जं ४ तु ॥१॥ पंचमगं नंदिज्जं ५, छट्ठं पुण पारि-
हासयं ६ होइ । उद्देहगणस्सेए, छच्च कुला हुंति नायव्वा ॥२॥४।

थेरेहितो णं सिरिगुत्तेहितो हारियसगुत्तेहितो इत्थ णं चारणगणे नामं
गणे निग्गए, तस्स णं इमाओ चत्तारि साहाओ, सत्त य कुलाइं
एवमाहिज्जंति, ५ । से किं तं साहाओ ? साहाओ एवमाहिज्जंति,
तं जहा-हारिअ-मालागारी १, संकासीआ २ गवेधुया ३, विज्जनागरी
४, से तं साहाओ ६ । से किं तं कुलाइं ? कुलाइं एवमाहिज्जंति, तं
जहा-पढमित्थ वत्थलिज्जं १, बीयं पुण पीइधम्मिअं होइ २ । तइअं
पुण हालिज्जं ३, चउत्थयं पुसमित्तिज्जं ४ ॥ १ ॥ पंचमगं मालिज्जं

५, छट्ठं पुण अज्जवेडयं ६ होइ । सत्तमगं कण्हसहं ७, सत्त कुला
 चारणगणस्स ॥२॥ ७ । थेरेहिंतो णं भद्दजसेहिंतो भारद्दायस-गुत्ते-
 हिंतो इत्थ णं उडुवाडियगणे नामं गणे निग्गए, तस्स णं इमाओ
 चत्तारि साहाओ, तिण्णि कुलाइं एवमाहिज्जंति ८ । से किं तं साहाओ ?
 साहाओ एवमाहिज्जंति, तं जहा-चंपिज्जिया १ भद्दिज्जिया २
 काकंदिया ३ मेहलिज्जिया ४ से तं साहाओ ९ । से किं तं कुलाइं ?
 कुलाइं एवमाहिज्जंति, तंजहा-भद्दजसियं १ तह भद्दगुत्तियं २ तइअंच

होइ जसभदं ३ । एयाइं उडुवाडिय-गणस्स तिण्णेव य कुलाइं ॥ १ ॥

१० । थेरेहिंतो णं कामिड्डीहिंतो कोडालस-गुत्तोहिंतो इत्थ णं वेसवा-
डियगणे नामं गणे निग्गए, तस्स णं इमाओ चत्तारि साहाओ,
चत्तारि कुलाइं एवमाहिज्जंति ११ । से किं तं साहाओ ? साहाओ
एवमाहिज्जंति, तं जहा-सावत्थिया १ रज्जपालिआ २ अंतरिज्जिया
३ खेमलिज्जिया ४ से तं साहाओ १२ । से किं तं कुलाइं ? कुलाइं
एवमाहिज्जंति, तं जहा-गणियं १ मेहिअं २ कामड्ढियं ३ च तह होइ

इंदपुरगं ४ च । एयाइं वेसवाडिय-गणस्स चत्तारि उ कुलाइं ॥१॥
 १३ । थेरेहिंतो णं इसिगुत्तेहिंतो काकंदिएहिंतो वासिद्धसगुत्तेहिंतो इत्थ
 णं माणवगणे नामं गणे निग्गए, तस्स णं इमाओ चत्तारि साहाओ,
 तिण्णि य कुलाइं एवमाहिज्जंति १४ । से किं तं साहाओ ? साहाओ
 एवमाहिज्जंति, तंजहा-कासवज्जिया १ गोयमिज्जिया २ वासिद्धिया
 ३ सोरद्धिया ४, से तं साहाओ १५ । से किं तं कुलाइं ? कुलाइं एव-
 माहिज्जंति, तं जहा-इसिगुत्ति इत्थ पढमं १ बीयं इसिदत्तिअं मुणे-

यव्वं २ तइयं च अभिजयंतं ३ तिण्णि कुला माणवगणस्स ॥१॥

१६॥९॥ सू. १० ॥

थेरेहंतो सुट्ठिय-सुप्पडिबुद्धेहंतो कोडिय-काकंदएहंतो वग्घावच्च-
सगुत्तेहंतो इत्थ णं कोडियगणे नामं गणे निग्गए, तस्स णं इमाओ
चत्तारि साहाओ, चत्तारि कुलाइं च एवमाहिज्जंति १ । से किं तं
साहाओ ? साहाओ एवमाहिज्जंति, तं जहा-उच्चनागरी १ विज्जाहरी
य २ वइरी य ३ मज्झिमिह्ठा ४ य । कोडियगणस्स एया, हवंति

चत्तारि साहाओ ॥१॥ से तं साहाओ २ । से किं तं कुलाइं ? कुलाइं
 एवमाहिज्जंति, तं जहा-पढमित्थ बंभलिज्जं १ बिइयं नामेण वत्थ-
 लिज्जं तु । तइयं पुण वाणिज्जं ३ चउत्थयं पणहवाहणयं ४ ॥१॥३।
 थेराणं सुट्ठिय-सुप्पडिबुद्धाणं कोडियकाकंदगाणं वग्घावच्चसगुत्ताणं
 इमे पंच थेरा अंतेवासी अहावच्चा अभिण्णाया हुत्था, तं जहा-थेरे
 अज्जइंददिन्ने १ थेरे पियग्गंथे २ थेरे विज्जाहरगोवाले कासवगुत्ते
 णं ३ थेरे इसिदिन्ने (दत्ते) ४ थेरे अरिहदत्ते ५, ४ । थेरेहिंतो णं

पियग्गंथेहिंतो इत्थ णं मज्झिमा साहा निग्गया, थेरेहिंतो णं विज्जा
हर-गोवालेहिंतो कासवगुत्तेहिंतो इत्थ णं विज्जाहरी साहा निग्गया,
५ ॥ १० ॥ सू. ११ ॥ थेरस्स णं अज्जइंददिन्नस्स कासवगुत्तस्स अज्ज-
दिन्ने अंतेवासी गोयमसगुत्ते ११ ॥ सू. १२ ॥ थेरस्स णं अज्जदिन्नस्स
गोयमसगुत्तस्स इमे दो थेरा अंतेवासी अहावच्चा अभिण्णाया हुत्था,
तं जहा-थेरे अज्जसंतिसेणिए माढरसगुत्ते १ थेरे अज्जसीहगिरी
जाइस्सरे कोसियगुत्ते २, ९ । थेरेहिंतो णं अज्ज-संतिसेणिएहिंतो

माढरस-गुत्तेहितो इत्थ णं उच्चनागरी साहा निग्गया २ ॥ १२ ॥
 सू. १३ ॥ (२४०) ॥ थेरस्स णं अज्जसंतिसेणियस्स माढरसगुत्तस्स
 इमे चत्तारि थेरा अंतेवासी अहावच्चा अभिण्णाया हुत्था, तंजहा-
 (ग्रंथाग्रं १०००) थेरे अज्जसेणिए १ थेरे अज्जतावसे २ थेरे अज्ज-
 कुबेरे ३ थेरे अज्जइसिपालिए ४, १ थेरेहितो णं अज्जसेणिएहितो
 इत्थ णं अज्जसेणिया साहा निग्गया, थेरेहितो णं अज्जतावसेहितो
 इत्थ णं अज्जतावसी साहा निग्गया, थेरेहितो णं अज्जकुबेरेहितो

इत्थ णं अज्जकुबेरी साहा निग्गया, थेरेहिंतो णं अज्ज-इसिपालिए-
हिंतो इत्थ णं अज्जइसिवालिया साहा निग्गया २ । थेरस्स णं अज्ज-
सीहगिरिस्स जाइस्सरस्स कोसियगुत्तस्स इमे चत्तारि थेरा अंतेवासी
अहावच्चा अभिण्णाया हुत्था, तं जहा-थेरे धणगिरी थेरे अज्जवइरे
थेरे अज्जसमिए थेरे अरिहदिन्ने ३ ॥ थेरेहिंतो णं अज्जसमिएहिंतो
गोयमसगुत्तेहिंतो इत्थ णं बंभदीविया साहा निग्गया, थेरेहिंतो णं
अज्जवयरेहिंतो गोयमसगुत्तेहिंतो इत्थ णं अज्जवइरी साहा निग्गया

४ । १३ ॥ सू. १४ ॥ थेरस्स णं अज्जवड्ढरस्स गोयमसगुत्तस्स इमे
 तिण्णि थेरा अंतेवासी अहावच्चा अभिण्णाया हुत्था, तं जहा-थेरे
 अज्जवड्ढरसेणिए थेरे अज्जपउमे थेरे अज्जरहे १४ ॥ सू. १५ ॥

थेरेहिंतो णं अज्जवड्ढरसेणिएहिंतो इत्थ णं अज्जनाइली
 साहा निग्गया, थेरेहिंतो णं अज्जपउमेहिंतो इत्थ णं अज्ज-
 पउमा साहा निग्गया, थेरेहिंतो णं अज्जरहेहिंतो इत्थ णं अज्ज-
 जयंती साहा निग्गया १५ ॥ सू. १६ ॥ थेरस्स णं अज्जरहस्स

वच्छसगुत्तस्स अज्जपूसगिरी थेरे अंतेवासी कोसियगुत्ते १६ ॥ सू.
१७ ॥ थेरस्स णं अज्जपूसगिरिस्स कोसियगुत्तस्स अज्जफग्गुमित्ते
थेरे अंतेवासी गोयमसगुत्ते १७ ॥ सू. १८ ॥ थेरस्स णं अज्जफग्गु-
मित्तस्स गोयमसगुत्तस्स अज्जधणगिरी थेरे अंतेवासी वासिट्ठसगुत्ते
१८ ॥ सू. १९ ॥ थेरस्स णं अज्जधणगिरिस्स वासिट्ठसगुत्तस्स अज्ज-
सिवभूई थेरे अंतेवासी कुच्छसगुत्ते १९ ॥ सू. २० ॥ थेरस्स णं अज्ज-
सिवभूइस्स कुच्छसगुत्तस्स अज्जभहे थेरे अंतेवासी कासवगुत्ते २०

॥ सू. २१ ॥ थेरस्स णं अज्जभद्दस्स कासवगुत्तस्स अज्जनक्खत्ते
 थेरे अंतेवासी कासवगुत्ते २१ ॥ सू. २२ ॥ थेरस्स णं अज्जनक्खत्तस्स
 कासवगुत्तस्स अज्जरक्खे थेरे अंतेवासी कासवगुत्ते २२ ॥ सू. २३ ॥
 थेरस्स णं अज्जरक्खस्स कासवगुत्तस्स अज्जनागे थेरे अंतेवासी
 गोअमसगुत्ते २३ ॥ सू. २४ ॥ थेरस्स णं अज्जनागस्स गोयमसगुत्तस्स
 अज्जजेहिले थेरे अंतेवासी वासिट्ठसगुत्ते २४ ॥ सू. २५ ॥ थेरस्स णं
 अज्जजेहिलस्स वासिट्ठसगुत्तस्स अज्जविण्हू थेरे अंतेवासी माढरस-

गुत्ते २५ ॥ सू. २६ ॥ थेरस्स णं अज्जविण्हस्स माढरसगुत्तस्स अज्ज-
कालए थेरे अंतेवासी गोयमसगुत्ते २६ ॥ सू. २७ ॥ थेरस्स णं अज्ज-
कालियस्स गोयमसगुत्तस्स इमे दो (दुवे) थेरा अंतेवासी गोयमस-
गुत्ता-थेरे अज्जसंपल्लिए १ थेरे अज्जभद्दे २, २७ ॥ सू. २८ ॥ एएसि
णं दुण्हं थेराणंवि गोयमसगुत्ताणं अज्जवुड्ढे थेरे अंतेवासी गोयमस-
गुत्ते २८ ॥ सू. २९ ॥ थेरस्स णं अज्जवुड्ढस्स गोयमसगुत्तस्स अज्ज-
संघपालिए थेरे अंतेवासी गोयमसगुत्ते २९ ॥ सू. ३० ॥ थेरस्स णं

अज्जसंघपालिअस्स गोयमसगुत्तस्स अज्जहत्थी थेरे अंतेवासी कासव-
 गुत्ते ३० ॥सू.३१॥ थेरस्स णं अज्जहत्थिस्स कासवगुत्तस्स अज्जधम्मे
 थेरे अंतेवासी सुव्वय(सावय) गुत्ते ३१ ॥सू. ३२॥ थेरस्स णं अज्ज-
 धम्मस्स सुव्वय(सावय) गुत्तस्स अज्जसीहे थेरे अंतेवासी कासवगुत्ते ३२
 ॥सू.३३॥(२५०) थेरस्स णं अज्जसीहस्स कासवगुत्तस्स अज्जधम्मे थेरे
 अंतेवासी कासवगुत्ते ३३ ॥सू. ३४॥ थेरस्स णं अज्जधम्मस्स
 कासवगुत्तस्स अज्जसंडिल्ले थेरे अंतेवासी ३४ ॥सू. ३५॥

वंदामि 'फग्गुमित्तं' च, गोयमं ३७ घणगिरिं' च वासिट्ठं १८ ।
कुच्छं 'सिवभूइं'पि य १९ कोसिय दुज्जंतकण्हे य ॥१॥ ते वंदिऊण
सिरसा, 'भइं' वंदामि कासवं गोत्तं (कासवसगुत्तं) २० । 'नक्खं'
कासवगुत्तं, २१ 'रक्खं' पि य कासवं २२ वंदे ॥२॥ वंदामि 'अज्ज-
नागं' २३ च, गोयमं 'जेहिलं' च वासिट्ठं २४ । विण्हुं' माढरगुत्तं,
२५ 'कालग'मवि गोयमं २६ वंदे ॥३॥ गोयमगुत्तकुमारं 'संपलियं'
२७ तहय 'भइयं' वंदे । थेरं च 'अज्जवुड्ढं' २८ गोयमगुत्तं नमं-

सामि ॥४॥ तं वंदिऊण सिरसा, थिरसत्त-चरित्त-नाणसंपन्नं । थेरं च
 'संघवालिय' गोयमगुत्तं पणिवयामि २९ ॥५॥ वंदामि 'अज्जहत्थि'
 च, कासवं खंतिसागरं धीरं । गिम्हाण पढममासे, कालगयं चैव सुद्ध-
 स्स ३० ॥६॥ वंदामि 'अज्जधम्मं' च, सुव्वयं सील-लद्धिसंपन्नं ।
 जस्स निक्खमणे देवो, छत्तं वरमुत्तमं वहइ ३१ ॥७॥ 'हत्थि' (हत्थं)
 कासवगुत्तं, धम्मं सिवसाहगं पणिवयामि । 'सीहं' कासवगुत्तं, ३२
 'धम्मं' पि य कासवं ३३ वंदे ॥८॥ तं वंदिऊण सिरसा, थिरसत्त-

चरित्त-नाणसंपन्नं । थेरं च 'अज्जजंबुं', गोयमगुत्तं नमंसामि ३४
॥९॥ मिउ-मद्व-संपन्नं, उवउत्तं नाण-दंसण-चरित्ते । थेरं च 'नंदियं'
पि य', कासवगुत्तं पणिवयामि ३५ ॥१०॥ तत्तो य थिरचरित्तं,
उत्तम-सम्मत्त-सत्तसंजुत्तं । 'देवड्ढिगणि-खमासमणं', माढरगुत्तं नमं-
सामि ३६ ॥११॥ तत्तो अणुओगधरं, धीरं मइसागरं महासत्तं ।
थिरगुत्त-खमासमणं, वच्छसगुत्तं पणिवयामि ३७ ॥१२॥ तत्तो य
नाण-दंसण-चरित्त-तव-सुट्टियं गुणमहंतं । थेरं 'कुमारधम्मं,' वंदामि

गणिं गुणोववेयं ३८ ॥१३॥ सुत्तत्थ-रयण-भरिए, खम-दम-मद्व-
गुणेहिं संपन्ने । 'देविड्ढि-खमासमणे,' कासवगुत्ते पणिवयामि ३९ ॥ १४ ॥

॥ इति स्थविरावली नामकं द्वतीयं वाच्यम् ॥२॥



॥ अथ सामाचारी ॥

तेणं कालेणं तेणं समएणं समणे भगवं महावीरे वासाणं सवी-
सइराए मासे विड्कंते वासावासं पज्जोसवेइ ॥ सू. १ ॥ से केणट्टेणं

भंते ! एवं वुच्चइ ? समणे भगवं महावीरे वासाणं सवीसइराए
मासे विइक्कंते वासावासं पज्जोसवेइ ? जओ णं पाएणं अगारीणं
अगाराइं कडियाइं उक्कंपियाइं छन्नाइं लित्ताइं गुत्ताइं घट्टाइं मट्टाइं
संपधूमियाइं खाओदगाइं खायनिद्धमणाइं अप्पणो अट्टाए कडाइं
परिभुत्ताइं परिणामियाइं भवंति, से तेणट्ठेणं एवं वुच्चइ समणे
भगवं महावीरे वासाणं सवीसइराए मासे विइक्कंते वासावासं पज्जो-
सवेइ ॥ सू. २ ॥

जहा णं समणे भगवं महावीरे वासाणं सर्वासइराए मासे विइ-
 कंते वासावासं पज्जोसवेइ, तथा णं गणहरावि वासाणं सर्वासइराए
 मासे विइकंते वासावासं पज्जोसविंति ॥सू. ३॥ जहा णं गणहरा
 वासाणं सर्वासइराए जाव पज्जोसविंति, तथा णं गणहरसीसावि
 वासाणं जाव पज्जोसविंति ॥सू. ४॥ जहा णं गणहरसीसा वासाणं
 जाव पज्जोसविंति, तथा णं थेरावि वासाणं जाव पज्जोसविंति ॥सू. ५॥
 जहा णं थेरा वासाणं जाव पज्जोसविंति, तथा णं जे इमे अज्जत्ताए

समणा निग्गंथा विहरंति, एएवि (तेवि) अ णं वासाणं जाव पज्जो-
सविं(वे)ति ॥ सू. ६ ॥ जहा णं जे इमे अज्जत्ताए समणा निग्गंथा
वासाणं सवीसइराए मासे विइक्कंते वासावासं पज्जोसविति, तथा णं
अम्हंपि आयरिया उवज्झाया वासाणं जाव पज्जोसविति ॥ सू. ७ ॥
जहा णं अम्हं आयरिया उवज्झाया वासाणं जाव पज्जोसविति,
तथा णं अम्हेवि वासाणं सवीसइराए मासे विइक्कंते वासावासं पज्जो-
सवेमो, अंतरावि य से कप्पइ, नो से कप्पइ तं रयाणि उवायणा-

वित्तए ॥ सू. ८ (२६०) ॥

वासावासं पज्जोसवियाणं कप्पइ निग्गंथाण वा निग्गंथीण वा
 सब्बओ समंता सक्कोसं जोयणं ओग्गहं ओगिण्हित्ता णं चिट्ठिउं
 अहालंदमवि ओग्गहे ॥ सू. ९ ॥ वासावासं पज्जोसवियाणं कप्पइ
 निग्गंथाण वा निग्गंथीण वा सब्बओ समंता सक्कोसं जोयणं भिक्खा-
 यरियाए गंतुं पडिनियत्तए ॥ सू. १० ॥ जत्थ नई निच्चोयगा निच्च-
 संदणा, नो से कप्पइ सब्बओ समंता सक्कोसं जोयणं भिक्खायरियाए

गंतुं पडिनियत्तए ॥ सू. ११ ॥ एरावई कुणालाए, जत्थ चक्किया
सिया, एगं पायं जले किच्चा एगं पायं थले किच्चा-एवं चक्किया
एवं णं कप्पइ सव्वओ समंता सक्कोसं जोयणं भिक्खायरियाए गंतुं
पडिनियत्तए ॥ सू. १२ ॥ एवं च नो चक्किया, एवं से नो कप्पइ
सव्वओ समंता सक्कोसं जोयणं भिक्खायरियाए गंतुं पडिनियत्तए
॥ सू. १३ ॥

वासावासं पज्जोसवियाणं अत्थेगइयाणं एवं वुत्तपुव्वं भवइ-

दावे भंते ! एवं से कप्पइ दावित्तए, नो से कप्पइ पडिगाहित्तए
 ॥सू. १४॥ वासावासं पज्जोसवियाणं अत्थेगइयाणं एवं वुत्तपुव्वं
 भवइ-पडिगाहेहि भंते ! एवं से कप्पइ पडिगाहित्तए, नो से कप्पइ
 दावित्तए ॥सू. १५॥ वासावासं पज्जोसवियाणं अत्थेगइयाणं एवं
 वुत्तपुव्वं, भवइ दावे भंते ! पडिगाहेहि भंते ! एवं से कप्पइ दावि-
 त्तएवि पडिगाहित्तएवि ॥सू. १६॥ वासावासं पज्जोसवियाणं नो
 कप्पइ निग्गंथाण वा निग्गंथीण वा हट्ठाणं तुट्ठाणं आरो(रु)ग्गाणं

(अरोगाणं) बलियसरीराणं इमाओ नव रसविगइओ अभिक्खणं
अभिक्खणं आहारित्तए, तं जहा-खीरं १, दहिं २, नवणीयं ३,
सप्पिं ४, तिळ्ळं ५, गुडं ६, महुं ७, मज्जं ८, मंसं ९, ॥ सू. १७ ॥

वासावासं पज्जोसवियाणं अत्थेगइयाणं एवं वुत्तपुव्वं भवइ, अट्ठो
भंते ! गिलाणस्स ? से य वएज्जा अट्ठो, से अ पुच्छियव्वो-केवइएणं
अट्ठो ? से य वए(इ)ज्जा-एवइएणं अट्ठो गिलाणस्स, जं से पमाणं
वयइ से य पमाणओ धित्तव्वे, से य विन्नविज्जा, से य विन्नवेमाणे

लभिज्जा, से य पमाणपत्ते होउ अलाहिइय वत्तव्वं, सिआ, से
किमाहु ? भंते !, एवइएणं अट्ठो गिलाणस्स, सिया णं एवं वयंतं परो
वइज्जा -पडिगाहेह अज्जो ! पच्छा तुमं भोक्खसि वा पा(दा)हिसि
वा, एवं से कप्पइ पडिगाहित्तए, नो से कप्पइ गिलाणनीसाए पडिगा-
हित्तए ॥ सू. १८ (२७०) ॥ वासावासं पज्जोसविआणं अत्थि णं थेराणं
तहप्पगाराइं कुलाइं कडाइं पत्तियाइं थिज्जाइं वेसासियाइं सम्मयाइं
बहुमयाइं अणुमयाइं भवंति, त(ज)त्थ से नो कप्पइ अदक्खु वइत्तए-

अत्थि ते आउसो ! इमं वा इमं वा, से किमाहु ? भंते !, सङ्घी गिही
गिण्हइ वा, तेणियंपि कुज्जा ॥ सू. १९ ॥

वासावासं पज्जोसवियस्स निच्चभत्तियस्स भिक्खुस्स कप्पइ एगं
गोयरकालं गाहावइकुलं भत्ताए वा पाणाए वा निक्खमित्तए वा पवि-
सित्तए वा, नन्नत्थायरिय-वेयावच्चेण वा एवं उवज्झाय-वेयावच्चेण वा,
तवस्सि-वेयावच्चेण वा, गिलाण-वेयावच्चेण वा, खुड्डुएण वा खुड्डिड-
याएण वा अब्वंजण-जायएण वा ॥ सू. २० ॥ वासावासं पज्जोसवियस्स

चउत्थभत्तियस्स भिक्खुस्स अयं एवइए विसेसे-जं से पाओ निक्खम्म
 पुव्वामेव वियडगं भुच्चा पिच्चा पडिग्गहगं संलिहिय संपमज्जिय
 से य संथरिज्जा, कप्पइ से तद्विसं तेणेव भत्तट्टेणं पज्जोसवितए-से
 य नो संथरिज्जा , एवं से कप्पइ दुच्चंपि गाहावइकुलं भत्ताए वा
 पाणाए वा निक्खमित्तए वा पविसित्तए वा ॥ सू. २१ ॥

वासावासं पज्जोसवियस्स छट्ठभत्तियस्स भिक्खुस्स कप्पंति दो
 गोयरकाला गाहावइकुलं भत्ताए वा पाणाए वा निक्खमित्तए वा

पविसित्तए वा ॥ सू. २२ ॥ वासावासं पज्जोसवियस्स अट्टमभत्तियस्स
भिक्षुस्स कप्पंति तओ गोअरकाला गाहावड्कुलं भत्ताए वा पाणाए
वा निक्खमित्तए वा पविसित्तए वा ॥ सू. २३ ॥ वासावासं पज्जोस-
वियस्स विगिट्ठभत्तियस्स भिक्षुस्स कप्पंति सव्वेवि गोअरकाला
गाहावड्कुलं भत्ताए वा पाणाए वा निक्खमित्तए वा पवि-
सित्तए वा ॥ सू. २४ ॥

वासावासं पज्जोसवियस्स निच्चभत्तियस्स भिक्षुस्स कप्पंति

सव्वाइं पाणगाइं पडिगाहित्तए । वासावासं पज्जोसवियस्स चउत्थ-
 भत्तियस्स भिक्खुस्स कप्पंति तओ पाणगाइं पडिगाहित्तए । तंजहा-
 उस्सेइमं, संसेइमं, चाउलोदगं १ । वासावासं पज्जोसवियस्स छट्ठ-
 भत्तियस्स भिक्खुस्स कप्पंति तओ पाणगाइं पडिगाहित्तए, तं जहा-
 तिलोदगं वा, तुसोदगं वा, जवोदगं वा २ । वासावासं पज्जोसवियस्स
 अट्ठमभत्तियस्स भिक्खुस्स कप्पंति तओ पाणगाइं पडिगाहित्तए,
 तंजहा-आयामे(मं) वा, सोवीरे(रं) वा, सुद्धवियडे(डं) वा

३। वासावासं पज्जोसवियस्स विगिट्ठभत्तियस्स भिक्खुस्स कप्पइ
एगे उसिण-वियडे पडिगाहत्तए से वि य णं असित्थे नोवि य णं
ससित्थे ४। वासावासं पज्जोसवियस्स भत्तपडियाइक्खियस्स भिक्खुस्स
कप्पइ एगे उसिणवियडे पडिगाहत्तए, सेवि य णं असित्थे नो
चेव (नोऽवि य) णं ससित्थे सेवि य णं परिपूए नो चेव णं अपरिपूए,
सेवि य णं परिमिए नो चेव णं अपरिमिए, सेवि अ णं बहुसंपन्ने नो
चेव णं अबहुसंपन्ने ॥ सू. २५ ॥

वासावासं पज्जोसविअस्स संखादत्तियस्स भिक्खुस्स कप्पंति
 पंच दत्तीओ भोयणस्स पडिगाहित्तए पंच पाणगस्स, अहवा चत्तारि
 भोयणस्स पंच पाणगस्स, अहवा पंचभोअणस्स चत्तारि पाणगस्स
 १ । तत्थ णं एगा दत्ती लोणासायण-मित्तमवि पडिगाहिआ सिआ,
 कप्पइ से तद्विवसं तेणेव भत्तट्ठेणं पज्जोसवित्तए, नो से
 कप्पइ दुच्चंपि गाहावइकुलं भत्ताए वा पाणाए वा निक्खमित्तए वा
 पविसित्तए वा २ ॥ सू. २६ ॥ वासावासं पज्जोसवियाणं नो कप्पइ

निग्गंथाण वा निग्गंथीण वा जाव उवस्सयाओ सत्तघरंतरं संखडिं
संनियट्टचारिस्स ए(इ)त्तए, एगे पुण एवमाहंसु-नो कप्पइ जाव
उवस्सयाओ परेणं सत्तघरंतरं संखडिं संनियट्ट-चारिस्स एत्तए, एगे
पुण एवमाहंसु-नो कप्पइ जाव उवस्सयाओ परंपरेणं संखडिं सन्नि-
यट्ट-चारिस्स ए(इ)त्तए ॥ सू. २७ ॥

वासावासं पज्जोसवियस्स नो कप्पइ पाणिपडिग्गहियस्स
भिकखुस्स कणग-फुसिय-मित्तमवि बुट्टिकायांसि निवयमाणंसि जाव

गाहावडकुलं भत्ताए वा पाणाए वा निक्खमित्तए वा पविसित्तए
 वा ॥ सू. २८ (२८०) ॥ वासावासं पज्जोसवियस्स पाणिपडिग्ग-
 हियस्स भिक्खुस्स नो कप्पइ अगिहांसि पिंडवायं पडिगाहित्ता पज्जो-
 सवित्तए, पज्जोसवेमाणस्स सहसा वुट्टिकाए निवइज्जा देसं भुच्चा
 देसमादाय से पाणिणा पाणिं परिपिहित्ता उरंसि वा णं निलिज्जा
 (निलिज्जिज्जा), कक्खंसि वा णं समाहाडिज्जा, अहाल्लन्नाणि वा
 लेणाणि वा उवागच्छिज्जा, रुक्खमूलाणि वा उवागच्छिज्जा, जहा

से तत्थ पाणिसि दगे वा दगरए वा दगफुसिआ वा णो परियावज्जई
॥ सू. २९ ॥ वासावासं पज्जोसवियस्स पाणिपडिग्गहियस्स भिक्खुस्स जं
किंचि कणगफुसियमित्तंपि निवडेइ, नो से कप्पइ गाहावइकुलं
भत्ताए वा पाणाए निक्खमित्तए वा पविसित्तए वा ॥ सू. ३० ॥
वासावासं पज्जोसवियस्स पडिग्गहधारिस्स भिक्खुस्स नो कप्पइ
वग्धारिय-वुट्टिकायंसि गाहावइकुलं भत्ताए वा पाणाए वा निक्ख-
मित्तए वा पविसित्तए वा, कप्पइ से अप्पवुट्टिकायंसि संतरुत्तरंसि

गाहावड्कुलं भत्ताए वा पाणाए वा निक्खमित्तए वा पविसित्तए वा
 ॥ सू. ३१ ॥ (ग्रं. ११००) वासावासं पज्जोसवियस्स निगं-
~~थीए~~ वा गाहावड्कुलं पिंडवायपडिआए अणुप्पविट्ठस्स निगि-
 जिझय निगिज्झिय वुट्टिकाए निवड्ज्जा, कप्पड् से अहे आरामंसि
 वा, अहे उवस्सयंसि वा, अहे वियडगिहंसि वा, अहे रुक्खमूलंसि
 वा उवागच्छित्तए ॥ सू. ३२ ॥ तत्थ से पुव्वागमणेणं पुव्वाउत्ते
 चाउलोदणे पच्छाउत्ते भिलिंगसूवे, कप्पड् से चाउलोदणे पडिगा-

हित्तए, नो से कप्पइ भिलिंगसूवे पडिगाहित्तए ॥ सू. ३३ ॥ तत्थ से
पुव्वागमणेणं पुव्वाउत्ते भिलिंगसूवे पच्छाउत्ते चाउलोदणे, कप्पइ
से भिलिंगसूवे पडिगाहित्तए, नो से कप्पइ चाउलोदणे पडिगाहित्तए
॥ सू. ३४ ॥ तत्थ से पुव्वागमणेणं दोवि पुव्वाउत्ताइं कप्पंति से
दोवि पडिगाहित्तए । तत्थ से पुव्वागमणेणं दोवि पच्छात्ताइं, एवं नो
से कप्पंति दोवि पडिगाहित्तए, जे से तत्थ पुव्वागमणेणं पुव्वाउत्ते
से कप्पइ पडिगाहित्तए, जे से तत्थ पुव्वागमणेणं पच्छाउत्ते,
नो से कप्पइ पडिगाहित्तए ॥ सू. ३५ ॥ वासावासं पज्जोसवियस्स

निगंगथस्स निगंगंथीए वा गाहावइकुलं पिंडवायपडियाए अणुप-
विट्ठस्स निगिज्झिय निगिज्झिय वुट्टिकाए निवइज्जा, कप्पइ से अहे
आरामंसि वा अहे उवस्सयंसि वा अहे वियडगिहंसि वा अहे रुक्ख-
मूलंसि वा उवागच्छित्तए, नो से कप्पइ पुव्वगहिएणं भत्तपाणेणं
वेलं उवायणावित्तए, कप्पइ से पुव्वामेव वियडगं भुच्चा पिच्चा
पडिग्गहगं संलिहियं संलिहिय संपमज्जिय संपमज्जिय एगाययं
भंडगं कट्टु सावसेसे सूरे जेणेव उवस्सए तेणेव उवागच्छित्तए, नो से

कप्पइ तं र्याणिं तत्थेव उवायणावित्तए ॥ सू. ३६ ॥ वासावासं
पज्जोसवियस्स निग्गंथस्स निग्गंथीए वा गाहावडकुलं पिंडवाय-
पडियाए अणुपविट्ठस्स निगिज्झिय निगिज्झिय वुट्टिकाए निवइज्जा,
कप्पइ से अहे आरामंसि वा अहे उवस्सयंसि वा उवागच्छित्तए
॥ सू. ३७ ॥ तत्थ नो से कप्पइ एगस्स निग्गंथस्स एगाए य निग्गं-
थीए एगओ (एगयओ) चिट्ठित्तए १, तत्थ नो कप्पइ एगस्स
निग्गंथस्स दुण्हं निग्गंथीणं एगओ चिट्ठित्तए २, तत्थ नो कप्पइ

दुण्हं निग्गंथाणं एगाए य निग्गंथीए एगयओ चिट्ठिए ३, तत्थ
 नो कप्पइ दुण्हं निग्गंथाणं दुण्हं निग्गंथीण य एगयओ चिट्ठिए
 ४, अत्थि य इत्थ केइ पंचमे खुड्डए वा खुड्डिया इ वा, अन्नेसिं
 वा संलोए सपडिदुवारे एवं ण्हं कप्पइ एगयओ चिट्ठिए
 ॥ सू. ३८ (२९०) ॥ वासावासं पज्जोसवियस्स निग्गंथस्स गाहाव-
 इकुलं पिंडवायपडियाए अणुपविट्ठस्स निगिज्झिए निगिज्झिए वुट्ठि-
 काए निवइज्जा, कप्पइ से अहे आरामंसि वा अहे उवस्सयांसि वा

उवागच्छित्तए, तत्थ नो कप्पइ एगस्स निग्गंथस्स एगाए य अगारीए
एगयओ चिट्ठित्तए, एवं चउभंगी। अत्थि णं इत्थ केइ पंचमए थेरे
वा थेरिया वा अन्नेसिं वा संलोए सपडिदुवारे, एवं से कप्पइ एग-
यओ चिट्ठित्तए । एवं चेव निग्गंथीए अगारिस्स य भाणियव्वं
॥ सू. ३९ ॥ वासावासं पज्जोसवियाणं नो कप्पइ निग्गंथाण वा
निग्गंथीण वा अपरिण्णएणं अपरिण्णयस्स अट्ठाए असणं वा पाणं
वा खाइमं वा साइमं वा जाव पडिगाहित्तए ॥ सू. ४० ॥ से किमाहु

भंते ? इच्छा परो अपरिण्णए भुंजिज्जा, इच्छा परो न भुंजिज्जा
 ॥ सू. ४१ ॥ वासावासं पज्जोसवियाणं नो कप्पइ निग्गंथाण वा
 निग्गंथीण वा उदउल्लेण वा ससिणिद्धेण वा काएणं असणं वा पाणं वा
 खाइमं वा साइमं वा आहारित्तए ॥ सू. ४२ ॥ से किमाहु भंते ! सत्त
 सिणेहाययणा पणत्ता, तं जहा-पाणी १, पाणिलेहा २, नहा ३,
 नहसिहा ४, भमुहा ५, अहरुट्ठा ६, उत्तरोट्ठा ७ । अह पुण एवं
 जाणिज्जा-विगओदगे मे काए छिन्नसिणेहे, एवं से कप्पइ असणं

वा १ पाणं वा २ खाइमं वा ३ साइमं वा ४ आहारित्तए ॥ सू. ४३ ॥
वासावासं पज्जोसवियाणं इह खलु निग्गंथाण वा निग्गंथीण वा
इमाइं अट्ट सुहुमाइं, जाइं छउमत्थेणं निग्गंथेण वा निग्गंथीए वा
अभिकखणं २ जाणियव्वाइं पासिअव्वाइं पडिलेहियव्वाइं भवंति,
तंजहा-पाणसुहुमं १ पणगसुहुमं २, बीअसुहुमं ३, हरियसुहुमं ४, पुप्फ-
सुहुमं ५, अंडसुहुमं ६, लेणसुहुमं ७, सिणेहसुहुमं ८ ॥ सू. ४४ ॥ से
किं तं पाणसुहुमे ? पाणसुहुमे पंचविहे पन्नत्ते, तं जहा-किण्हे १,

नीले २, लोहिए ३, हालिहे ४, सुक्लिहे ५ । अत्थि कुंथु अणुद्धरी
नामं (नाम समुप्पन्ना) जा द्विया अचलमाणा छउमत्थाणं निग्गंथाण
वा निग्गंथीण वा नो चक्खुफासं हव्वमागच्छइ, जा अद्विया चल-
माणा छउमत्थाणं निग्गंथाण वा निग्गंथीण वा चक्खुफासं हव्वमाग-
च्छइ, जाव छउमत्थेणं निग्गंथेणं वा निग्गंथीए वा अभिक्खणं
अभिक्खणं जाणियव्वा पासियव्वा पडिलेहियव्वा हवइ, से तं पाण-
सुहुमे १ । से किं तं पणगसुहुमे ? पणगसुहुमे पंचविहे पणत्ते, तंजहा-

किण्हे, नीले, लोहिए, हालिद्दे, सुक्लिडे । अत्थि पणगसुहुमे तद्वव-
समाण-वण्णे नामं पण्णते, जे छउमत्थेणं निग्गंथेण वा निग्गंथीए
वा जाव पडिलेहिअव्वे भवइ, से तं पणगसुहुमे २ ॥ से किं तं
बीअसुहुमे ? बीयसुहुमे पंचविहे पण्णते, तंजहा-किण्हे जाव सुक्लिडे ।
अत्थि बीअसुहुमे कणिया-समाण-वण्णए नामं पण्णत्ते, जे छउमत्थेणं
निग्गंथेण वा निग्गंथीए वा जाव पडिलेहियव्वे भवइ, से तं बीअ-
सुहुमे ३ । से किं तं हरियसुहुमे हरियसुहुमे पंचविहे पण्णत्ते, तंजहा-

किण्हे जाव सुक्लिडे । अत्थि हरिसुहुमे पुढवी-समाण-वण्णए नामं पण्णत्ते, जे निग्गंथेण वा निग्गंथीए वा अभिक्खणं अभिक्खणं जाणियव्वे पासियव्वे पडिलेहियव्वे भवइ, से तं हरिसुहुमे ४ । से किं तं पुप्फसुहुमे ॥ पुप्फसुहुमे पंचविहे पण्णत्ते, तंजहा-किण्हे जाव सुक्लिडे । अत्थि पुप्फसुहुमे रुक्खसमाणवण्णे नामं पण्णत्ते, जे छउमत्थेणं निग्गंथेणं वा निग्गंथीए वा जाणियव्वे जाव पडिलेहियव्वे भवइ, से तं पुप्फसुहुमे ५ । से किं तं अंडसुहुमे ॥ अंडसुहुमे पंच-

विहे पणत्ते, तंजहा-उदंसंडे, उक्कलियंडे, पिपीलिअंडे, हलिअंडे, हळो-
हलिअंडे, जे निग्गंथेण वा निग्गंथीए वा जाव पडिलेहियव्वे भवइ,
से तं अंडेसुहुमे ६ । से किं तं लेणसुहुमे ॥ लेणसुहुमे पंचविहे पणत्ते,
तंजहा-उत्तिंगलेणे, भिंगुलेणे, उज्जुए, तालमूलए, संबुक्कावट्टे नामं
पंचमे, जे छउमत्थेणं निग्गंथेण वा निग्गंथीए वा जाणियव्वे जाव
पडिलेहियव्वे भवइ, से तं लेणसुहुमे ७ । से किं तं सिणेहसुहुमे ?
सिणेहसुहुमे पंचविहे पणत्ते, तंजहा-उस्सा, हिमए, महिया, करए

हरतणुए । जे छउमत्थेणं निग्गंथेणं वा निग्गंथीए वा अभिक्खणं
अभिक्खणं जाव पडिलेहियव्वे भवइ, से तं सिणेहसुहुमे ८ ॥सू. ४५॥

वासावासं पज्जोसविए भिक्खू इच्छिज्जा गाहावइकुलं
भत्ताए वा पाणाए वा निक्खमित्तए वा पविसित्तए वा, नो
से कप्पइ अणापुच्छित्ता आयरियं वा उवज्झायं वा थेरं वा पवित्तिं
वा गणिं वा गणंहरं वा गणावच्छेअयं वा जं वा पुरओ काउं विह-
रइ, कप्पइ से आपुच्छित्तं आयरियं वा उवज्झायं वा थेरं पवित्तिं

गणिं गणहरं गणावच्छेदयं जं वा पुरओ काउं विहरइ-‘इच्छामि णं
भंते ! तुब्भेहिं अब्भणुणाए समाणे गाहावइकुलं भत्ताए वा पाणाए
वा निक्खमित्तए वा पविसित्तए वा,’ ते य से वियरिज्जा एवं से
कप्पइ गाहावइकुलं भत्ताए वा पाणाए वा निक्खमित्तए वा पस्सि-
सित्तए वा, ते य से नो वियरिज्जा एवं से नो कप्पइ गाहावइकुलं
भत्ताए वा पाणाए वा निक्खमित्तए वा पविसित्तए वा । से किमाहु
भंते ! आयरिया पच्चवायं जाणंति ॥ सू. ४६ ॥ एवं विहारभूमिं वा

वि

वियारभूमिं वा अन्नं वा जंकिंचि पओअणं, एवं गामाणुगामं दूइ-
 ज्जित्तए ॥ सू. ४७ ॥ वासावासं पज्जोसविए भिक्खू इच्छिज्जा
 अण्णयरिं विगइं आहारित्तए, नो से कप्पइ से अणापुच्छित्ता आय-
 रियं वा उवज्झायं वा थेरं पवित्तिं गणिं गणहरं गणावच्छेययं वा जं
 वा पुरओ काउं (कट्टु) विहरइ, कप्पइ से आपुच्छित्ता आयरियं वा
 उवज्झायं वा थेरं पवित्तिं गणिं गणहरं गणावच्छेययं वा जं वा
 पुरओ काउं विहरइ आहारित्तए- ' इच्छामि णं भंत्ते ! तुब्भेहिं

अब्भणुण्णाए समाणे अन्नयरिं विगइं आहारित्तए, तं एवइयं वा
एवइखुत्तो वा, ते य से वियरिज्जा एवं से कप्पइ अण्णयरिं विगइं
आहारित्तए, ते य से नो वियरिज्जा एवं से नो कप्पइ अण्णयरिं
विगइं आहारित्तए, से किमाहु भंते ! आयरिया पच्चवायं जाणंति
॥ सू. ४८ ॥ वासावासं पज्जोसविए भिक्खू इच्छिज्जा अण्णयरिं
तेइच्छियं आउट्ठित्तए, नो से कप्पइ से अणापुच्छित्ता आयरियं वा
उवज्झायं वा थेरं पवित्तिं गणिं गणहरं गणावच्छेययं वा जं वा

पुरओ काउं विहरइ, कप्पइ से आपुच्छित्ता आयरियं वा उवज्झायं वा
 थेरं पवित्तिं गणिं गणहरं गणावच्छेययं वा जं वा पुरओ काउं विहरइ,
 'इच्छामि णं भंते ! तुब्भेहिं अब्भणुण्णाए समाणे अण्णयरिं तेइच्छियं
 आउट्ठित्तए,' तं एवइयं वा एवइखुत्तो वा, ते य से वियरिज्जा एवं
 से कप्पइ अण्णयरिं तेइच्छियं आउट्ठित्तए, ते य से नो वियरिज्जा
 एवं से नो कप्पइ अण्णयरिं तेइच्छियं आउट्ठित्तए । से किमाहु
 भंते !? आयरिया पच्चवायं जाणंति ॥सू. ४९॥ वासावासं पज्जो-

सविए भिक्खू इच्छिज्जा अण्णयरं ओरालं कल्लाणं सिवं धण्णं मंगल्लं
सस्सिरीयं महाणुभावं तवोकम्मं उवसंपज्जित्ता णं विहरित्तए, नो से
कप्पइ अणापुच्छित्ता आयरियं वा उवज्झायं वा थेरं पवित्तिं गणिं
गणहरं गणावच्छेययं वा जं वा पुरओ काउं विहरइ, कप्पइ से
आपुच्छित्ता आयरियं वा उवज्झायं वा थेरं पवित्तिं गणिं गणहरं
गणावच्छेययं वा जं वा पुरओ काउं विहरइ, - 'इच्छामि णं भंते !
तुब्भेहिं अब्भणुण्णाए समाणे अण्णयरं ओरालं कल्लाणं सिवं धण्णं

मंगलं सस्सिरीयं महाणुभावं तवोकम्मं उवसंपज्जित्ता णं विहरित्तए, तं एवइयं वा एवइखुत्तो वा, ते य से वियरिज्जा एवं से कप्पइ अण्णयरं ओरालं कल्लाणं सिवं धण्णं मंगलं सस्सिरीयं महाणुभावं तवोकम्मं उवसंपज्जित्ताणं विहरित्तए, ते य से नो वियरिज्जा एवं से नो कप्पइ अण्णयरं ओरालं कल्लाणं सिवं धण्णं मंगलं सस्सिरीयं महाणुभावं तवोकम्मं उवसंपज्जित्ता णं विहरित्तए। से किमाहु भंते! ?, आयरिया पच्चवायं जाणंति ॥ सू. ५० ॥ वासा-

वासं पज्जोसविए भिक्खू इच्छि^५जा अपच्छिम-मारणांतिय-संलेहणा-
जूसणाजूसिए भत्तपाण-पडियाइक्खिए पाओवगए कालं अणवकंख
माणे विहरित्तए वा निक्खमित्तए वा, पविसित्तए वा असणं वा पाणं वा
खाइमं वा साइमं वा आहारित्तए वा, उच्चारं वा पासवणं वा परिट्ठा-
वित्तए, सज्झायं वा करित्तए, धम्मजागरियं वा जागरित्तए, नो से
कप्पइ पुच्छित्ता आयरियं वा उवज्झायं वा थेरं पवित्तिं गणिं गणहरं
गणावच्छेययं वा जं वा पुरओ काउं विहरइ, कप्पइ से आपुच्छित्ता

आयरियं वा उवज्झायं वा थेरं पवित्तिं गणिं गणहरं गणावच्छेययं
 वा जं वा पुरओ काउं विहरइ, - 'इच्छामि णं भंते ! तुब्भेहिं अब्भ-
 णुण्णाए समाणे अपच्छिम-मारणंतिय-संलेहणा-जूसणाजूसिए भत्त-
 पाण-पडियाइक्खिए पाओवगए कालं अणवकंखमाणे विहरित्तिए वा
 निक्खमित्तिए वा पविसित्तिए वा, असणं वा पाणं वा खाइमं वा
 साइमं वा आहारित्तिए वा, उच्चारं वा पासवणं^{वा} परिट्ठावित्तिए, सज्झायं
 वा करित्तिए, धम्मजागरियं वा जागरित्तिए,' तं एवइयं वा एवइखुत्तो

वा, ते य से वियरिज्जा एवं से कप्पइ, ते य से नो वियरिज्जा नो
से कप्पइ, से किमाहु भंते! ?, आयरिया पच्चवायं जाणंति ॥ सू. ५१ ॥
वासावासं पज्जोसविए भिक्खू इच्छिज्जा वत्थं वा पडिग्गहं वा कंबलं
वा पायपुंछणं वा अण्णयरिं वा उवहिं आयावित्तए वा पयावित्तए वा,
नो से कप्पइ एगं वा अणेगं वा अपडिण्णवित्ता गाहावड्कुलं भत्ताए
वा पाणाए वा निक्खमित्तए वा पविसित्तए वा, असणं वा पाणं वा
खाइमं वा साइमं वा आहारित्तए, बहिया विहारभूमिं वा वियार-

भूमिं वा सज्झायं वा करित्तए, काउस्सग्गं वा ठाणं वा ठाइत्तए ।
 अत्थि य इत्थ केइ अभिसमण्णागए अहासण्हिए एगे वा अणेगे
 वा, कप्पइ से एवं वइत्तए-‘इमं ता अज्जो ! तुमं मुहुत्तगं जाणेहि
 जाव ताव अहं गाहावइकुलं भत्ताए वा पाणाए वा निक्खमित्तए
 वा पविसित्तए वा, असणं वा पाणं वा खाइमं वा साइमं वा आहा-
 रित्तए, बहिया विहारभूमिं वियारभूमिं सज्झायं वा करित्तए, काउ-
 स्सग्गं वा ठाणं वा ठाइत्तए’ से य से पडिसुणिज्जा एवं से कप्पइ

गाहावडकुलं भत्ताए वा पाणाए वा निक्खमित्तए वा पविसित्तए वा,
असणं पाणं खाइमं साइमं आहारित्तए वा, बहिया विहारभूमिं
वियारभूमिं सज्झायं करित्तए वा । से य से नो पडिसुणिज्जा एवं
से नो कप्पइ गाहावडकुलं भत्ताए वा पाणाए वा निक्खमित्तए वा
पविसित्तए वा, असणं पाणं खाइमं साइमं आहारित्तए वा, बहिया
विहारभूमिं वियारभूमिं सज्झायं करित्तए वा, काउस्सग्गं वा ठाणं
वा ठाइत्तए ॥ सू. ५२ ॥ वासावासं पज्जोसवियाणं नो कप्पइ निग्गं-

थाण वा निग्गंथीण वा अणभिग्गहिय-सिज्जासणियाणं हुत्तए,
 अयाणमेयं, अणभिग्गहिय-सिज्जासणियस्स अणुच्चा-कूड्यस्स
 अणट्ठा-बंधियस्स अमियासणियस्स अणातावियस्स असमियस्स
 अभिक्खणं अभिक्खणं अपडिलेहणासीलस्स अपमज्जणासीलस्स
 तहा तहा संजमे दुराराहए भवइ ॥ सू. ५३ ॥ अणायाणमेयं अभि-
 ग्गहिय-सिज्जासणियस्स उच्चाकुड्यस्स अट्ठाबंधियस्स मियासणि-
 यस्स आयावियस्स समियस्स अभिक्खणं अभिक्खणं पडिलेहणा-

सीलस्स पमज्जणासीलस्स तहा तहा संजमे सुआराहए भवइ

॥ सू. ५४ ॥ वासावासं पज्जोसवियाणं कप्पइ निग्गंथाण वा निग्गं-

थीण वा तओ उच्चार-पासवणभूमीओ पडिलेहत्तए, न तहा हेमंत-

गिम्हासु जहा णं वासासु, से किमाहु भंते ! वासासु णं ओसण्णं

पाणा य तणा य बीया य पणगा य हरियाणि य भवंति ॥ सू. ५५ ॥

वासावासं पज्जोसवियाणं कप्पइ निग्गंथाण वा निग्गंथीण वा

तओ मत्तगाइं गिण्हत्तए, तंजहा-उच्चारमत्तए, पासवणमत्तए,

खेलमत्तए ॥ सू. ५६ ॥ वासावासं पज्जोसवियाणं नो कप्पइ
 निग्गंथाण वा निग्गंथीण वा परं पज्जोसवणाओ गोलोमप्पमाणमि-
 त्तेवि केसे तं रयणिं उवायणावित्तए । अज्जेणं खुरमुंडेण वा लुक्कसिएण
 वा होइयव्वं सिया । पक्खिया आरोवणा मासिए खुरमुंडे, अद्धमा-
 सिए कत्तरिमुंडे, छम्मासिए लोए, संवच्छरिए वा थेरकप्पे ॥ सू. ५७ ॥
 वासावासं पज्जोसवियाणं नो कप्पइ निग्गंथाण वा निग्गंथीण वा परं
 पज्जोसवणाओ अहिगरणं वइत्तए, जे णं निग्गंथो वा निग्गंथी वा परं

पञ्जोसवणाओ अहिगरणं वयइ, से णं अकप्पेणं “अज्जो ! वयसीत्ति”
वत्तव्वेसिया, जेणं निग्गंथो वा निग्गंथी वा परं पञ्जोसवणाओ अहिगरणं
वयइ, से णं निज्जूहियव्वे सिया ॥ सू. ५८ ॥ वासावासं पञ्जोसवियाणं
इह खलु निग्गंथाण वा निग्गंथीण वा अज्जेव कक्खडे कटुए वि(वु)ग्गहे
समुप्पज्जित्था सेहे राइणियं खामिज्जा, राइणिएवि सेहं खामिज्जा
(ग्रं. १२००) खमियव्वं खमावियव्वं उवसमियव्वं उवसमावियव्वं
सुमइ-संपुच्छणा-बहुलेणं होयव्वं । जो उवसमइ तस्स अत्थि आराहणा,

जो न उवसमइ तस्स नत्थि आराहणा, तम्हा अप्पणा चेव उवसमियव्वं,
 से किमाहु भंते ! उवसमसारं खु सामण्णं ॥ सू. ५९ ॥ वासावासं
 पज्जोसवियाणं कप्पइ निग्गंथाण वा निग्गंथीण वा तओ उवस्सया
 गिण्हत्तए, तंजहा-वेउव्विया पडिलेहा साइज्जिया पमज्जणा
 ॥ सू. ६० ॥ वासावासं पज्जोसवियाणं निग्गंथाण वा निग्गंथीण वा
 कप्पइ अण्णयरिं दिसिं वा अणुदिसिं वा अवगिज्झिय भत्तपाणं
 गवेसित्तए । से किमाहु भंते ! उस्सण्णं समणा भगवंतो वासासु

तवसंपउत्ता भवंति, तवस्सी दुब्बले किलंते मुच्छिज्जा वा पवडिज्ज
वा, तमेव दिसं वा, अणुदिसं वा समणा भगवंतो पडिजागरंति
॥ सू. ६१ ॥ वासावासं पज्जोसवियाणं कप्पइ निग्गंथाण वा निग्गं-
थीण वा गिलाणहेउं जाव चत्तारि पंच जोयणाइं गंतुं पडिनियत्तए,
अंतरावि से कप्पइ वत्थए, नो से कप्पइ तं रयणिं तत्थेव उवायणा-
वित्तए ॥ सू. ६२ ॥

इच्चेयं संवच्छरिअं थेरकप्पं अहासुत्तं अहाकप्पं अहामग्गं अहा-

तच्चं सम्मं काएण फासित्ता पालित्ता सोभित्ता तीरित्ता किट्टित्ता
 आराहित्ता आणाए अणुपालित्ता अत्थेगइआ समणा निग्गंथा तेणेव
 भवग्गहणेणं सिज्झंति बुज्झंति मुच्चंति परिनिव्वाइंति सब्बदुक्खाण-
 मंतं करिंति, अत्थेगइआ दुच्चेणं भवग्गहणेणं सिज्झंति जाव सब्ब-
 दुक्खाणमंतं करिंति, अत्थेगइया तच्चेणं भवग्गहणेणं जाव अंतं
 करिंति, सत्तट्ठभवग्गहणाइं नाइक्कमंति ॥ सू. ६३ ॥

तेणं कालेणं तेणं समएणं समणे भगवं महावीरे रायगिहे नगरे

गुणसिलए चेइए, बहूणं समणाणं बहूणं समणीणं बहूणं सावयाणं
बहूणं सावियाणं बहूणं देवाणं बहूणं देवीणं मज्झगए चेव एवमा-
इक्खइ, एवं भासइ, एवं पण्णवेइ, एवं परूवेइ, पज्जोसवणाकप्पो
नामं अज्झयणं सअट्ठं सहेउअं सकारणं ससुत्तं सअत्थं सउ-
भयं सवागरणं भुज्जो भुज्जो उवदंसेइ त्ति वेमि ॥ सू. ६४ ॥

इति सामाचारीनामकं तृतीयं वाच्यम् ॥ ३ ॥

इति पज्जोसवणाकप्पं नाम दसासुअक्खंधस्स अट्ठम-

मज्झयणं समत्तं ॥ (ग्रंथाग्रं १२१५)

॥ श्रुतकेवली श्री भद्रबाहु स्वामिविरचितं
श्रीमद्दशाश्रुतस्कन्धान्तर्गत श्री कल्पसूत्रं
(बारसासूत्रं) समाप्तम् ॥

॥ श्री तपागच्छ-गगनाङ्गण-दिनमणि-पन्न्यासप्रवर-श्री बुद्धिविजय-गणिवर-पादाम्बुज-भृङ्गायमान-पन्न्यास-श्रीमदाणंदविजय-
गणिवर-चरणचन्द्रचकोर-मुनिप्रवर-श्रीहर्षविजय-मुनीन्द्राङ्घ्रि-सरसिरुह-मानस-राजहंस-तपोमूर्ति-जैनाचार्य- श्रीमद्विजय कर्पूर-
सूरीश्वर-पट्टधर-शासनप्रतिवादीभकण्ठीरव-हालारदशोद्धारक-कविरत्नाचार्यदेव-श्रीमद्विजयामृतसूरीश्वर-चञ्चरणचञ्चरीक-
पन्न्यास-श्रीजिनेन्द्रविजय-गणिवर-संशोधित-सम्पादित-श्रीमदागम-सुधा-सिन्धौ श्रीमत्कल्पसूत्राख्य एकादशमो विभागः
समाप्तः ॥